


2  
Acta Concilij Tridentini.

Quorum Catalogus in proxima  
ineſt pagina.



P A R I S I I S,  
Ex officina Reginaldi Calderij,  
& Claudij eius filij.

I 5 4 6.  
Cum priuilegio.

**Actorum Concilij Tridentini Catalogus.**

- S. D. N. D. Pauli diuina prouidentia Papæ IIII. Bulla  
Indictionis supplicationum, seu Processionū, per uniuersum  
orbem Christianum, pro celebratione sancti Oecumenici  
generalis Cōcilij, cū adhortatione ad ieiunium, & sacro-  
sanctam Cōnunionem: & gratia plenariæ Indulgentiæ.  
Admonitio atque hortatio Legatorum sedis Apostolicæ ad  
Patres in Concilio Tridentino, lecta in prima sessione.  
Cōcio Fratris Dominici soto Segobi. Theologi, ordinis Præ-  
dicatorum, De extremo iudicio, prima dominica Aduen-  
tus, ad Legatos & Synodum, eadem die Tridenti habita.  
Oratio R. P. D. Cornelij Episcopi Bitontini, tertia Dominica  
Aduentus in Concilio Tridentino habita.  
Oratio ad Patres in Concilio Tridētino habita à R. P. Fratre  
Antonio Marinario Carmelitano quarta Domi. Aduētus.  
Oratio habita à R. P. Fratre Ambrosio Catharino Polito Se-  
nensi ordinis Prædicatorum in secunda sessione Synodi  
Tridentinæ IIII. Februarij M. D. XLVI.  
Oratio Illustissimi D. D. Francisci à Tolet oratoris Cæsarei  
ad Synodum habita die octaua Aprilis M. D. XLVI.  
Oratio clarissimi atq; facundissimi uiri D. Petri Danesij ora-  
toris Christianissimi Francorum Regis ad Synodum.  
Nomina, cognomina, tituli, dignitates, prouinciæ, & gra-  
dus in sacrosancta synodo Tridentina existentium.  
Decretum primæ sessionis Tridentinæ, pronuntiatum die  
septima mensis Ianuarij anno Domini. 1546.  
Decretum secundæ sessionis Concilij Tridentini, pronuntia-  
tum die quarta mensis Februarij anno 1546.  
Decretum tertiæ sessionis Concilij Tridentini, quæ celebrata  
fuit quinta Aprilis eodem anno.  
Primum decretum quartæ sessionis Tridentini Concilij  
XVII. mensis Iunij 1546. celebratæ.  
Secundum decretum quartæ sessionis Tridentinæ synodi.

B V L L A.

Paulus Episcopus Seruus Seruorum Dei.

*Ad futuram rei memoriam.*



Vm Prophetæ vox, nostris in auribus iugiter insonet, Clama, ne cesses: idq; præcipuum munus, ex onere nostris iniuncto humeris, licet his impari, nobis incūbere agnoscamus: ipsa præsentium temporum calamitate, ac hæresum vndique pullulantium pernicie, in intimis adeò pulsamur præcordijs: vt nobis ipsis, pro sancta vniuersali Ecclesia, ac dominici gregis nostræ curæ crediti, salute, nūquam satis operæ, laboris, ac sollicitudinis, adhibere posse videamur. Tot igitur, ac tantis turbinibus aliquando sedandis, nullum æquè salutiferum, ac præsentissimum remedium comperiri semper existimauius, quàm sanctissimi O Ecumenici Concilij celebrationem indicere, ad sananda scilicet Catholicæ Ecclesiæ vulnera, ab impijs infidelibus, reprobisque hæreticis eidem inflicta. Vna igitur hac ratione, sacratissimam Synodum à nobis Tridenti iam dudum indictam, hodierna luce aperiri mandauimus: eam fine optimo, Spiritu sancto adiuuante, conclusum iri, & optatam orbi Christiano salutē allaturam deniq; sperātes. O Ecumenicum autē cum sit Cōcilium, hoc decet à cunctis Christifidelibus, humili & cōtrito corde, deuoriscq; precibus celebrari: vt quos adesse coram opus fuerit, hi in ultorū orationibus adiuti, gratius in rebus catholicæ fidei, dictæq; vniuersalis Ecclesiæ res

A.ij. forma

formationis ibi peragēdis, omnipotenti Deo exhibere valeant obsequium. Quamobrē omnes Christi fideles huiusmodi hortamur, ac in domino requiramus, vt posteaq̃ hæ nostræ literæ ad eorū manus peruenerint, & per locorū ordinarios publicatę fuerint, diligēter peccatorū suorum perscrutatione & examine præuijs, se ad eorū confessionē, in hebdomada earundē literarū publicationem immediatē sequenti, de more Ecclesię subeundā præparent, & illa confiteātur: quartāq̃, ac sexta ferijs ipsius hebdomadæ, necnon die sabbathi ieiunēt: Dominica verò die proximē sequenti, sacratissimam corporis Domini nostri Iesu Christi Eucharistiam sumant: Deū ex intimis cordis, pro Christianorū omnium pace, & pro salutifero, & tranquillo, ac fructuoso eiusdē sacrosancti O Ecumenici Cōcilij progressu, & perfectione, orātes. Ac vt præfatos Christi fideles, ad hoc etiam præmijs cælestibus inuitemus: omnibus, & singulis Christifidelibus ipsis qui præmissa adimpleuerint: & processionibus, ac supplicationibus, Quarta & Sexta ferijs, ac Sabbathi die prædictis, eo ordine qui in alma Vrbe nostra Romæ obseruatus extitit, publicē habendis, interfuerint: aut qui aduersa valetudine, seu alio impedimento legitimo detēti, ac Abbatissæ, Priorissæ, & Monasteriorū quoruncūq̃ Moniales, etiā sub clausura existētes, & eisdē processionibus interesse nequeunt: si eleemosynam, iuxta eorū deuotionem & facultatem, alicui pauperi Christi, piē fuerint enlargiti: aut si inopes extiterint, Dominicā orationem, cū salutatione Angelica, quinquies recitaauerint, & præmissorum loco, pias ad deum preces deuotē

uotè effuderint: eiusdē omnipotentis Dei benigni-  
tate, ac misericordia, beatorūmq; eius Apostolorū  
Petri & Pauli auctoritate freti, plenissimā omniū  
peccatorū suorū veniam, & remissionē, misericors  
diter in domino cōcedimus, & elargimur. Et vt hæc  
omnia, ad plurium notitiam peruenire valeant, si-  
mūlq; Deus ipse misericors à quamplurimis exor-  
retur: omnibus Patriarchis, Archiepiscopis, Episco-  
pis, & alijs Ecclesiarū Prælati, vt cū primū eadē  
præsentēs literæ, ad eorū manus peruenerint: eas,  
seu earū transumptum, manu alicuius prælati, seu  
personæ in dignitate Ecclesiastica constitutæ sub-  
scriptum, vbiq; per eorū prouincias, Ecclesias, ciui-  
tates, & diœceses, absq; vllo quæstu, cum gratijs,  
concessionibus, & indulgentijs ibidem contentis,  
gratis publicari faciant, in virtute sanctæ obedi-  
tiæ præcipiendo mandamus: Constitutionibus, &  
ordinationibus Apostolicis, & alijs contrarijs non  
obstantibus quibuscunq;. Volumus autē, quòd hu-  
iusmodi processiones, & supplicationes, vnica tan-  
tū vice, in Ciuitatibus, Terris, Castris, & locis, &  
in Ecclesijs in quibus præcipua animarum cura in-  
iuncta reperitur, duntaxat fiant & habeantur: præ-  
sentibus, postquā in vrbe, ac prouincijs, Ecclesijs,  
Ciuitatibus, & diœcesibus prædictis, publicatæ fue-  
rint: ac Quarta, & Sexta feriæ, ac dies Sabbathi  
huiusmodi præterierint: minimè valituris. Datum  
Romæ apud sanctum Petrum, Anno Incarnatio-  
nis Do. M. D. x l v. Idibus Decemb. Pontifica-  
tus nostri, Anno Duodecimo. L. de Torres.  
B. Motta.

A. iij.

Admo.

20 Admonitio atque hortatio Lega-  
torum Sedis Apostolicæ  
*Ad Patres in Concilio Tridentino,  
lecta in prima sessione.*



Euerendiss. Patres, &c. Cum ipsa mun-  
neris nostri ratio, qui in hac sancta Syn-  
odo Præsidentium, & sedis Apostolicę  
Legatorum personā gerimus, hoc po-  
stulatura videatur, vt crescentibus ne-  
gotijs, quę in hoc sacro confesso ad Dei gloriam,  
& Ecclesię vtilitatē sunt expedienda, sæpius apud  
vos cohortandi & commonendi causa verba facia-  
mus: tum verò in hac prima sessione, quę felix (vt  
speramus) principium ipsi Concilio est datura, mi-  
nimè hoc à nobis prætermittendum duximus. Eò  
verò libentius hoc officio fungimur, quòd cū vos  
vel hortamur, vt ea faciatis, quę digna tanto con-  
uentu sint, vel à contrarijs dehortamur: nosmet-  
ipsos etiam hortamur, ac dehortamur, qui in eadē  
quasi naui vobiscum sumus, iisdemq; periculis, qui-  
bus vos, iisdem tempestatibus subiicimur. nosmet-  
ipsos inquam excitamus ad vigilandum, ne vel in-  
scopulos incidamus, qui plurimi proculdubio in  
hoc cursu sese offerent: vel magnitudine negotio-  
rum tanquam fluctuum obrui nos negligentia no-  
stra patiamur: verum spe & fide erecti, eò naviga-  
tionem dirigamus, quò maximè portus salutis ad  
Dei gloriam in Christo Iesu sese ostendet. Igitur,  
vt ab eo incipiamus, de quo maximè in hoc prin-  
cipio admonendi omnes sumus, vnusquisque no-  
strum

stram ante oculos sibi in primis proponere debet, quænam sint, quæ ab hoc sacro Concilio expectentur: ex quo quisq; facillè intelliget, quantû sibi oneris incumbat. Sunt verò ea ( vt omnia summarim complectamur ) quæ in Bulla indictionis Concilij continentur: nempe hæresum extirpatio, disciplinæ ecclesiasticæ & morum reformatio, ac tandem pax externa totius Ecclesiæ. Hæc ergo sunt, quæ nos curare, vel potius pro quibus assidue orare, vt Dei benignitate fiant, oportet. Atq; illud est, de quo ante omnia in ipso Concilij exordio omnes, & singulos, qui huc conuenimus, primû autem nos ipsos, qui in tam sancto ministerio præsidemus, admonendos duximus, ne vnquam cogitemus, vel per singulos, qui hîc adsunt, vel per vniuersum Cõcilium, etiam si omnes Pastores ex vniuerso terrarum orbe huc coirent, tantis malis, quibus nunc grex Christi est oppressus, prouideri posse. Si enim putamus hoc à nobis perfici posse, aut ab alio, q̃ ab ipso Christo, quem Deus Pater vnicum nobis seruatorem, & Pastorem dedit, cui etiam omnem potestatem dedit, erramus sanè in fundamento omnium actionum nostrarum, & diuinam iram magis prouocabimus. Adiungimus enim ad superiora mala, quæ propterea nobis acciderunt, quòd ipsum fontē aquæ viuæ reliquimus, hoc alterum maximû peccatû, quòd nostra vel prudentia, vel potentia, ijsdem malis mederi velimus: vt meritò de nobis dicatur, quod Propheta in persona Dei veterem populum accusans, dicit: Duo mala fecit populus hic, me dereliquerunt fontem aquæ viuæ, & foderunt sibi cisternas non valentes continere aquas.

A. iiii, Tales



Tales verò cisternæ sunt omnia concilia, quæ à nostra prudētia, nō afflata spiritu diuino, proficiuntur: quæ nō modò populos in pietate, & obedientia, tanq̃ aquas in cisternis continere nō valent: sed quò magis his artibus retinere eos laboramus, eò violentius tanquam torrentes à nobis defluunt, & discedunt: vt superiorum annorū experientia multis in locis satis nos docere potest, & nunc admonere, vnicam tantū viam medēdis his malis relictam, si nostra omnia remedia inutilia esse agnoscētes, & valere potius ad augenda, quàm ad tollenda mala, ad Christi potentiam, quem dexteram suam Deus Pater appellat, ad Christi sapientiam, qui est sapiētia Patris, in omnibus nos, qui Patrum personam gerimus, fide, & spe confugiamus, huius nos in omnibus ministros esse agnoscamus. Hic verò quæritur (inquit Apostolus) inter dispensatores, vt fidelis quis inueniatur. Hoc autem nunc nobis agendum est, vt ministros nos in omnibus idoneos præbeamus. Erimus verò idonei, si nos ex nobis minimè idoneos esse iudicauerimus. Quis enim (inquit idem Apostolus) ad hæc idoneus? vt qui ne cogitare quidem aliquid ex nobis, quasi ex nobis, simus sufficientes. Verū hoc fateri non satis est nobis. hoc dicere potuit Apostolus, & per hanc portam ingredi ad obeundū munus suum, & in eo se ministrum fidelem, ac idoneum ostendere, qui simul dicere potuit, de ministerio suo loquens, Nihil mihi conscius sum. Nobis verò, qui si verum fateri volumus, aliter dicere non possumus, quin nobis conscij simus in administrando munere nobis imposito in plurimis defecisse, & horum  
etiam



etiam malorum, ad quæ corrigenda vocamur, non minima ex parte causam extitisse, non satis est hîc fateri ad tantum munus nos impares esse. Quid ergo nobis agendum, vt idonei hoc tempore Christi ministri in Ecclesia instaurâda esse possimus? Idem prorsus, quod Christus ipse Episcopus animarum nostrarum fecit, cum venit ad fundandam & formandam Ecclesiam suam. Idem sanè Patres faciendum erit nobis, quod ipsa sapientia Patris fecit, cum venit, vt multos filios in gloriam adduceret: id quod nobis item propositum nunc esse debet. Is enim cum oppressos peccatis omnes inuenisset, omnia omnium peccata in seipsum transtulit, seq̃ vnum ante Deum pro omnibus reum, & nocentem constituit, ac pœnam nobis debitam sustinuit, tanquam omnia flagitia, & omnia scelera, quæ nos cõmiseramus, ipse commisisset, cum tamen ab omni labe peccati purissimus esset: quippe qui peccatum non fecit, neq̃ vnquam inuentus est dolus in ore eius. Quod verò Christus pro immensa sua charitate erga Deum Patrem, & pro misericordia erga nostrum genus fecit: hoc nunc, vt ipsi faciamus, iustitia ipsa à nobis flagitat, vt omnium horum malorum, quibus grex Christi est oppressus, nos Pastores coram tribunali misericordiæ Dei reos constituamus: atq̃ omnium peccata in nos ipsos non tam piè, quàm iustè transferentes, quia re vera horum malorum magna ex parte nos causa sumus, diuinam misericordiam per Iesum Christum imploremus. Quod verò dicimus, nos pastores his malis, quibus Ecclesia est oppressa, causam dedisse: si quis hoc acrius, & magis per exaggerationem quandam

quandam verborum,quàm verè dictum existimet,  
hoc quidem ipsa rerū experientia,quæ mentiri nō  
potest,comprobabit. Respiciamus ergo paululum  
ad ipsa mala,quibus Ecclesia opprimitur,ac simul  
etiam ad nostra peccata. Sed quis hæc numerare  
valeat? quæ simul cum reliquis malis multitudine  
superant arenam maris:& vsq; ad cælum clamant.  
Circumscribamus ergo tantam multitudinem no-  
strorum malorum illis limitibus,quibus hoc Con-  
cilium,quod capitalibus malis medendis est voca-  
tum,ea circūscripsit. Sunt verò illa tria,quæ suprà  
commemorauimus,hæreses,lapsa morum discipli-  
na,& intestinum atque externum bellum. Hic er-  
go videamus,& consideremus,cum iam multis an-  
nis Ecclesia his calamitatibus vexetur, vndenam  
ipsa originē habuerunt:num illis nos quodam mo-  
do principium,num fomentū dederimus. Primum  
verò examinemus initiū hæresum,quæ hac nostra  
ætate passim pullularūt. quibus si negare volumus  
nos principium dedisse,quia nullius hæreseos ipsi  
auctores fuimus:tamen cum peruersæ de fide sen-  
tentia,tanquam vepres quædam sint & spinæ,quæ  
in agro Domini,qui nobis colendus cōmendatus  
est,ortæ sunt: & si illæ quidē sua sponte,vt solent  
aliquādo vitiosæ herbæ,pullularunt:tamen qui nō  
coluit quem debuit agrum,qui non seminauit,qui  
pullulantes per se non statim curam adhibuit vt  
extirparet,non minus quidem principium illis de-  
disse dicendus est,quàm si ipsas seminauerit, præ-  
sertim cum hæc omnia à negligentia agricolæ or-  
tum ducant,& incrementū habeant. Hic ergo se-  
ipsos excutiant,qui sunt agricolæ in agro Domini,  
conscien-

conscientiam suā interrogent,quo modo in eo colendo,quo modo in seminando se gesserint. Quod qui fecerint his præsertim temporibus,quibus paucissimi agro Domini colendo incumbunt,non multum,credimus,dubitabunt,num ad ipsos pullulantium passim in Ecclesia hæresum culpa pertineat. Hæc verò monendi tantum causa dicta satis sint de his,quæ ad primum caput pertinent.Veniamus ad secundum,quod lapsam morum disciplinam & abusus(vt vocant) cõplectitur. Hic verò nihil attinet diu inuestigare, quinam tantorū malorū auctores fuerint,cum præter nos ipsos ne nominare quidē vllum alium auctore possimus.Quare ad tertium accedamus,quod impedimenta pacis Ecclesiæ in se continet:qualia sunt arma,vel domestica,vel externa:hæc enim iampridem pacem Ecclesiæ perturbarunt,& adhuc perturbant. de quibus hoc tantum dicimus:si ( quod Deus ipse certissimis signis ostendit ) hæc arma,flagella eius sunt,quibus nos affligit: quia duorum priorum capitum rei sumus,in quibus nos excusare non possumus,etiam horū armorū præcipuā nos causam esse negare nō possumus. Eiusmodi verò flagella Deum ob eam causam immittere censemus,vt nos peccantes castiget,& peccata ipsa,quibus Maiestati eius maxime offendimus,nobis ante oculos ponat.Hic verò quisquis aliquando animaduertit,quibus modis Ecclesia armorū violētia vexata fuerit,secum ipse cõsideret,quænā illa sint,in quibus præcipuē Ecclesia propter ipsa arma detrimentum patiatur. Nec verò hic refert de quorum armis loquamur, siue de intestinis nostrorū Principum, siue de externis

Turca-

Turcarum armis, quæ superioribus annis nos magnis calamitatibus affecerunt, siue de eorum, qui ab obedientia eorū Pastorum discesserunt, & ipsos à suis sedibus expulerunt. Hoc enim summatim dicimus de omni genere armorum: si qui illa contra nos tractarunt, à suis Ecclesijs Pastores fugarunt, ordines confuderunt, Laicos autem in Episcoporum locū suffecerunt, Ecclesiæ bona diripuerunt, cursum verbi Dei impediuerunt: hoc inquam dicimus, nihil horum esse, quod in libro abusuum Pastorum, maxima illorum pars, qui hoc nomen sibi vindicant, per se factum esse, si legere libuerit, non scriptū apertis verbis inueniat. Nostram enim ambitionem, nostram auaritiā, nostras cupiditates his omnibus malis populum Dei prius affecisse statim inueniet, atque harum vi ab Ecclesijs Pastores fugari, easque pabulo verbi priuari: bona Ecclesiarū, quæ sunt bona pauperū, ab illis tolli: indignis sacerdotia conferri: & illis, qui nihil à Laicis, præterquam in vestis genere, ac ne in hoc quidem differunt, dari. Quid enim horum est, quod negare possumus per hos annos à nobis factum esse? Quare si Turca, si hæretici hoc idem aduersus nos faciunt, quid hūc aliud, quàm flagitia nostra, & simul iustū Dei iudicium videmus? iudicium verò plenum misericordia. si enim pro meritis nos castigaret, iam pridem sicut Sodoma, & Gomorrha fuisset. Cur verò hæc nunc commemoramus? an vt vos confundamus? absit. sed magis vt vos ceu Patres, & fratres charissimos, primū autem nosmetipsos admoneamus, quo pacto hæc, quibus nūc affligimur, flagella, & grauiora quæ impendent, nisi resipiscamus,

mus, vitare possimus, vt effugiamus tremendum illud Dei iudicium, omnibus quidem nō resipiscens-  
tibus tremendum, maximè verò illis qui præsunt.  
Iudiciū enim graue (inquit scriptura) his qui præsunt, fiet. Iudicium verò incipere nunc videmus à  
domo Dei. Dum enim nunc eijciūtur Sacerdotes,  
dum conculcantur ab hominibus, quid aliud hoc  
indicat, quàm diuinum de nobis iudicium, quod  
prædixit Christus, cū diceret Sacerdotes suos esse  
sal terræ: quòd si sal euauerit, ad nihil valere vltra,  
nisi vt eijciatur foras, & conculcetur ab hominibus?  
Hæc verò omnia nos nūc patimur. Quod si  
propter iustitiam, vt nostri maiores, beati nos quidem.  
at nunc iustè quidem, quia sal euauit: minime  
autem propter iustitiam patimur. in omnibus  
enim nostris afflictionibus videmus iudiciū Dei.  
atque vtinam quidem illud videremus: hoc enim  
initium esset omnia Dei iudicia & flagella effus-  
giendi, atque in gratiam, & in veram gloriam in-  
grediendi. quæ res fecit, vt in his commemoran-  
dis acriores, & longiores fuerimus. nisi enim hæc  
bene cognita, & perspecta fuerint, frustra intra-  
mus in Cōcilium, frustra inuocamus Spiritum san-  
ctum, qui primum ingressum in animam hominis  
semper facere solet, per ipsius hominis cōdemna-  
tionem, vt condemnet mūdum de peccato. Qua-  
re nisi ille Spiritus nos apud nosmetipsos primū  
condemnauerit, nondum illum ingressum esse ad  
nos affirmare possumus, ac ne ingressurū quidem,  
si peccata nostra audire recusamus. Idem enim di-  
cetur nobis, quod populo veteri per Prophetam  
Ezechielem est dictum, cum nondum agnitis suis  
sceleris

sceleribus Deum per Prophetam interrogare vel  
lent. sic autem ait Propheta: Venerunt viri Israel  
ad interrogandum Dominum, & sederunt coram  
me. hæc autem dicit Dominus: Nunquid ad inter-  
rogandum me venistis? Viuo ego, dicit Dominus,  
quia non respondebo vobis. Sequitur autem: Si iu-  
dicas eos, abominationes patrum illorum ostende  
illis. In quibus verbis ostendit Deus, quare nolue-  
rit respondere illis, quia nondum scilicet abomi-  
nationes suas, & patrum suorum audierant. Quare  
cum idem Dei spiritus sit, qui tum dabat respon-  
sa, & quem nunc nos sedentes coram Domino in-  
uocamus: quid nobis faciundum sit, vt propitia  
responſa habeamus, ex his videtis: & simul quàm  
neceſſariò nos, qui præſidemus in hoc ſacro con-  
ſeſſu, à detegendis noſtris peccatis ſermonis ex-  
ordium vobiſcum duximus. Quia verò nonnullos  
nunc videmus, ſua primùm peccata, & noſtri ordi-  
nis grauiter deſtentes, atque Dei miſericordiam  
omnibus votis implorantes, ideo quidem in maxi-  
ma ſpe ſumus, ad nos veniſſe, quem inuocamus,  
Dei ſpiritum. Hoc verò maximum pignus diuinæ  
miſericordiæ habemus, nempe ipſam hæc inchoa-  
tionem Concilij, in quo nunc conuenimus ad eri-  
gendam, & inſtaurandam penè collapſam Eccle-  
ſiam, vt vetus populus poſt diuturnam captiuita-  
tem apud externos reges, redijt Hieroſolymam ad  
inſtaurandum templum. In illius verò populi ſta-  
tu, in illorum læta ad patriam profectione, & tem-  
pli inſtauratione, noſtri quidem temporis, & noſtri  
ſtatus, in hoc præſertim Concilio, imaginem in-  
tueri poſſumus: & in Ducum eiufdem populi exē-  
plo,

plo, vestrum, qui Duces estis populo Dei ad cælestem patriam contēdenti, officium videre. Quare omnes vos magnopere hortamur, vt sæpius ad memoriam reuocetis, quæ in Esdræ, quæ in Nehemiæ, quæ etiam in Danielis libris sunt scripta: in quibus consilia omnium Ducum populi explicantur, quæ hunc vnum semper scopum habuerunt, vt sua, & populi, atque Patrum peccata cōfiterentur, ad pœnitentiam, & implorationem diuinæ misericordiæ omnes excitarēt. Quod cum populus faceret, tum quidem omnia illis feliciter succedere. Eadē verò cōsilia nobis, si felicem successum & exitum expectare volumus in instaurāda Ecclesia, ob quā causam læti huc in spiritu conuenimus, sequenda erunt: atque eò quidem magis, quò etiam maiora nobis certamina impendent instauraturis Ecclesiam, quàm illis instauraturis templum. Si enim illis multi, quo minus id perficeretur, se opposuere: si multi etiam, cum opus impedire nō possent, eos irriserunt: hoc quidem sic habetote, nobis nec irrisores defuturos, nec qui maximis viribus à cœpto opere nos deterreant, & auocent. Habebimus verò non modò colluctationem cum carne, & sanguine, sed cum spiritualibus nequitijs in cælestibus. Verùm his omnibus potentior estis, in cuius nomine hoc opus sumus aggressi. Quare in eo confidamus, ipsum precibus inuocemus, & ipse omnia perficiet. Quia verò hoc Concilium cum deliberantium, tum verò iudicantium speciem refert, in quo & deliberatur de ijs, quæ ad vniuersalis Ecclesiæ bonum pertinent, & etiam iudicatur tam de rebus, quàm de personis: sedemus enim tanquam iudicantes



dicantes duodécim tribus Israel, quibus comprehenditur vniuersus populus Dei: ideo hic maximè locus videtur nos ipsos admonendi, vt caueamus ab his, quæ vel consultandi, vel iudicandi vim in nobis deprauare solent. Hæc verò sunt ipsæ animi passiones: quæ ideo etiã perturbationes vocantur, quia rectum & verũ de rebus iudicium, & sensum perturbant, ac peruertunt: in quibus maximè illa sunt cauēda, quæ rectè monet Ethnicus ille in consilijs abijciēda, cum dicit, Omnes homines, qui de rebus dubijs consultant, ab ira, odio, amicitia, vacuos esse debere. Nam cū in hæc omne genus hominũ sit propensum, tum verò ij maximè, qui principibus seruiūt: tales enim vehementiores habent affectiones: facillimè autem ad gratiam loquuntur, vel ad odium: vt scilicet ipsos existiment Principes affectos esse, à quibus mercedem expectāt. Cum verò de Principibus loquimur, tam de his qui Ecclesiastici vocantur, quàm qui seculares, loquimur. Ac licet quidē nos Principes Christianos habere agnoscamus, & gaudeamus, id quod in veteri & iam recens fundata Ecclesia Patres nostri non habuerunt: tamen ante omnia nobis in hoc Concilio semper est animaduertendum, hunc non esse locum laudandi aliquem, nisi solum Deum in Christo Iesu, atque illum solum iustificandi, omne autem genus hominum condemnandi: primũ verò nos ipsos, qui hæc loquimur, vt cum Daniele dicamus, Nobis confusio faciei, Regibus nostris, Principibus nostris, & Patribus nostris, qui peccauerunt: tibi autem Domino Deo nostro misericordia, & propitiatio, quia recessimus à te, & non audiuiamus

diuimus vocem domini Dei nostri , vt ambulare-  
mus in lege eius,quam posuit nobis per seruos su-  
os Prophetas.Et omnis Israel præuaricati sunt le-  
gem tuam , & declinauerunt , ne audirent vocem  
tuam,& stillauit super nos maledictio , & detesta-  
tio.Hic verò nunc locus esset,vt eiusdem Prophe-  
tæ exemplum sequentes , cuius verba modò reci-  
tauimus,non solùm nostra, qui Sacerdotes sumus,  
sed populi, sed Principum, coram Deo & Ecclesia  
eius,peccata confiteremur, próque omnibus veniã  
imploraremus.Sic verò dicit Daniel:Cúmque ad-  
huc loquerer,& orarem,& confiterer peccata mea,  
& peccata populi mei . nomine populi hoc loco  
omnium ordinum personas complectens , vt eius  
confessio,quam modò recitauimus, declarat. Qua  
in re,quid nobis, qui pro salute vniuersæ Ecclesiæ  
tantis malis oppressæ,huc conuenimus,faciendum  
sit, satis indicare videtur : nimirum , vt nostra, &  
simul Principum , ac populi peccata flentes confi-  
teamur. id quod planè in spiritu mœroris satis nũc  
abundè facimus:verbis verò vberius faceremus, si  
ipsi Principes adessent , qui suam nobiscum con-  
fessionem & lachrymas cõiungerent. Eiusmodi ve-  
rò quasi funiculis peccatorũ,vt Prophetæ loquun-  
tur,Sacerdotum ac Principum atque ipsius popu-  
li peccata sunt colligata , vt difficile sit de vnius  
ordinis peccatis inquirere,quin reliquorum simul  
ordinum peccata appareant. Sic verò omnes ordi-  
nes vna orationis serie accusans in veteri populo,  
dicit Ezechiel in persona Dei: Sacerdotes eius cõ-  
tempserunt legem meam , & polluerunt sanctua-  
ria mea:inter sacrum,& profanum,non habuerunt

distantiam. Principes eius in medio illius, quasi lupi rapientes prædam ad effundendum sanguinem, ad perdendas animas, & auara sectanda lucra. Populi terræ calumniabantur calumniam. Hæc ille. Quæ utinam ad illa solum tempora pertinerent, ac non nostri quoque temporis imaginem referrent. Utinam cum de corruptela morum Sacerdotum loquimur, huic maximam occasionem, maximam materiam, & auctoritatem, ipsos Principes, atque ipsum populū dedisse negare possemus. Sed reprimamus nunc verba usque ad tempus magis opportunum, fontes autem communium lachryarum aperiamus. Redeamus verò ad eos, quos cœpimus admonēdos, præsertim Episcopos, qui cum mandatis Principum huc venerunt. Sic verò illos admonemus, ut omni, qua possunt fide, & diligentia, suis principibus seruiāt: verū ut Episcopos decet, sic illis seruiant, ut serui Dei, non ut serui hominum. Nolite, inquit Apostolus, serui hominum esse. Primum verò seruiant uni Regi Christo, cui Deus Pater omnem potestatem dedit: deinde verò propter eum, omnibus: maximè autem Principibus: Cui honorem, honorem: cui tributum, tributum. Hortamur autem, ut Principibus seruiant ad honorem, quemadmodum eorum mandata verbis ipsis præ se ferunt: in quibus nihil ferè, nisi honorificum, & ad publicam vtilitatem spectans, proponitur. Sic verò in summa seruiant, ut eorum officium in primis spectet ad honorem Dei, & vtilitatem huius Concilij, quod propter publicum bonū est conuocatum. Quare ut ab hoc maximè dehortamur omnes, qui hinc sententias coram Deo, &  
Angelis

Angelis eius, atque coram vniuersa Ecclesia sumus  
dicturi, ne ad gratiam hominis alicuius loquamur:  
sic etiam multo magis, ne ad odium cuiusquam,  
sententiam proferamus, etiam si contra nos aduer-  
sarij, vel inimici, & hostis personam gerat: denique  
vt ab omni inter nos cōtentione abstinemus, ma-  
ximè optamus, & in Domino hortamur. Hęc enim  
sunt, quę contristant, & repellunt, quem inuocau-  
mus Spiritum sanctum, sine quo nihil omnino fa-  
cere poterimus, quod ad bonum & pacem Eccle-  
się cedat. Cum enim (inquit Apostolus) sint inter  
vos contentiones, nonne homines estis, & secun-  
dum hominem ambulatis? Cum verò homines eos  
appellat, Spiritus Dei expertes intelligit. In omni-  
bus autem, quę ad reformationem Ecclesię perti-  
nent, ob quam causam conuenimus, imitari nos o-  
portet illum, qui eam primùm formauit: de quo ad  
hoc ipsum opus ingrediēte, sic in persona Dei Pro-  
pheta loquitur: Ecce seruus meus, quem elegi: dile-  
ctus meus, in quo bene complacuit animę meę:  
dedi spiritum meum super eum: iudicium gētibus  
nuntiabit: non contendet, neque clamabit: arundi-  
nem quassatam nō confringet, & linum fumigans  
non extinguet. Hunc verò spiritum pacis, charita-  
tis, & mansuetudinis, cum semper apud omnes, &  
cum omnibus ostendere debeamus, tum verò ma-  
ximè in hoc sacro confessu, in quo conuenimus, vt  
per gratiā ipsius Spiritus, contentionibus, quę ni-  
mis diu Ecclesiam vexarunt, finis tādē impona-  
tur. Quare ne ipsi vllam cōtentionis ansam alicui  
demus, qui pacificorū personam gerimus, maximè  
est cauendū. Hoc verò, & cętera omnia incōmoda,

B.ij. & im-

& impedimenta pacis vnico modo euitabimus, atque ad optatum pacis portum perueniemus, si precibus ab humili & contrito corde profectis, ipsum Christi spiritum, qui est pax nostra, inuocauerimus: vt in hoc Concilio præsideat, vt lucem cordibus nostris infundat: vtque nos in omnibus ad ipsius honorem, & veram Ecclesiæ vtilitatem regat, & dirigat. Ad tales enim ipse dicit: Adhuc te loquente, ecce adsum. Quare vt huiusmodi orationibus assidue incumbamus, quanta possumus charitate vos in Domino hortamur, vt vno ore, atque vno spiritu, Deum Patrem in Christo Iesu glorificemus, qui est Deus benedictus in secula. Amen.

Concio Fratris Dominici Soto Sego-  
bien. theologi, ordinis prædicatorum,

*De extremo iudicio, quod Euangelium prima Dominica  
Aduentus, missali Romano legitur, ad Legatos  
& synodum, eadem die Tridenti habitam.*



Oncilium vobis aliud, idémque œcu-  
menicum, diei huius celebritas ob o-  
culos ponit Apostolica sancta lega-  
tio, & qui sub hoc capite Christi cor-  
pus refertis, Cardinalis Tridétine il-  
lustrissime, & reliqua amplissimorum præsulum sa-  
cra Synodus. Concilium iudiciúmque euangelicus  
vobis hodie præco denuntiat, ab hoc longè diuer-  
sum, quod tam anxia nos expectatione animi pen-  
dentes tam diu torquet: sanè quod vt vniuersalius,  
ita, tum maiori rigore cogendum sit, tum etiam  
celebrandum multo celerius. Quippe quò viuo-  
rum omnium, mortuorúmque vniuersitas, non à re-  
motissimis modò terris, sed ex penitissimis etiam  
terræ visceribus, vno dato signo est euocanda, eos-  
démque momento sistenda. Quoniam illic nihil se-  
gnitiæ loci: causatio nulla, quam suæ quis moræ va-  
leat prætexere: nullus quo possit quispiam animû  
dissimulare, efficax color: neu qui nos perterrefa-  
ciant, armorum vlli strepitus: neu qui remorentur  
(ne peius dicam) nouorum hominum cauilli. Ec-  
quid fictitijs in rebus excogitari queat, quod diui-  
næ illi, tremendæque tunc maiestati, vbi conuen-  
tum imperauerit illum, obsistat? Quando equidem  
terra quos mortuos, quasi sequestro apud se depo-  
B. iij. . sitos

sitos receperat, & si corpora etiamnum in cineres  
aurasque iam olim disperierint: eosdē mortuos, vi-  
tæ restitutos, repetenti Christo, summa fide totos  
reddet: & nō secus, ac sistendi vas, ante eius tribu-  
nal suas ipsorū causas dicturos, exhibebit. Et cæli  
stare nescij, sed quibus ingenitum, & suapte natura  
constantissimum est, perpetuis pernicipibusq; latio-  
nibus circūuolui, gradum sistere iussi, parebunt: &  
ante iudicis thronū accersiti, pauidi, atq; suo con-  
tractō iubare pallentes, comparebunt. qui tamen  
sui nullam necesse habēt rationem reddere: vt qui  
sint rationis expertes. neque verò si vel maximè  
tenerētur, habent quod extimescerent: vt qui nul-  
lum imperium recusent: sed quæ sibi. obtigere mu-  
nia, fideli semper cura & diligentia exequantur. at  
quoddā aduersus hominū nequitiam & perfidiam  
testimonium dicturi, id meritò perhorrescent. Heu  
nimiū aspidem obtusis auribus superantes, & qui-  
busuis talpis cæciores, qui stupore plumbū, adamā-  
tæque duritie vincimus: eadem ipsa terribilis Dei  
verba, quæ illo tunc toruo ab ira vultu prolaturus  
est: illa inquā, Audite cæli, & auribus percipe ter-  
ra, quoniam dominus loquutus est: Filios enutriui,  
& exaltaui: ipsi autem spreuerūt me. Væ genti pec-  
catrici, populo graui iniquitate, semini nequam, fi-  
lijs sceleratis. Et quod sub cælorum itidem & ter-  
ræ attestatione alius eiusdem ordinis propheta in  
eandem sententiam confert: Ignis succensus est in  
furore meo, & ardebit vsq; ad inferni nouissima.  
Eadem inquā hæc verba quibus homines rei sūt,  
cæli verò nihil aliud quàm testes citantur, cæli in-  
sensibiles expauescēt: rationales verò homines, vel  
non audis



nō audimus, vel intelligimus: vel certè si audimus  
& intelligimus, nihilo plus tamen eorum sensu af-  
ficimur: sed quàm adamas quatiente malleo, peius  
ea nos excutimus. At ne absq; vlla prorsus distri-  
butionis luce diutius cōfusa diuagetur oratio, tam-  
etsi vereor, vt præ temporis angustia explicare suis  
numeris, atq; exornare nequeam: tria tamen narra-  
bo, aut certè vtcunq; adumbrata ac delineata re-  
linquam. Eram enim dicturus quorum, quando, &  
quomodo sumus extremo illo pertremendo tribu-  
nali rationem reddituri. Atq; primæ expediendæ  
partis inde ex ordine aptissimè rationem petere vi-  
deor, si vnum esse hominem ostendo in hac re-  
rum sensibilibum vniuersitate, à quo factorum ra-  
tio & causa tum exigi possit iure, tum etiam meri-  
tò reddi debeat. Id profectò quod est citra nego-  
tium demonstrare. Nam causam cur quid quis fa-  
ciat, nemo sanè respondere quiuerit, præterquā qui  
rerum causas videt, & consequentia cernit: in sua  
demū potestate habet, res sic, alitèrve efficere. nā  
cui aliter constituere non fuerat liberum: cum hoc  
cur ita fecerit, quid rogo expostules? Est autem in  
rebus (citra Angelos) solus homo ratione, liberq;  
arbitrio præditus. est ergo vnus, qui tum sui, tum  
rerum earum, quæ in suum dominium & vsum ve-  
niunt, rationē sit responsurus. At quidnam rerū esse  
dicā in eius imperio, & ditione? quid? Quantum est  
cumq; nostris subiectū oculis. Quanta sunt videli-  
cet cælorum vastissima corpora, & q̄ intra se multa  
capere possunt, in hominis sunt ditionem cuncta  
reducta. Scripturā de hoc, quā dicat sententiā, cō-  
sulamus. Faciamus (inquit) hominē ad imaginem,

& similitudinem nostram, vt præsit piscibus maris,  
& volatilibus cæli, & bestijs, vniuersæque terræ,  
omníque reptili quod mouetur in terra. Quid est  
autē, Faciamus hominem ad imaginē, & similitu-  
dinem nostram? Nimirū aliquid velut argilla effor-  
memus, quo faciei nostræ specimen, vultúsque lu-  
men nostri exprimamus. Nanq̃ per syluam cæte-  
rarum rerum, nihilo magis auctore cognosceres,  
quàm hominis imaginē per eius tenuē confusum  
que vestigium: vtpote quæ sint, aut viuant proculs  
dubio, ad summū citra mentem, cognoscant. Ergo  
(quæ facies Dei est) mentis insigne, rationisq̃ &  
libertatis splendorem ac dignitatem, nulli rerum  
præter hominē (angelos mittimus) impressit. Quo  
circa (vt ab hoc ipso suggesto aliàs me ad vos di-  
xisse memini) quanuis nihil de rebus Deus nisi  
consilio altissimo constituat: nobis tamen alijs ver-  
bis scriptura cōformationem hominis denarravit,  
quàm rerum aliarū creationem, quo eius inde præ-  
alijs excelsitatē dignosceremus. Nam res aliæ vni-  
uersæ, quippe quæ necessitate, & quasi coactu agun-  
tur, metus non erat, vt à nutu Dei, præscriptisq̃ le-  
gibus deuiare, deflecteréq̃ ratione vlla possent: &  
ideo verbo simplici conditæ sunt. Dixit enim, Fiat  
lux, & facta est lux: dixitq̃, Fiat firmamentum, &  
factū est firmamētū: dixit, Producat terra herbas &  
animantes, & factum est ita. At verò hominem, cui  
sui erat ipsius faciēda potestas, & facultas, vt non  
vi, vti cætera, compulsusq̃, & illata necessitate, sed  
liberè à Deo in bonum promoueretur: vt ante il-  
lum bono & malo, igne & aqua constitutis, manū  
alterutri esset libitū, admoueret: quisq̃ eo esset li-  
bertatis

bertatis donandus ( si tamen libertas hæc est ) vt  
contrà quàm Deus præciperet , faceret ipse dum  
vellet: eundem hominem auderet Deus produce-  
re ( si sic infantibus nobis de infinita illa cuncti-  
potentis sapientia balbutire lalaréq; licet ) nisi ra-  
tione maturius cogitata, & deliberata? minimè gen-  
tium. Ob idque non simpliciter dixit, fiat homo:  
sed antequam faceret, faciamus, inquit. Quod est  
quasi habiti consilij pronuntiata sentētia. Deinde  
non tanquam ex nihilo derepentè, vti cætera, e-  
didit: sed ex luto prius, quasi figulina arte adfabre  
corpus in tam variam organorum pulchritudinem  
efformauit, mox spiraculum vitæ inspirauit in fa-  
ciem. Quid ergo nos isti recentes mortalium de  
libero arbitrio contundunt? quid Dei faciem, ani-  
mis nostris impressam, deterere nobis, expunge-  
re, ac delere moliuntur? dicentes ea nos quando-  
que à Deo necessitate, impetu scilicet & coactu  
moueri, qua cæli vel pecora. Quod si nunquam  
nos adedò cogit, cur meritum nobis adimunt, quod  
assertu illis est necessarium, non modò tempo-  
ralium præmiorum ( quod iam compulsi cœpe-  
runt confiteri ) sed illius etiam quò nos gratia per-  
ducit sempiternæ gloriæ? Siquidem vt nos Deus  
impulsu in bonum præuenit, tamen in nostro ar-  
bitrio positum est, vt à præueniente nos eius gra-  
tia moueri consentiamus. Cuius sumus in iudicio  
causam dicturi, atque adedò vel æterna daturi sup-  
plicia dissensus, vel consensus præmia accepturi  
sempiterna. Sed caueo ne me nunc disputatio  
hæc aliò properantem, surripiat. In diuerticulum  
redeo. Subnectitur continuò loco memorato scri-  
pturæ.

pturæ. Et præsit piscibus maris, &c. Id quod huius  
modi est. In hoc faciamus hominem ad imaginem  
nostrâ: iudicio scilicet & ratione donemus, qui or-  
bi colendo ac moderando sit idoneus atq; aptus, quẽ  
in dominiũ mittamus vniuersi, cuiusq; fidei quan-  
tum rerum extruximus, ceu vitæ seruitia quædam,  
concredamus: nempe vt mundi tandem transcur-  
sa periodo, ad nostrum iudicium accepti rationes af-  
ferat, & expensi: quo rerum per se gestarum, & quæ  
à nobis suscepit beneficiorum subductis rationi-  
bus, constet, perinde illum saltem fide, studio & so-  
lertia in officio erga nos continenter perstitisse,  
atq; fuerit ipse auidè vsus obsequio mundi: atque  
adèd liqueat, vtrum gloriam in nos retulerit: quam  
ei cæli vastissima mole sua, fabrica, ornatu pulchri-  
tudine, ordine utiq; summo, & constantia, enarrare  
non cessant: verbũque intellexerit munificen-  
tissimæ beneficentiæ nostræ, quod ignis, grando,  
nix, glacies iugiter faciunt, vnde laudes nobis &  
gratias debet perpetuas. At cuiusnam alius rei  
extra hunc mundum vniuersum effari ausim, red-  
ditum iri à nobis rationem in die illa? Nam extra  
mundum boni philosophi nil, nisi inane quoddam  
interminum, meditantur. An de cura fortè qua spi-  
ritus in nos Angelici incumbunt, deque vigilantis-  
sima, qua nos protegent, custodia, causam dicturi  
sumus: quemadmodum scilicet ducatum eorum se-  
quuti, eorũq; simus vsi subsidio, immo verò obse-  
quio? Ecquis id ambigat nostrum, qui in diuinis  
hæc quoq; beneficijs ponimus? Sed quid breuissi-  
mam ad dicendum mihi datam horam, in seruitijs  
mundi, Angelorũq; auxilijs recensendis prodigo?

Hæc

Hæc hæc ad vos affero Patres, Ecclesiæ sydera, de  
quibus vobiscum etiamnum Deus rationē inibit in  
die illa iræ. Nempe vt filium suum vnigenitū, quē  
in rem penitus vestram, & propter vestram salutē  
in hoc mūdi miseriarum profundum cælo demisit,  
exceperitis, & tractaueritis. Quomodo fidem eius,  
documenta, leges, consilia, exempla custodiatis.  
Labores pro vobis exhaustos, quas ærumnas pertu-  
lit, acceptas iniurias, contumelias toleratas, quibus  
vos officijs cōpensatis. Sanguinem deniq; pro vo-  
bis, ad mortem vsq; , & in cruce fustum, qua venera-  
tione, religione, obseruātia, ac sanctimonia obser-  
uetis. Ecclesiam suam negotio tanto constructam,  
tam longa, tamque clara, & generosa martyrum a-  
cie cōmunitam, tot Patrum doctrinis, ceu lampas-  
dibus Spiritus sancti illustratam, Ecclesiam vtique  
(vt totum dicamus) qualem diuina bonitas, sapien-  
tia, & potentia ædificauit, qua fide & vigilantia  
seruetis, propugnetis, & excolatis. O inenarrabilē  
Dei aduersus homines charitatem, qui non in id  
nos solum euexit gloriæ fastigium, vt filij Dei no-  
minemur, & simus: sed quo nos in filios adopta-  
ret, naturalem nobis contulit. Sic enim Deus  
(ait ille charitatis æstimandæ prudentissimus)  
dilexit mundum, vt filium suum vnigenitum da-  
ret. Mundum, qui Deum semper odio habuit,  
ita eundem mundum deamauit Deus, vt fili-  
um suum, splendorem gloriæ suæ, & substantiæ  
figuram (nam deitate sibi parem, quin & essen-  
tia eundem) mundi mortalibus tradiderit, quos  
immortalitate donaret. Nam cur non dicam: tra-  
diderit? Cui non maiores honores habuit mun-  
dus,

dus,quàm quem ludibrio, & opprobrio habitum,  
eò demum malorum detruserit,vt cruci latronum  
medium, ceu maledictum quoddam ( liceat cum  
Paulo sic dicere ) affixerit. Quod ille non aliter  
proferre ausus est,quàm testimonio subinde subie-  
cto. Quoniam maledictus homo, qui pependit in  
ligno.Num satis perspectum vobis,quo nos Deus  
negotio filios effecerit? Suo nos semel sanguine in  
cruce genuit: eodem in sacramento quotidie nu-  
trit. An comminisci vnquam cogitastis Patres am-  
plissimi, & omnium prouidentissimi, qua vos ra-  
tione in diuino tribunali de neglecto sanguine  
Christi possitis defendere:quæ vestræ fidei ibi com-  
misit, vbi quas animas cruore suo seruauerat, ea-  
rundem vos animarum in custodia collocauit? Sed  
& de vrbe fortitudinis nostræ Sion (hoc enim nos  
mine Ecclesia est à Prophetis celebrata)cuius vos  
estis sal ac lumina, & ( quod vestrum nomen est )  
speculatores & vigiles, nunquid vobis in mentem  
venit,an geminus cū primis,quem ei Christus cir-  
cumduxit,murus aliqua ex parte sit fortè neglectu  
nostro interruptus, qua vestra eum diligentia vos  
reficere & instaurare debeatis? Geminus inq̃,quo-  
niā ponetur(ait)in ea murus,& antemurale. Quid  
murus & antemurale? Leges & aliæ leges:diuinæ  
leges,quæ sunt firmissima mœnia,atq; sanctissima,  
quib⁹ est Ecclesia circumsepta:& propter diuinas,  
humanæ insuper,in ipsarū propugnaculū adhibite.  
Huc vellem nostri istos insectatores cōuenire:hoc  
cū illis,si & temporis & loci ratio sineret,lubenter  
expostularem: de quo nos ipsi vicissim tam acriter  
compellant. Nō enim (quod nobis calumniantur)

traditio

traditiones hominū diuinis mādatīs antefērimus:  
sed quodd Christus ipse seruator noster tanti leges  
æstimasset suas, tantiq̃ nostra referre perspiceret  
earum custodiam, hominēque sciret varium ani-  
mal, eundēq̃ inconstantium rerum vicissitudini  
subiectum, qui pro temporum adēdō conditione, &  
diuersitate locorum, diuersis legibus opus haberet  
in officio contineri: suā hanc Ecclesiæ prouidentis-  
simæ cōmisit facultatem, vbi pastorem Petrum in-  
stituit, vbi qua missus fuerat à viuente patre, eadē  
potestate Apostolos dimisit, vbi qui vos, inquit, au-  
dit, me audit: & sæpenumero alibi. Hac nimirum  
functi auctoritate sancti Patres, summo studio &  
consilio, assidente Spiritus sancto, qui ex pollicita-  
tione Christi manet nobiscum in æternum, hoc le-  
gem ecclesiasticarum antemurale, veluti vr̃bis po-  
mœrium, euangelio suffecerunt, monachatisq̃, &  
alias saluberrimas cæremonias instituerunt. Quæ  
quanto sint Ecclesiæ robori & præsidio, ipsi isti ea-  
rum hostes documento nobis sunt, & patentissi-  
mo testimonio. Nam postquam ecclesiasticum hoc  
munimen suis opinionum cuniculis subuerterunt,  
qualiter ius ipsum diuinum tali munitione denu-  
datum defenderint, ipsi iudices sunt. Abiecto mo-  
nachatu, hominum ritu, vt quod de sacerdotibus  
diuinum est institutum retinuerint, videant sacra-  
mentalibus subuersis, qua religione sacramenta  
tractent. Breuiter postquam iura humana solo æ-  
quauerunt, qua fide & religione in euangelio per-  
stent, faciat Deus vt ante hanc quam prædicamus  
diem, agnoscant. Quin audenter hoc loco dicam:  
pronuntiare (si audire me pro vestra in Deum fide  
toles



toleratis) nihil contabor, neglectum pontificij iuris (nisi quibus hoc nomen nō facit satis ludibrium mauultis hęc nobis tēpora attulisse) nempe quòd patrū leges sanctissimæ pessum premi fuerint permissæ, id foueā suffodere & aperire cœpit, in quā vestram Ecclesiam coniectam cernitis. Leges namque vt diuinæ, ita & humanæ, si cōsideratè aliquando estimatèq; perpendistis, in hoc penitus positæ sunt, vt per exiguum hunc & angustum bonorum temporalium aceruum, insatiabilis mortalium auiditas in pace & tranquillitate possideret: & ita inter nos constāre posset charitas. Sunt nimirum veluti lineæ & præscripti quidam limites, quibus homines in suo quisque iure, contineantur, aliena ne violent. Augustissimum illud inexhaustūmq; diuinorum bonorum pelagus, sine fundo altissimum, amplissimum extra mensuram, & absq; fine sempiternum, illud est: quod vt non per partes possidetur, ita neque præfinito vllō modo debet adamari, & expeti: sed vt se quisq; auidissimè in eius amorem dimiserit, & effuderit latissimè, ita id omnes pace quietissimi possidebunt maximo gaudio. At verò arctissima hęc & breuissima, vano nomine, bona, ob idque in cōmune possideri nescia, longè aliter. Quoniam nisi his veluti vallo, signis positis intersepirentur: omnibus tunc omnia inuadētibus, cuncta sacra atq; prophana sūsq; déque pertraherent. Perpendite ergo vos consultissimi Patres, quos fideles seruos & prudentes constituit Dominus super familiam suam, & super candelabrū lucernas erexit, & in legum specula posuit custodes, quàm cauere debeatis legibus vestris:

quas

quas hominum (quæ nihil non designat) cupiditas  
prece & pretio arietate non cessat, quo sibi aditus  
impune pateat ad vetita: ne si quæ sunt sanctissi-  
mæ obseratæ, adulterina clauæ aperiat, rei in illa  
die Ecclesiæ vestræ dispensationibus dissipatæ, cau-  
sam tremebundi dicatis. Nam inde ecclesiasticum  
antemurale abiit in maceriam (quæ est sine calce  
& cæmento dissoluti lapides) mox pessundari &  
pro non legibus haberi incipiunt, atq; adeò digni-  
tas ecclesiastica contemptui haberi, continuò mu-  
rus sanctissimus diuinarum legum nutare & vacil-  
lare, confestim charitas languere primùm, post la-  
befactari, spes concidere, postremò euelli fides.  
An putatis aut sine legibus constare charitatem,  
aut sine charitate vel stare spem, vel fidem posse  
viuere? Fundamentum, parietes, & tectum cõtem-  
plamini. Vbi Christus ædificauit Ecclesiam funda-  
mentis fidei subiectis, spem nostram erexit: & quæ  
ædificium contegeret, charitatem supernè exten-  
dit, quæ auctore Paulo, tum præceptorum est finis,  
tum etiã vinculum perfectionis: legibûsq; tum di-  
uinis tum humanis cõstabiliuit, vt bonis omnibus  
gradibûsq; ac dignitatibus pro cuiusq; meritis dis-  
tributis, specimen triumphantis illius, heu, heu, ec-  
clesia hæc militantium exhiberet. Satan ergo arte  
retexendi Christi structuram instructus, à fastigio  
eam cõtrà demoliri orsus, ad ima vsq; deturbat. Au-  
scultemus interim tantisper iudicẽ nostrũ mirifica-  
clemẽtia & lenitate rationẽ de hoc ponentem cum  
seruis suis, ne in die illa stupẽda irati ipsius acerbis-  
simã seueritatẽ extimescamus, Audite (inquit) ha-  
bitatores Ierusalẽ, iudicate inter me & vineã meã.

Viri

Viri videntes (nam id est in nomine significatus) viri perspectissimi, qui omni affectione liberi, integram habetis iudicandi potestatem, sedete iudices inter me & vineam meam. Vineam facta est dilecto meo: Ecclesiam vnigenito meo plantaui. Nam patris hinc verba subaudire videor. Speciosissimam vineam plantauit Deus dilecto suo. Nam ex quincunce cōseuit vites, vt quolibet versus spectaueris, rectissimos ordines conspicias. Et sæpiuileam. AEdificaui turrin (scilicet fidei) in medio eius: & torcular (sacramentorum videlicet) extruxi in ea, quo nectar gratiæ diuinæ exprimitur. Quid est quod debui vltra facere vineæ meæ, & non feci? An quod expectaui quod faceret vuas, & fecit labruscas? Et nunc ostendam vobis quid ego faciam vineæ meæ. Auferam sepem eius, & erit in direptionē: diruam maceriem eius, & erit in conculationem: & ponam eam desertam: non putabitur, & non fodietur: & ascendent super eam vepres & spinæ: & nubibus mandabo ne pluant super eam imbrem. Perscrutamini vos mysteria mystæ sapientissimi: peruia sunt, ipsa se produnt. O quò te is precipitatum, quæ de eius latere promanasti, Ecclesia Christi, sponsa, columba, amica, formosa, speciosa Christi, & his atq; talibus sexcentis epithetis insignitè à diuina sapientia cumulata? Quò te Petri nauicula elisam, diffractam, submersam rapit nostrorum criminum procella? Quid nostræ causæ tandiu indormis Christe seruator noster? Cur Petre magistrum ex profundissimo isto somno excitare nō properas, qui tibi creditæ naui succursum veniat? Immo verò & tu caue vicissim Petre, illam  
iterum

iterum magistri reprehensionem audias : Simon dormis ? quid meæ non inuigilas causæ ? Et nos ipsimet caueamus nobis . Nam quis nos , malum , lethargus , aut veternus mente abalienauit , & nostrimet nos occupauit obliuio ? Attendamus parumper cuius nos admonet euangelium , Conspicite & leuate capita vestra . Animo perspicaciter reputate signa in Sole , Luna , & stellis , quæ æstatẽ redemptionis vestræ appetere iam prænuntiant . Signa (inquam) non illa , quæ in huiusmodi elementis visibiliter apparebunt : quæ scilicet alius euangelistarum exponit , Solis & Lunę tenebras , & stellarum casus , sed quæ sub illis mysterio abdita latent . Hanc enim secundam concionis partem breuissimè perstringam . Nam præterquam quòd (vt Aug. ad Eufichium scribit) non omnia hæc signa pertinent ad finale iudicium , sed quædam ad Hierosolymitanam subuersionẽ : illa quæ ad iudicium attinent , non ita sunt intelligenda , vt sint à Christo tãquam indicia manifesta designata . Enimuero vt nostrũ extremũ diem , cuiusq; suum , ex re nostrã est , vt ignoremus (nẽpe quo hinc certitudine mortis , incertitudine inde tẽporis , vtrinque magis ad bonũ magisq; excitemur , persistamusq; in vigilia cautiore) ita & diei illius præscios nos esse , nihil ad salutẽ nostrã pertinebat . Id quod nos admonitos esse voluit Christus : vbi de die illa neminem nouisse ait , neq; filium hominis : & vbi Apostolorũ minimè interesse pronuntiat , scire tempora & momenta , quæ in patris sunt posita potestate . Etenim cum cælestium secretorum illa ad nos prorsus attulerit Christus , quæ ad nostram nobis salutẽ con-

C.j.      ducunt ,

ducunt, nihil aliud est Christum diem illum igno-  
rasse, quàm non habuisse in mādatis à patre, neq;  
se tanquā redemptorem decere, diem illum reue-  
lare. Quid ergo sibi hoc euāgelio voluit: Cum vi-  
deritis hęc fieri, scitote quoniam propè est regnū  
Dei? Porro (quantum conijcio) nihil aliud, quàm  
quodd vbicunq; prodigiosa aliqua signa & extra cō-  
suetum naturæ ordinem, hęc mundi præcipua ele-  
menta dederint: in mentē nobis & memoriam ve-  
niat illius diei: quoniam sunt omnia, nihil aliud,  
quàm strepitus quidam ruinæ illius magnæ, quam  
nobis mundus cōminatur. Quamobrem perspicien-  
ter Patres & sapienter scrutati sunt mystica quēdā  
eiusmodi signorū sensa: signa scilicet eorū quæ Ec-  
clesia à suis semper vsq; incunabulis, afflictis reb<sup>9</sup>,  
perpeſsa est, finis etiam eius & casus indicia. Quæ  
quantum egomet mecum sæpe & multo animo  
considero, videre non videor, quò ingrauescendo  
ire iam possint deterius, quàm modò sunt in oculis  
nostris: nisi fortè vnde Ecclesiam euertere valeant  
funditus. His nanq; Solis & Lunæ, stellarūq; no-  
minibus, potestates ambas, ecclesiasticam & secu-  
larem, sanctorūq; præterea splendorem subaudi-  
unt mysteriorum periti. Solem autem splendidissi-  
mum, ac fulgentissimum iubar apostolicæ ac per  
inde sanctissimæ sedis, vbi suum Christus Petrum  
cum plena potestate vicarium collocavit, quaque  
eius perpetuò successores ad gubernacula sedere  
constituit, quandonam quæso maiores nostri peius  
tenebrescere conspexere, maioriq; obuolui caligie-  
nes? Legimus porro multorū capita & nomina he-  
reticorum, qui perfidē ab Ecclesia catholica descia-  
uere:

uere:at quando gentium (si vestras fando venit in  
aures) honorificētissimū nomen sanctissimi Papæ,  
vel Turcis fuit adeò inuisum, abiectum, & (si audi-  
re potestis) infame, quàm est quibusdā modò Chri-  
stianis? Adeò vt Christianis è regione Papistas op-  
ponant: Papistas & Antichristos pro synonymis  
ducant. Ita de die iudicij instituebat Thessaloni-  
censes Paulus: nēpe quòd vbi venerit discessio pri-  
mum, mox reuelatus fuerit homo ille peccati, fi-  
lius perditionis, tunc erit finis. Discessionē autē, si  
ad dissolutionem charitatis spectetis, quæ (vt du-  
dum dicebamus) est vinculum perfectionis: quan-  
do timetis maiorem? Si verò ad rebellionē, qua su-  
um in caput coniurant mēbra: quādo parem? Tres  
ecclesias rationibus diuersissimas, nam fidibus (ita  
enim de diuisa fide loqui non vereor) sacramentis,  
etiam capitibus dissectas patimur: quod nullum  
pertulit vnquam Christianorum seculum. Tres in  
partes discerpta est à Christianis incōsutilis Chri-  
sti tunica: quā neq; eius ipsi crucifixo- res discinde-  
re intentarunt. Quin Christum ipsum, qui est apo-  
stolico testimonio indiuisus, in cuius mysterium,  
carnifices etiam illi osā eius infringere abstine-  
runt, in frustra Christiani dilaniant. Quod autem ad  
Antichristū attinet, non est de quo nobis inter nos  
facilius conueniat, quàm quòd est in foribus: nisi  
quòd illi à nobis id mali timent, nos cōtrā ab ipsis.  
De Luna verò, hoc est ciuili potestate, id tantū di-  
cere cogitauī, q̃ bona eius pars suum solē eclipsat,  
tota propemodum (iuxta Ioelis de die illa vatici-  
nium) versa est in sanguinē. Ecquid de sanctissimis  
tandem stellis, diuis inquam, qui tanquam stella à  
C.ij. stella

stella differentes, ita in regno cęlorũ splendent? Quonam loci deciderunt? Est enim in historijs, Vigilantium reclamasse contra sanctorum inuocationes: Almerichum & alios abieciſſe ex templis imagines: quorum sunt omnium errores Concilijs condemnati: id tamen improperij, & contumelię, quod diui in suis delubris sub hoc ętatis accipiunt, nusquam legimus. Nam vt indulgeremus istis imagines depellere: quid tamen excusare possunt, quod eo illas dehonestamento & vituperio persequatur, fœdius quàm demoniorum idola, deturpantes diuorum effigies, confringentes, & in deridiculum concremantes? Nonne si in Regum statuas hæc perpetrassent, rei essent lesę maiestatis? Vos ergo cum videritis hæc fieri, scitote quoniam est propè regnum Dei. Quod si nullus adhuc nos ab his metus subiit appropinquantis casus mundi: tamen quod si hæc serpere latius pergant, nempe, quod si Ecclesiam hinc moribus nostris (qui catholici censemur) syluescere, aliorum inde arietibus concuti permittatis: citius sit iam in capita vestra ruitura, id saltem non potestis non vehementer extimescere. Scire cupitis quàm abest procul Ecclesię ruina? quàm hoc vobis concilium in animos altè infixum fuerit? Si re infecta, terga hinc vertitis, responsum meditādo conficite: quo æquissimo illi, sed acerrimo ac seuerissimo tunc iudici facere possitis satis, vbi neglectę à vobis, desertęque & amissę Ecclesię suę rationem depoposcerit, dum vitam vestram ad sanctissimas suas leges exegerit, dum officia vestra & obsequia cum infinitis beneficijs quę apud vos ad mortem vsq̃ collo-



collocavit , contulerit. O vtinam sic nos interim  
Patres Ecclesiæ lumina vigilanter hîc componamus ,  
dum tempus nos misericordiæ expectat, vt  
non in illa, quæ nos manet, teterrima iustitiæ hora  
arescamus ( quod est in Euangelio ) præ timore &  
expectatione quæ superueniet vniuerso orbi: quã-  
do ( si de postrema quam proposuimus parte au-  
dire etiam non piget ) exercere se ac manifestare  
constituit in forma humana diuina maiestas, Chris-  
tus videlicet Deus homo. cui & collata est omnis  
potestas in cælo & in terra , & datum iudicium  
facere , quia filius hominis est , qui iure humani  
generis redempti & seruati constitutus est iudex  
viuorum & mortuorum. Nam in hoc ( inquit Pau-  
lus ) mortuus est & resurrexit , vt & viuorum &  
mortuorum dominetur : qui humiliando se vsq; ad  
mortē crucis, fecit sibi nomen magnū super omne  
nomen, vt in nomine Iesu celeberrimo omne genu  
flectatur , cælestium , terrestrium , & infernorum.  
His enim maiestatis nominibus, dignitatîsque am-  
plissimis titulis prodibit in iudicium vniuersorum  
iudex, nubibus inuectus, spiritalibus cælorum vir-  
tutibus, thronis, ac dominationibus innixus, coro-  
nis angelorum redimitus, densissimis beatorum or-  
dinibus stipatus. Nec edicto solum ( vt ipso nasci-  
turo fecit imperiosus ille Romanus ) describet vni-  
uersum orbem, sed vno temporis momento quor-  
quot à condito orbe in lucem dati sunt, in suum  
conspectum compulsos dabit. Nam quos dormien-  
tes hîc à somno & torpore mitissima illa vox Pau-  
li, Hora est iā nos de somno surgere, expergefacerere  
nequiuerat, mortuos tunc euangelica tuba è sepul-

chris perterritos excitabit. Quos inter nulla Iudæi  
& Græci, diuitis atq; pauperis, potentis & impos-  
tentis, principis maximi & plebei minimi supere-  
rit differentia: sed cunctis positis personis, quas in  
hac mundi comœdia, alijs natura tribuit, alijs vel  
fortuna obiecit, vel cōparauit industria, alijs verò  
iniquitas fortè, siue fraude, siue audacia adiunxit,  
nullum fiet reliquum interstitium, quàm quòd fi-  
des, & gratia Christi, vel cum ea officia nostra, &  
res gestæ in Christiana ista militia constituerint.  
Recipiet enim vnusquisq; coronam iustitiæ, prout  
gessit in corpore. O abditissima mortalium pecto-  
ra, & quàm est infimū terræ centrum, altius recon-  
dita, tam simulandi artificio fucata & dissimulata,  
falsis externè præstigijs oculos eludentia: ea quæ  
clàm gestatis consilia, quàm sunt illa die palàm in  
oculis omnium exponenda, quàm vniuersis reuelân-  
da patenter! Nempe vt qui vel à nulla sunt cogi-  
tatione de diuina amicitia deiecti, vel quæ semel  
admiserint per pœnitentiam delenda curauerint,  
eorum peccata, gratia Christi contacta, non nisi ad  
gloriam patefcant, illæque tunc sint voce digni:  
Beati quorum remissæ sunt iniquitates, & quorum  
tecta sunt peccata: eorum verò animi, qui Deum  
intima cordis cernētem nō erubescunt, vt eos ma-  
lefactorum aliquando depudeat, ad ignominiam  
tunc retégantur. Ecce effigiem, atque imaginem  
futuræ illius aræ, quò est Christi frumentum con-  
gregandum, vbi aduenerit æstas, quam nobis ho-  
die euangelium comminatur. Ecce spectaculum  
mirificum, alijs quidem teterrimum & acerbissi-  
mum, alijs verò spectatissimum: quando integer  
ille

ille, incorruptus, atque ideo æquissimus iudex certissimo suo, perindeque expauescendo ventilabro suam euentilabit aream : & quæ solida compere-rit, probatæque grana, in horrea illa cælestia con-det, vbi neque ærugo, neque tinea demolitur, ne-que fures effodiunt vt furentur, sed infinitorum est bonorum cumulus, atque adeò sempiterna felici-tas. Paleas verò igne comburet inextinguibili. eos nempe, qui Deum maximum, & immortalem, quàm res inanes & momentaneas minoris æstima-uerunt : qui in tenebras eiec-ti externas, palarum naturam ardendo iuitantes, secula durabunt eter-na. Ergo benignitate vestra Patres illustrissimi, & attentione summa, quæ meam longius quàm in-s-titueram orationem prouexit, diutius abuti cesso, si vos mecum modò exoratos habeo, ne diuitijs nos bonitatis, patientiæ, & longanimitatis Dei abutamur, qui adeò nos tolerâter ad pœnitentiam expectat, vt honoris etiam sui (si ita fas est loqui) prodigus videatur. Nam quòd ita infinita nostra facinora æquanimiter ferat, sunt qui eò dementiæ pro-uant, vt vel aliam esse vitam addubitent, vel qui nostra hæc curet, Deum vllum. Sed gratias ei cum primis immensas habeamus, agamus, & quàm possumus referamus maximas, qui sanctissimo do-mino nostro in animum induxit, cui firmum iam sit & constitutissimum, tertia ab hac dominica Concilium inchoare. De quo & eidem sanctissi-mo nostro gratias debet Ecclesia, qui omnibus posthabitis satanici impedimentis, fixum habeat, amplissimū hoc beneficium in Christianam Rem-publicam conferre. Mox Deum ipsum precatio-  
C. iij. nibus

nibus adeamus supplices , qui non nobis , sed nobis  
mini suo det gloriam : nempe qui non propter  
nos , qui malorum hanc eluuiem commeriti su-  
mus , sed propter gloriam nominis sui , quam tanti  
redemit , Ecclesiam instaurandā curet. Quod enim  
ad nos attinet , nihil sanè verius concinere possu-  
mus , & magis consentaneum , quàm trium illud iu-  
uenum confessionis canticū apud Daniele , quo-  
rum nos fornace peius ardemus : Peccauimus : &  
iniquè egimus recedentes à te , & deliquimus in om-  
nibus , & præcepta tua non audiuius , nec obser-  
uauimus , nec fecimus sicut præceperas nobis , vt  
bene nobis esset. Omnia ergo quæ induxisti super  
nos , & vniuersa quæ fecisti nobis , in vero iudicio  
fecisti. Et nunc non possumus aperire os : confusio  
& opprobrium facti sumus seruis tuis , & his qui co-  
lunt te . Ne quæsumus tradas nos in perpetuum  
propter nomen tuum , & ne dissipēs testamentum  
tuum , neque auferas misericordiam tuam à nobis ,  
quoniam non est in tempore hoc princeps & dux ,  
& propheta : neque holocaustum , neque sacrificium  
neque oblatio , neque incensum , neque locus pri-  
mitiarum coram te , vt possimus inuenire misericor-  
diam tuam , sed in anima contrita & spiritu humi-  
litate suscipiamur.

Finis,

Oratio R. P. D. Cornelij Episcopi Bi-  
tontini , tertia Dominica Aduentus in  
Concilio Tridentino habita.



Audete in Domino Patres, gaudete in Domino fratres, iterum dico gaudete omnes. Ecce enim tempus acceptabile, ecce dies certissimæ, expectatissimæq; salutis, quo non modò homines, quibus natura parens sensum & mentem dedit, sed & ipsa emortua tecta, inanimes agri, montesq; & valles lætari mihi & exultare videntur. Quia aliis quando tandem propter miseriam inopum, & gemitum pauperum excitatus est Dominus, vt quæ nobis interitum heri & nudiustertius minabantur, dum is vel dormire, vel longius ire mysterio non dolo simularet, eo vigilante cuncta illius supercilio hodie paueant & palleant: silescant irata maria, recludatur in thesauros suos venti, deniq; funesta omnia abeant, festa omnia redeant.

Tibi laus, tibi gloria, tibi gratiarum actio Iesu Christe fons misericordiarum, per quæ iam oculis nostris videmus, & manibus nostris tangimus beatam illam spem, quæ ante nos multi videre voluerunt, nec potuerunt, à longè portum (nauigantium more) salutantes, non apprehendentes promissionem, ne sine nobis consummarentur.

Vos adeste mihi animis omnes, vt adestis corporibus, & Spiritum sanctum terribiles has castrorum nostrorum acies habitantem, sanctum hunc cœtū intuentem & iuantem, Concilij authorem & adiutorem,

iutorem, Ecclesiæ præsidē & obsidē, opportunis im-  
portunisq; pulsate precibus, vt labia mea aperiat,  
vt aures vestras expurget, vt ipsi tranquillis mētibus  
intēdatis, vt ipse habeā verba paria sanctæ rei.

Hanc verò orationē sanè meam, postquam ego  
huius causæ patronus nō tam electus sum ex omni-  
bus quàm relictus, vt qui vnus ob summam ve-  
stram omnium auctoritatem atque amplitudinem  
in concionem ascēdens nullo periculo dicere pos-  
sum, vnde vel aptius, vel felicius auspicari queam,  
quàm à sacrosancta huius Cōcilij necessitate? quæ  
profectò tanta est, vt omnium hominum animos  
(si qua in Christum fides, si qua viscera pietatis)  
inflammare maximè possit, & debeat.

Nam post Concilium illud amabile, cuius etiam  
sola memoria recreamur, quo lætante cælo, & ex-  
ultante terra, Florentia aridum orbem florere fe-  
cit, medium parietem maceriæ soluens, & duos po-  
pulos condens in vnum, non quinq; , non septem,  
neq; decem, quod constantissima Constantia con-  
suluerat: sed si vltimū Lateranense subduxeris, cen-  
tum ferè annis, proh dolor, quibus & domi & foris,  
& telis & facibus obsessa Ecclesia, vexata cōtume-  
lijs, iactata iniurijs, sollicita suspitione, suspensa  
metu, dira & dura perpeffa est: longo Concilij de-  
siderio fatigata velut dolores parturientis habens,  
quæ cruciatur, vt pariat: clamans, Ini Concilium,  
imò coge Concilium: concilio destituta penè lan-  
guit, exaruit, defecit, ed calamitatis & miserię pro-  
lapfa, vt nisi esset seruata diuinitus, frustra modò  
pro illius salute conuentus hic sacratissimus habe-  
retur. Iam enim libertas, pax, tranquillitas, iura,  
leges,

legēs, fortuna, opes, honor, imperiū deniq; ipsum, agri, vrbes, mœnia, ædes, tecta, sedes, aræ, omnia quibus spiritū vitāmq; ducimus, amissa essent, velut quæ cū religione ita implicita esse & cohærere videntur, vt non possit illa ruere, quin eodem debilitata motu omnia concidant. nō enim Asiaticis opibus Patres, non potētia Persarū, nō Hispanorū bellicosissima illa multitudo, nō infraētis viribus Gallorum, Græcorū artibus & technis, nō calliditate Pœnorum, non Germanorum constantia, non Italorum armis atq; ingenio, vna religione & pietate hæc omnia nata sunt, aucta & retenta.

Et cur quæso putatis omnis ordinis viri prudentissimi, magnam hanc angelorū frequentiam, luminaria hæc ecclesiarum, tot inquā Episcopos, Magistros populorū, Patres omnium, ministros Christi, Christos domini, ora & oracula Dei, tā multis terrarum mariūmq; difficultatibus superatis, relictis etiā gregibus, quos anima chariores habere oportuit, exiisse de terra sua & de cognatione sua, vt alienas casulas magni hospites implerent, nisi quia vicit iter durum pietas? Nam sancta eorū pectora imminens Ecclesiæ totius excidium coegit, vt crudele & nefarium existimarent, horrificum hoc bellum, quod omni imbutū odio ac parietibus & tectis ac columnis & postibus & ipsis etiam fundamentis nostris illatū est, spectare, tangere, experiri, nec interim inito Concilio opponere se murum pro Israel: quādo nō ita pupilla oculi tegitur coeuntibus cilijs, vt defenditur Ecclesia sancta Concilijs. Neq; enim ob aliud magno huic corpori Deus varias multiplicēsq; gratias, vt & mēbra distribuit, nisi vt  
quod



quod in singulis dispersa virtus nõ potest, in omnibus inuicta vnitas efficiat: quemadmodum & ipsa natura manus nobis geminas geminósque oculos, pedes item geminos ideo dedisse videtur, vt quasi collecto Concilio paruus hic mundus sese iuuare, & tueri possit. nam manus manum lauat, pes pedē sustentat, sinistra fulciuntur dextris, sinistrísque dextra leuantur.

Et quis nesciat res arduas atq; difficiles quæ ad vnā sanctā Catholicā ac apostolicā pertinent Ecclesiam, in Concilio & cœtu Patrum, vbi suo quisque loco sententiam dicit, tractari prudētius, maturius diffiniri, probari solēnius, & gratius à cunctis populis acceptari? Neq; enim temere dictum est: Multitudo sapientum sanitas orbis: ibi salus vbi multa consilia. Sanè neq; Moses leges tulit ante initum synagogæ Concilium, neq; sanguinē fœderis resperxit nisi in Concilio, neque Apostoli Matthiam, aut septem Diacones elegerunt extra Concilium, neque prima illa iuris Ecclesiastici decreta ediderunt nisi in Concilio: in Concilio inquā illo quod nascentem in gentibus Ecclesiam, ne vel abortum patiēdo vel suffocationem interiret, apud Hierosolymam liberauit. Et vbi Apostolicum symbolum angustum verbis non angustum sacramentis est explicatum latius, atque defensum, quā in quatuor illis Concilijs Niceno, Ephesino, Constantinopolitano, Chalcedonensi? Scripturæ sanctæ Canonice vbi delectæ sunt, nisi in Concilio Laodiceno, & Carthaginensi? Hæretici vbi reuicti sunt, vbi damnatæ hæreses, ligatæque in fasciculos ad comburendum, nisi in Concilio  
apud

apud Lateranum, apud Constantiam, apud Antiochiam, apud Viennam? Mores tum populi, tū Principum, ac Sacerdotū, quando emendati in melius, præterquam in Concilijs Gregorij vij. Alexandri iij. Urbani vj? Vnio dissidentium nationum vbi coaluit vnquā felicius, quàm in cōcilio Lateranensi & Florentino? Turcæ rabies, quam vnquam Christianorum potentiam, atque animum ita sensit, vt in Lateranensi illo Concilio, vbi trecenta hominū milia ad reparandum Hierosolymam inuictæ Crucis signum susceperunt? Sed & Christiani Principes diu in Ecclesiasticam potestatem tyrannico furore surrexerunt, cui flectere genua, & caput summittere debuerāt. Nonne sacris Concilijs sunt depositi, percussi anathemate, pulsi regno, atque imperio? vt Ladislaus, Leo. iij. Henri. iij. Federicus. iij. Constantinus. vj. Quin ipsa schismata, quibus maximè frangitur & euertitur Ecclesia Christi, nō sedantur vnquam facilius, quàm Concilio. quod vetera exēpla docent Symmachi, Benedicti, ac Gregorij. An non etiam conciliabula, ac malorum omnium conuenticula, colloquia mala, quæ corrumpunt bonos mores, dissoluuntur sacris ac legitimis Concilijs? vt latrocinium illud Ephesinum secundum, Ariminense, Pisanum, Mediolanense. Porro summorum Pontificum gloria, quæ nunquam non blasphematur ab impijs, Conciliorū virtute emergit clarior semper, atque illustrior. quod in summa patuit in Xysto, in Marcellino, in Leone. O certè magna Conciliorum virtus. Hinc & poetæ concilia Deorum inducunt: & apud Mosē dum hominem, mūdī miraculum, ex terra fingit Deus omnipotens

potens, quem indiuiduè partitum, diuiduèque coniunctum ipso etiam supernaturalis historiæ vestibulo docuerat, est vox illa penè conciliaris: Faciamus hominè ad imaginem, & similitudinem nostram. Altera quoq; ad magnos illos gigantum ausus resprimendos: Venite, cōfundamus linguam eorū, vt non audiat vnusquisque vocem proximi sui.

Enimuero Patres, vt præsentem rerum statum compendio perstringā (nam Laconis mihi partes reliquistis, cum Oratoris ademistis) cū nostra religio tribus quasi capitibus constet: doctrina fidei, qua vt pane cælesti viuimus, & saginamur: sacramentis, quorum secreta sacræque virtute Deo conciliamur in gratiam: charitate, qua vt nota præcipua Christus agnosci suos voluit à cæteris: quæ illud est fidei, quod lux coloribus: id sacramentis, quod sanitas medicinæ: quid istis temporibus exposcit doctrina catholica, nisi Concilium? quid postulant sacramenta, nisi Concilium? quid cōmunis charitas quærit, nisi Concilium? Deum immortalē, quàm superbè contentiosis nostris concertationibus, quibus iam subuersus est orbis, præclara illa antiqua fidei nostræ monumenta vexantur! quàm peruersè Dei verbum vel posthabetur, vel mutilatur, vel torquetur, vel inuertitur! q̃ temerè etiam interdū à nobis, vt nō nihil scire videamur, vnanimis ille omnium seculorum consensus nihilipenditur! quàm ingratè inter viscera nostra, ne Græcos commemorem, sancta illa Romana Ecclesia omnium quæ sub cælo sunt Ecclesiarū nutrix, mater, & magistra, atque veræ doctrinæ Christianæ lapis Lydius, despicitur, reprobatur! & iam sumus  
tanquam

tanquam paruuli ipsi, qui circumferuntur omni ven-  
to: vt solidius sibi constet Iudæus, q̃ Christianus.  
Tacebône, quàm viluerit inter Christianos felix  
illa baptismatis renascētia, admirabile Eucharistiæ  
sacramētum, maiestas sacerdotij visibilis, omnium  
ecclesiasticorum ordinum firmamenta certissima,  
& maxima? An non & periit feruēs ille & in alter-  
utrum, & in Remp. amor, quo olim Christiani o-  
mnes, ô dulce & charum nomen, fratres vocaban-  
tur: & impletū est Pauli Apostoli vaticiniū: Erunt  
homines seipsos amantes! Profectò nisi periisset,  
non à sanctis illis moribus, nō ab honestis illis in-  
stitutis, quæ obseruata Remp. nostram felicissimè  
semper auxerūt, esset iam vbique modis omnibus  
degeneratum. Quibus enim turpitudinū monstris,  
qua sordium colluie, qua peste non sunt fœdati,  
non corrupti in Ecclesia sancta Dei, & populus, &  
sacerdos? In vestro iudicio causam repono Patres,  
& à sanctuario Dei incipite, si vllus iam pudor, si  
vlla pudicitia, si vlla supererat bene viuendi vel  
spes, vel ratio: si non libido effrenata & indomita,  
si non audacia singularis, si non scelus incredibile.  
Heu quomodo obscuratum erat aurum, quomodo  
mutatus color optimus! Nam duæ illę sanguisugę.  
quæ semper dicunt, affer, affer: altera mater, altera  
nutrix malorum omnium, cupiditas inquam, & am-  
bitio, vtraque subtile malum, vtraque secretum vi-  
rus, pestis, & monstrum orbis: dum ab ijs, quos tan-  
quam viuas & animatas leges sequi oportuerat,  
virtus ac doctrina negliguntur: vitium, & igno-  
rantia earum loco summis extolluntur honoribus:  
effecerunt tādē, vt ædificatio in destructionem,  
exem.

exemplum in scandalum, mos in corruptelam, custodia legum in contemptum, seueritas in relaxationem, misericordia in impunitatem, pietas in fuscum & hypocrisim, prædicatio in cōtentionem & gestum, in turpissimum mercatum, graue hoc est, (vt vno verbo dicam) vitæ odor in mortis odorē infelicissimè commigrauerit. Quid mirum, si inde & dispersæ sunt oues, & errauerunt in cūctis montibus, & agris: & potētiores quidem ab authoritate in dominium, à dominio in tyrānidem, à iure in iniuriam, à sceptro in virgam ferream, à Dei cultu ad impietatem, à tutela Ecclesiæ ad internitionē, à modo ad libidinē, à ratione ad nutum, à tributis ad importabilia onera, à pace ad bella crudelia, à simplicitate ad dolos, à prudētia ad malitiā, à liberalitate ad luxum, à parsimonia ad auaritiā, ab ornatu ad pompam, ab obedientia ad apertam rebellionem conuersa sunt? Vtinam non à religione ad superstitionem, à fide ad infidelitatē, à Christo ad Antichristum, quin à Deo ad Epicurum vel ad Pythagoram, velut prorsus vnanimes declinassent, dicentes in corde impio, & in ore impudico: Non est Deus. Neque iandiu fuit pastor qui requireret, Patres: non fuit inquam qui requireret: quia omnes quæ sua sunt, quærebant: quæ Iesu Christi, ne vnus quidem.

Hinc illis aliud agentibus, & in vtrāque aurem dormientibus, quos greges pascebant, non pascebantur greges ab eis: Nam paruuli petierunt panē, & nō erat qui illis frangeret: serpebat in orbe infinitum malum, crescebat in medullis ac visceribus nostris, & in dies manabat latius, vt non modò

orna

ornamenta, dignitates, præsidia stabilitatis & liber  
tatis nostræ quandoque amitteremus, sed cum de  
decore & ignominia, quod miserrimum, & turpissi  
mum est, seruiremus. Nam ceruicibus nostris immi  
nebant Turcæ: neq; Austriæ modò, & Germaniæ,  
sed Italiæ, sed Vrbi, sed Orbi pernicië moliebant  
tur, & ferrum flammamque: imminentes furebant  
audacia, scelus anhelabant, superbi victorijs, elati  
triumphis, ditati spolijs Christianorum, nō cresce  
bant suis viribus, crescebant nostris corruptis mo  
ribus: non tam erant hostes, quàm flagellum Dei:  
armis eorum impugnabamur, sed peccatis nostris  
expugnabamur: agebāt illi sua feritate, sed nos pa  
tiebamur nostra iniquitate. Vtinā vel ipsi soli passi  
fuissēmus, neque interim sanctum illud admirabi  
le nomen Christi Iesu, amandum Angelis, tremen  
dum dæmonibus, mortalibus adorandum, propter  
nos, quorum desidia & flagitiū in omnem iam ora  
bem fœdissimo rumore penetrauit, iocus fuisset &  
fabula perfidis Iudæis ac gētibus. Nemo vestrum  
mihi quæso succenseat Patres & fratres. Memen  
tote quoniā meliora sunt vulnera diligentis, quàm  
fraudulenta oscula odientis.

Itaq; ne, cuius amplitudinem & gloriam exten  
dere animus erat, illius incolumitatem & salutem  
deferere videretur, Sanctissimus ille non tam æta  
te, quàm prudentia senex P A V L V S I I I. primæ  
sedis & catholicæ & vniuersalis Episcopus, post o  
mnium hominum memoriam & fortissimus & opti  
mus Pontifex, quē omnium gentium linguæ cele  
brabunt, nullāque vnquam ætas de eius laudibus  
conticescet, oprime intelligens se non sibi, sed nos  
D.j. bis,

bis, in tantis periculis , in tam grandæua ætate, in  
tam duris itineribus, in tam magnis angustiis fuis-  
se magno miraculo reſeruatum: cuius ſapientia, fi-  
de, poteſtate, è tantis malis erepti, Deo quãdoque  
ſine timore ſeruiremus: non nunc primùm , ſed ab  
ea die qua concuſſa in ſinum illius noſtra confugit  
Reſp. vt teſtaretur illum ſummo hoc pontificatu  
beare nos potius, quàm beari, maiora beneficia da-  
re quàm accipere: vt doctrinæ antiquæ ſinceritatẽ  
colligeret, & ſacramētis priſtinam maiestatẽ reſti-  
tueret: vt collapſos mores Eccleſiaſticorũ, Regũ,  
Principum, & plebium reuocaret ad normam veræ  
pietatis & diſciplinæ: ne fortè propter malos pi-  
ſces alicubi retia rumperentur: vt à quibus intus  
& foris oppugnamur, illos per reliquias bonorum  
virorũ placaret: hos per Dei potentiã reprimeret,  
hoc eſt, vt iam cadentem Remp. noſtram cõfirma-  
ret, vt afflictam erigeret, vt perditam recrearet, &  
liberaret conflagrantem & penè exuſtam: conſen-  
ſiente & fauente Cæſare magno quodam & nouo  
Constantino Auguſto, & omnibus Romanorũ Im-  
peratoribus meliore ac feliciore: iam iam inquam  
dum ab eo domitæ Aphricæ Cæſar ſuper alta Vr-  
bis Capitolia altior ipſe triũphos reportaret: pro-  
bātibus ſummis Francorum, Romanorũque Re-  
gibus, vt ſanguine ſic fide & pietate germanis, Frã-  
ciſco Chriſtianiſſimo, cuius gloria nõ paucioribus  
quàm Solis ſplendor regionibus & terminis con-  
tinetur, Ferdinãdo qui aduerſus perpetuos Chriſti  
hoſtes armis & animo inuicto murus ſemper fuit  
& antemurale: hortante pio Portugalliæ Rege, cu-  
ius ſancto nomini, ne hic ſatis eſſe videretur, à Deo  
datus



datus est nouus orbis : annuentibus demum , ac  
rogantibus omnibus catholicis Principibus, stati-  
bus, ordinibus, maximo animo, fide sincera, cōstan-  
tia singulari, quæ nobis gloriam, animis lætitiā,  
hostibus dolorem afferret & gemitum: quasi ad sa-  
cram anchorā, quasi ad portū salutis, quasi ad asy-  
lum , ad domum refugij, ad arcem munitissimā  
vnde Reip. nostræ mille propugnacula pendent,  
ad Sacrosanctum œcumenicum Concilium, quod  
collapsæ Ecclesiæ semper fuit & est spes vnica, mo-  
re maiorum confugiendum esse, & prouidit & de-  
liberauit: nullam existimans tam morbosā, nullā  
tam vagā, nullā tam perditā & errantem o-  
uem, quam bonus pastor non sanare, non reducere,  
non requirere cupierit. Quæ tam immemor poste-  
ritas erit, quæ tam ingrata historia reperietur, quæ  
huius rei gloriam , qua nulla vnquam gesta est vel  
maior vel gloriosior, non immortalitatis memoria  
prosequatur ? Audiantur hīc Patres inter vos vo-  
ces illæ, quæ apud Chalcedona olim audiebantur:  
Viuat P A V L V S Sanctissimus, œcumenicus, apo-  
stolicus. En nostis Niceam, nostis Luccam, Bussē-  
tum, nostis nemora, flumina, maria, quanta fecit,  
quanta tulit, & patria & virtute verè Romanus  
P A V L V S I I I. vt congregaret filios suos, quem-  
admodum gallina congregat pullos suos sub alas.  
Et quis hominum est tam ignarus, tam in Repub.  
rudis, tam nihil inquam nec de sua, nec de com-  
muni salute cogitans , qui nesciat vt primū per  
bellorum incendia & tumultus licuit, spe inducia-  
rum concepta inter orbis monarchas, Mantuæ  
primū, deinde Vincentiæ, & iam altera vice

D.ij.

Tri

Tridenti, quod diplomata, quod cælum & terra testantur, ab optimo hoc Reipub. nostræ parente & quasi deo, indictum fuisse orbi generale Concilium?

Quumprimum igitur data est de cælis pax aurea atque augusta, quam longius fugientem hic cælo dignus pontifex in spem contra spem sequebatur & persequabatur: sancta Synodus cōstanti semper retenta animo, translata magna ratione, dilata dura necessitate, iam quarta vice superiori anno indicitur, & tandem aliquando tot antea actis mensibus congregatur: & hac ipsa die omine omnium felicissimo dum Luna tenebras vertit in lucem: & quia Dominus propè est, decrescūt noctes, crescūt dies: his ducibus atque suo ipsius Sedis Apostolicæ nomine auctoribus, quos in hac sancta corona eminere vides noua Hierusalem, Ioanne Maria de Monte, cuius sursum & oculi & corda ad mōtem, qui Christus est, vnde veniat auxilium nobis, perpetuò diriguntur: Marcello Politiano, qui iandudum ad vnam Christianæ politiæ emendationem, cuius labefactati mores hostibus nostris aditum præbuerunt: graues illas adiecit feueri animi cogitationes: Reginaldo Polo non tam Anglo, quàm Angelo: id ipsum generale Concilium legitimè indictum, legitimè congregatū, Spiritu sancto aspirate ingredimur, aggredimur: nō in latibulis Græciæ, non angulis Aphricæ, nō in desertis Arabiæ, non in finibus terræ: sed in amplissimis foribus potentissimæ & semper augustæ Germaniæ: quæ vt virtute bellica & hominum numero, sic religione & constantia fidei cæteris nationibus præstans clarissimis

rissimis facinoribus, quæ nec deleri obliuione, nec æternitate obscurari poterunt: sanè isto Christiani orbis imperio à Romanis Pontificibus tot antea seculis meritò donata est.

Iam quis nolit in huius Concilij societate, velut in equū Troianum obside vltima ista Tridentina vrbe cum principibus Imperij & religionis includi? Adiuro vos Tridentini saltus per capreas ceruoscq; camporum, antequam aspiret dies, & inclinentur vmbra, resonate per concaua montium ad extrema terræ, & à solis ortu ad occasum, ab Aquilone ad Meridiem, cognoscant tēpus visitationis suæ, & se Concilio cōciliari. Quis erit tam iniustus rerum æstimator, qui non dicat, Papa lux venit in mundum? sic dilexerūt homines magis tenebras, quàm lucem. Omnis qui malè agit, odit lucē: & nō venit ad lucem, vt non arguātur opera eius, quia mala sunt. Quanquā nō vult Cōcilium vlisci fratres: vult tolerare. nō venit mactare, venit saluare: emēdare omnes cupit, nō delere: nō erit rigiditati locus: si abūdauit delictū, superabūdabit & gratia. Heu cur nō ades inuictissime Cæsar Conciliorum protector, defensor fidei, propugnator Ecclesiæ, qui tot regna, fortunas, populos, vitam deniq; ipsam terra mariq; pro Christo tuo in discrimine obtulisti. Adesse saltem tu Didace, & longo rerū vsu & ingenti fortunæ varietate prudentissime. Quanq̃ enim diuino illo iudicio suo in alijs rebus vtatur Cæsar, elegit te tamē vt illius personā sustineres: magna certè in te fides, & graue tuę spectatæ virtutis testimoniū: sed solo tuo nomine ac opinione Tridentinum Concilium promouere potes:

D. iij. nec

nec enim tibi vel prudentia deest, vel auctoritas,  
vel felicitas. Ab Oriente adduc semē Christi Iesu,  
ab Occidēte congrega reliquias: dic Aquiloni &  
Austro, noli prohibere. piscatores sunt hominū Pa-  
tres Concilij, piscabuntur eos de aquis multis: ve-  
natores sunt, venabuntur ad vitam, nō ad mortē:  
pastores sunt, animā suam ponent pro ouibus Do-  
mini: & siquam inuenerint aberrantem, imponent  
super humeros suos, & conuocatis amicis dicent:  
Cōgratulamini, quia inuenimus ouē quæ perierat.  
debitores sunt vt rationem reddant poscentibus  
de ea quæ in eis est fide ac spe. Idem satisfaciē-  
tibus. Non dicent, hæc dicitis, hæc dicimus: dicēt,  
hæc dicit Dominus: Rationi, quam indidit: verbo,  
quod docuit: auctoritati Ecclesiæ, quam tradidit.  
Quis sobrius rationi, quis catholicus scripturæ, quis  
pacificus non cedat Ecclesiæ? Aperiātur iam por-  
tæ vrbs tuæ magnanime Princeps: die ac nocte  
non claudantur: sic consurgent tibi montes & col-  
les, valles, turres, & occupabit salus muros tuos, &  
portas tuas laudatio: & vocabunt omnes gētes ci-  
uitatem tuam ciuitatem domini Sion sancti Israel:  
& ponetur in superbiam seculorum, vt & gētes &  
reges ambulent in lumine splēdoris tui: & magno  
illi tuo nomini, quod iam per omnes oras longē  
latēque vagatur, & domicilium certum nō habet,  
perpetuis gratulationibus plaudāt & Alemāni po-  
puli. O dilecte Deo & hominibus Madruçi, in cu-  
ius vnus ditione vos olim vagē desertos & tur-  
bulentis erroribus implicitos incomparabilis ille  
P A V L V S I I I. diuina mente & consilio prædi-  
tus,

tus, Ecclesiæ memor, sui oblitus, per Spiritum sanctum ad viam veritatis reuocauit.

Ad vos modò Patres à quibus & exorta est, mea redit oratio, non vt vos admoneam, vel excitem, qui mihi studio & feruore longè præcurritis : sed ne mea vox sacerdotis officio defuisse videatur. Venimus, vidimus, vicimus Patres : & eum aditū quē humani generis hostis summis quibus potuit conatibus mensibus & annis superioribus obstruxit, Deo fauēte reserauimus. Quanta est hæc gloria, quanta dignitas, quātus honor? Quid enim putamus sit aperire fores Concilij, nisi aperire fores cæli? vt effundat super nos thesaurū illum optimū fontem aquæ viuæ splendidum tanq̃ crystallum procedentem de sede Dei & agni: vt simus ipsi in primis Dei docibiles, deinde per nos repleatur terra scientia domini velut aqua maris operiētis. Cauēdum est igitur, ne dum ad nos curādos Dei munere aperitur cælū, nostra iniquitate claudatur terra: nec viuidos illos solius velleris imbres area infelix excipere possit. Aperiatur, aperiatur terra cordis nostri Patres: & si hactenus oppilati fuimus fumo & sulfure illius magnæ fornacis & putei abyssi, iam exhalare incipiamus : & dilatatis venis tanquā sitientes glebæ, atq; arida arua scindamur planctu, fletu, orationibus, ieiunijs, eleemosynis, lachrymis: plorātes inter vestibulū & altare, velut indigni qui accedamus ad aras, postquā omne malum prodire de tēplo vetus querela est. Nolite errare Patres, Deus nō irridetur, neq; patitur irrisores: sed qui habitat in cælis, irridebit eos. Spiritui sancto hodie sacra decreuistis: felix principium ac

D.iiij. mul,

multarū frugum multa principia. Sed ô q̃ bonum  
erat nobis, si mali nō fuissetis! Si pietatem ac sin-  
ceritatem de cordibus nostris eijcientes, vel ficti  
vel immundi, sanctum Cōcilium, cuius vel solo no-  
mine in tam magnā expectationem excitatus est  
totus orbis, auspicati nō fuerimus: ora quidem &  
labia Spiritus sanctus aperiet, vt os Caiphæ, vt os  
Balaam, ne errantē Concilio Ecclesiam solā errare  
contingat: pro qua rogauit Christus exauditus pro  
sua reuerentia: & malas mentes replebit spiritus  
nequā missus à Domino, vt fiant nouissima nostra  
peiora prioribus: & demū insultent nobis inimici  
nostri, Nunc stent si possunt concilia vestra: & ipse  
Deus ait: Væh vobis profundi corde, qui inistis cō-  
cilium, & non ex me: orditi estis telam, & non per  
spiritum meum: an non legistis, Simeon & Leui  
fratres vasa iniquitatis bellantia, in concilium eo-  
rum non veniat anima mea? Et quæ sequuntur.

Nihil in vobis sibi vendicet odium Patres, nihil  
faucor vsurpet, nihil præmium euertat, nihil corrū-  
pat munerum vel personæ acceptio: nihil possit ti-  
mor vel amor potētū: absint colligationes impie-  
tatis, consilia vanitatis, supercilia contētionis, con-  
uenticula malignantiū. Cāuete de lætitia iniquo-  
rum: & sine cæde, sine sanguine, sine excidio temp-  
nostram ab ijs oppressam, ab illis desertā, à multis  
proditam liberabitis. Vobis præsidia Ecclesiæ nō  
desunt: vos ne deesse Ecclesiæ videamini, prouide-  
te. Volūtates vestræ igne illo ardeāt diuinæ chari-  
tatis, quā Christus venit mittere in terrā. Intelle-  
ctus vestri scrutētur quid sit optimū in primis pro  
Ecclesia, tū quid expediat, quid deceat, quid liceat.

Iraſcendi

Irascendi vis, scelerū nō hominū odio, pio, salubri,  
diuinōq; feruore excandescat: & zelus domus do-  
mini, quæ nisi noua hæc lux Dei optimi maximi, &  
qui potestate proximè ad Deū accedit, **PAVLI III.**  
prouidētia oblata fuisset, iam ad interitū verteba-  
tur, illam nō comedat modò, sed deuoret. Potestas  
cōcupiscibilis sanctis desiderijs accēsa, & perfusa  
spiritali gaudio, vnā illā pacē quæ exuperat omnē  
sensum, & desideret & suspiret. Dirigite pedes ve-  
stros in viā pacis huius: meditamini in lege domi-  
ni die ac nocte: sanctificamini intus & foris, verita-  
tē diligite: agite vt sitis opere quàm sermone potē-  
tiores: nihil præcipitāter, nihil præposterè, imò ma-  
turè omnia & suo ordine fiant. nolite sapere plusq;  
oportet, sed modestia vestra nota sit omnibus ho-  
minibus. sobrietatē sapite: de crastino nihil solliciti  
sitis. descendet super vos & requiescet spiritus do-  
mini, vt ex altis his subsellijs iudicātes orbē, quasi  
obediente Deo votis hominū, quod nulli vnq; tri-  
bunali cōcessum est, dignè dicere valeatis, Visum  
est Spiritui sancto & nobis. O vox, ô tuba, ô toni-  
tru, ad cuius sonitū retrorsum cadēt inimici Chris-  
ti, cuius iussa vel decreta neq; summis patribus cō-  
temnere aut detrectare licebit. Vos enim omnib;  
Patres qui sacrosanctæ huic œcumenicę synodo re-  
bellātes eò insolētiori furore processerint, vt Pauli  
Tertij, Caroli Quinti, Frācischi Primi (illū caput ha-  
bet post Christū hæc Tridētina synodus, hos verò  
dexterā & sinistram) iustam irā atq; indignationē  
quādoq; mereantur, non inaccessibleia mōtium iuga,  
neq; vastæ paludes, neq; mariū sinus aut fluuij im-  
mensi eos tueri poterūt, aquilis velociores, ac leo-  
nibus



nibus fortiores hostes Cōcilij, rebelles Spiritus sancti, qui illud est Cōcilio, quod anima corpori, persequetur & apprehēdent, & cōculcabūt donec deficiāt. Eia igitur Grēcia mater nostra, cui id totū debet quod habet Latina Ecclesia: Eia Hispania, cuius si nō propagatā, at cōseruatā catholicę religionis perpetua gratulatio etiā à tuis hostibus decreta erit: Eia Gallia, cuius Christianissimū nomē nec augeri potest meis laudib⁹, nec cuiusq̃ vituperatione decrescere: Eia Germania, quę & gladiū nūc & imperiū & sceptrum habes, quę acerrimos heresis & oīs infidelitatis hostes semper protulisti: Eia Italia, quę eo magis in tātis rerū turbinibus sanctę Ecclesię debes, quę vt Germania rerū potitur, sic tu illo ipsius Petri folio tāta gloria cęteris nationibus pręstas & antecellis: Eia oēs quotquot sub cælo estis, qui Christiano nomine cēsemini, quos expetiuit satanas vt cribraret sicut triticū: Rogat, obsecrat, deprecatur cū sacrosancto Cōcilio PAVLVS III. sui oblitus, vestri memor: venite, agnoscite, uiuite, nolite perire, recōciliamini: omnia parata sūt, venite ad nuptias. si qui verò intrare erubescāt, vos qui potentiores estis, intrare compellite: ne quandoq̃ eis dicatur, Clausa est ianua, nescio vos, discedite. O Christe, omnes isti cōgregati sunt, venerūt tibi, tibi inq̃, nō sibi: tu aspirādo pręuenisti, adiuvando prosequere: & intercedēte beato Vigilio Tridētinę vallis tutelari, Tridētinū Cōciliū ita foue, vt omnis eius actio, quę hodie feliciter cœpta est, per te quoq̃ & in tēpore opportuno felicissimē firmetur. Dixi. Vos nūc plaudite in Cōcilio iustorum & cōgregatione magna opera Domini.

Oratio

Oratio ad Patres in Concilio Tridentino habita à R. P. Fratре Antonio Marinario Carmelitano, quarta dominica Aduentus.



Um appeteret tempus illud æterno consilio præfinitum, Reuerendiss. Patres, vósque obseruandi Ecclesiarum Præsules, vt Christus humanæ salutis negotium aggrediretur: post tot præclara de eo testimonia, nimirum totius legis, omnium Prophetarum, Angelici concentus, pastorum, sapientum, Simeonis & Annæ, Ioannes Baptista Zachariæ filius in Iudæam à Deo legatus est, qui generis nobilitate, qui natiuitate admirabili, qui vitæ sanctimonia, quiq; raris animi dotibus, parta apud Iudæos auctoritate, veluti lucifer solẽ Christum præcurreret: ac Iudæorum corda, legis maiestate plus quàm par erat prædita, ad Euangelicã fidem præpararet: ne inani legis fiducia, qua illi nimium sibi indulgebant, fidei contemptores effecti, veræ iustitiæ ac salutis rationem, quæ non lege, sed fide est, amitterent. Res hæc multo quidem altius tractanda esset: sed ego vestra fretus intelligẽtia, breuius quàm causa desiderat, omnia disseram, si primùm illud precatus fuero, vt qui solus verba vitæ habet, & à quo bonorum omnium summa proficiscitur, mihi faueat, vt munus hoc, munus inquam suum, apud omnium aures & corda dignè absoluerè valeam.

Posteaquam

Posteaquam ex vno homine peccatū irrepsit in mundum, tantūmq; illius culpa valuit, vt vniuersum hominū genus, morti & tyrannidi obnoxium redderet: cælestis ille pater pro sua in nos pietate salutis nostræ consulere studens, vnicum è cælis filium demittere, eundēmq; nostra mortalitate indutum ad crucis supplicium tradere decreuit, vt qui mortalium viuæ fidei oculos in eum coniecerit, iustitiæ, æternæq; vitæ felicitatem consequeretur. Hæc erat vnica nostræ salutis ratio, quoniam peccati regnum nullis vel hominum, vel Angelorum viribus deleri poterat. Porro lex illa naturæ similitudo quædam diuinæ legis, descriptio æternæ illius mentis rerum omnium principis, iuris & iniuriæ regula, humano cordi, vt lumen oculis indita, quanquā ante lapsum clara erat, cui etiam arbitrij vires congruebant, quæ ab illius ordine non retrahebantur, tamen post lapsum deformata est: accessit enim ei propter peccati labem, velut caligo quædam priorem detrahens claritatem, arbitriūmq; ob contrarios membrorū impetus tyrannide peccati effrenatos ab ea deficere cœpit. Quo factum est, accedente astu satanæ grassantis in humanum genus, studentis in Deum contumacias augere, incitantis praua ingenia ad fingendas falsas de Deo opiniones, vt mortales suo ingenio, suisque viribus, non modò ad Deū nō erigerētur, ac prouherētur, sed quotidie magis ac magis ab illo se totos auerterent: in eamq; descenderent cordis cæcitatem, & animi impietatem, vt vilissimis quas natura gignit rebus, diuinæ maiestatis honorem exhiberent: peruersum sanè & iniquum religionis

gionis genus. Quamobrem visum est diuinæ sapi-  
entiae, legem externis tabulis inscriptam per Mo-  
sen tradere, quæ legem illam interioribus animi  
partibus iam olim fixam, peccati autem macula  
oblinitam, ac velut reflexam explicaret, & restitue-  
ret, docens quales nos circa Deum, ac proximos  
esse oporteat: pronuntians item irasci Deum cons-  
tumacibus, de eisdemque cum præsens, tum æters  
num supplicium sumere. Mitto eam legis partem,  
quæ circumcisionem, sacrificia, ciborum delectus,  
festos dies, cæteraq; præscripta continebat, ad tē-  
pus instituta, vt essent Euāgelicę veritatis vmbre,  
rudimenta, ac velut præludia quædam. Nam illarū  
institutionum propria fuit ratio. Lex itaq; illa, quæ  
recta agendorum ratio, morūmq; disciplina erat,  
cuiq; poenarum ac præmiorum decreta iungeban-  
tur, non externa tantū facta, politicæ cuiusdam  
ac ciuilis vitæ mores exquirebat: sed spirituales mo-  
tus, interiores affectiones flagitabat, hominēque  
ad integram obedientiæ rationē erga Deum pro-  
uocabat. Hanc autem absolutam obedientiam na-  
tura hominis iā corrupta, cuius partes inter se dis-  
sidebant, præstare non poterat: quin præterea euē-  
nit, vt legis indicio proditis tot peccandi formis,  
vniuersus ille libidinū exercitus velut ad pugnam  
ac certamen prouocatus irritaretur, ac in omnes  
vires suas collectus, & instructus, ad peccandum  
atrocius sollicitaret, & traheret, vt est humanæ cu-  
piditatis ingenium in vetita niti, ac interdictis la-  
cessiri potius quàm duci. Sic res in diuersum exijt,  
quando lege accedente, libidines non sunt deuins-  
cæ, sed excitatæ: peccatum non defecit, sed abun-  
dauit;

dauit: mórſq; & tyrannis maiores collegerunt vi-  
res: non legis quidem vitio: quæ, vt omnes ſcimus,  
ad honeſta inuitat: ſed naturæ noſtræ prauitate,  
quæ rem per ſe bonam nobis in perniciem conuer-  
tit. Iure igitur Paulus conferendæ iuſtitie vim le-  
gi detrahit, aſſeuerans eos qui legis virtute ſe iu-  
ſtos eſſe prædicant, fidem exinanire, promiſſiones  
delere, Chriſti beneficium abnegare. Non enim ea  
eſt legis perfectio, vt ad pellenda quæcunq; pro-  
hibet, & perficienda quæcunq; iubet, firmum ad-  
hibeat præſidium: neq; à morte liberat: neq; à ty-  
rannide redimit: neq; cor innouat: neq; libidines  
deuincit, neq; extinguit proprii amoris ardorem,  
neq; accendit charitatis ignem, neq; frangit ſata-  
næ tela, neq; occultas mundi fraudes reiicit. Abſit,  
vt quæ Chriſti ſunt, legi adſcribamus, & legem ex-  
tollentes Chriſtum deprimamus. Nam etſi lex ad  
bona opera multos attraxit, eos tamen Deo iuſtos  
non reddidit: quippe quos aut cōmodorum ratio,  
aut humanæ gloriæ aura, aut ſuppliciorum formi-  
do, aut ignominie fuga, aut alius quiuis præter Dei  
gloriæ propoſitum, aduentitius pulſus ad eam obe-  
dientie formam adegit, vt externos membrorum  
motus legis mandato ſubijcerent, interim tamen  
manerēt in eis interiores illi, quos ſola Chriſti gra-  
tia mūdos reddere poteſt, immundi affectus. Ho-  
minis itaq; priori tantū carnis natiuitate, ac cūctis  
præter Dei gratiā adhærentibus ei præſidijs freti,  
quacunq; ratione prodierint bona opera, apud mor-  
tales fortè comperient iuſtitie locū: at apud Deū  
nimirū qui ad ipſum operū fontē, nempe cor mun-  
dum inſpicit, iuſtitie laudem fruſtra ſibi vendica-  
bunt

bunt,quãdoquidẽ sine Christi gratia omne cor im-  
mundũ est.ideóq; omne opus bonum ab eo proces-  
dens,velut eius immunditiẽ olens ac spirans,Deo  
immundũ est:etsi nullis sempiternis,aut præsentis-  
bus supplicijs,quinimò tẽporalibus præmijs , non  
dicam æternis,dignum esse potest. At verò acces-  
dente diuino afflatu,per quem cor mundum crea-  
tur in homine , viua fide in Christum erectus ho-  
mo,nulla vel cõmodorum,vel gloriæ expectatio-  
ne:nulla vel suppliciorum,vel ignominix formidi-  
ne:nulla deniq; externa mundi impulsione actus,  
sed Dei gloriam in primis spectans, legis manda-  
ta vltro absoluit,ea alioqui si nunquã tradita fuiss-  
sent absoluturus. Eius enim menti noua quãdam  
fidei,spiritus,ac vitæ lex indita est , quæ peccata  
omnia destruit,verius q̃ prohibet:bona omnia pro-  
creat,verius quàm præcipit.Quæ proculdubio Pau-  
lo legis opera non sunt. cur enim legis opera vo-  
cabis , quæ lex non effecit: & quæ quanuis à lege  
præcipiantur,nihilo secius non præcepta efficeren-  
tur? Qui his operibus fretus est,verè apud Deum  
iustus est. His enim iustitiæ rationem scriptura nõ  
detrahit.Prodeũt enim à fide,ac arbitrio fide præ-  
dito.Fides igitur non lex,fides inquam non nuda,  
soláve,quæ Iacobo mortua dicitur,sed animo con-  
cepta,arbitrio recepta,ad vsum sanctorum operũ  
admissa,quæ Paulo per dilectionẽ operans, Patri-  
bus viua est,veram iustitiam parit. Proinde nemo  
existimet inanem fuisse legis vsum , etsi veram ius-  
titiam nõ contulit.Et vt taceam non mediocrem  
illam ex lege vtilitatem , quæ in publica pace,ac  
tranquillitate sita est,ob quam rem & magistratus  
humano

humano generi Deus præfecit: in hoc certè pro-  
fuit lex,quodd per eam cognitū est peccatum.quæ  
res ad exquirendam & capeffendam iustitiam non  
nullus est gradus.Multum enim promouit ad vitæ  
puritatem, qui suam impuritatem agnouit. Fit sani-  
tati vicinus, qui suum cognoscit morbum.Exoptat  
libertatem, qui suæ seruitutis miseriam cernit. Ex-  
petit lucem, qui se tenebris obductum esse depre-  
hendit. Tum adepta iustitia, tanti beneficij magni  
tudinem & clarius intelligimus, & gratius serua-  
mus.Quo magis enim lege ostensum est eminens  
ac sæuiens peccatum, eo magis Christi à peccato  
redimentis clementia,& virtus elucet.Itaque dul-  
cior fit vita,quæ morti succedit:iucundior lux, quæ  
sequitur tenebras:pretiosior libertas, quæ post ser-  
uitutem recipitur: delectabilior sanitas, cui cedit  
infirmetas:felicitas suauior,quæ post miseras exor-  
itur.Propterea negat Apostolus eū sub lege esse,  
quem Christi gratia redemit,Etenim quemadmo-  
dum puero adhibetur pædagogus, qui tantisper  
eum instituat, ac virga coerceat, donec adultus  
ad honesta feratur, tum enim ille pædagogo im-  
perat,omniūmq; virtutum honestatē & decus, nō  
pædagogi impulsione,sed propria animi magnitu-  
dine ac moderatione conseruat, ac ad heroicum  
quendam laudis ordinem, quem nec ostendisset  
pædagogus, sese erigit & prouehit: sic propemo-  
dum homini data est lex, donec euangelica fide  
fuerit renouatus. Accedens enim illa eum à legis  
imperio liberat, non vt illius præscripta impune  
transgredi valeat, sed vt ea ex corde absoluat,  
Christi gratia non legis ratione ductus:quinetiam  
supra



pro  
que  
nos  
vita  
fani  
pta  
Eu  
pro  
agni  
erua  
aen  
catu  
du  
que  
len  
edi  
exo  
st,  
no  
per  
tus  
im  
ni  
ru  
um  
let  
no  
de  
gis  
ne  
ar,  
m  
ra

supra legis madata, multa Deo gratissima pro Dei gloria absoluat. Hæc est patres ampliss. Euangelica illa libertas, quam nonnulli, ô cœnum, ô labes, ad carnis licentiam, & morum corruptelam accommodant, & ceu turpitudinû velamen, ac omnium vitiorum prætextum magno verborum lenocinio simplicioribus animis ad frangenda Satanę tela inexercitatis proponunt. Et vtinam non fecissent, vt illi eam peccandi occasionem velut vitæ ducem sibi præfixerint, vota, cælibatum, sacras preces, ieiunia, Ecclesiæ institutiones contemnentes: cum hæc omnia quæ ipsi contemnunt (Christe, quando hos vindicabis, & euelles errores?) aded Euangelicæ libertati non aduersantur, vt sint eins digni fructus, solatia, delitiæ, atq; fomenta. Felices qui hac Euangelica libertate freti, velut sponsa sponso Christo iuncti: velut filij clementissimo patri Deo redditi: velut discipuli prudentissimo doctore Spiritu sancto traditi: Christi amore flagrant, à quo vicissim summa charitate complectuntur: Deo honorem exhibent, à quo tuendi alendiq; suscipiuntur: Spiritu sancti monita, & institutiones tenent, à quo ad rectam vitæ rationem diriguntur, atque formantur: vt omnium actionum suarum scopus sit, non humani decoris ratio, quam lex naturæ exigat: neque pœnarum, aut præmiorum propositum, quod ex lege scripta est: sed Dei gloria, pro qua pròpti sint omnia cōmoda ex corde continere, omnia supplicia libēter sustinere, omnem humanæ gloriæ rationem sponte reijcere, omnia opprobria sine vlla recusatione subire, deniq; amicos, fratres, parentes, seipsum vsque, ac patriam abnegare, &

E. j. odio

odio habere . Quàm grauitèr errant , qui Patres ante Christi aduentum Domino seruièntes, sub lege naturæ aut Mosis fuissè, earúmque legum virtute , se Deo iustos exhibuissè contendunt ! Fuerunt & ipsi fidei ratione ab earum legum imperio redempti , qui Dei gloriam ad quam fide dirigebantur, omnium cogitationum atque actionû suarum regulam tenebant . Vnica enim iam inde ab initio mundi vsque in finem parata est via salutis, per fidem in Christum, etsi diuersa diuersis temporibus instituta fuerunt fidei symbola . Nec minus errant , qui neminem Christiani nomen profitentem, sub lege carnis, aut naturæ, aut Mosis esse prædicant. Velim Christiani omnes Christi beneficiû agnoscerent, Christiana libertate fruerentur, præclaram ac gloriosam Ecclesiæ conditionem spectaremus. At si mihi ostendes ex eis raptorem, sacrilegum: Neronis, aut Pharaonis similem: sub lege carnis eum esse contendam. Si liberalem, continentem, vel Catonis , aut Scipionis præstantem virtutes, humani decoris spectatorem: legis naturæ partum agnoscam. Si orantem, ieiunantem, elemosynas erogantem , pharisæorum more ad comoda inspicientem: legis Mosaicę seruum videbo. Si humilem, patientem, Abelis aut Abrahamæ obedientiam referentem , Dei gloriam spectantem : fidei germen gloriosum venerabor, cui subiectæ adiacent omnes leges . Aliud enim est legem habere, aliud sub lege esse, aliud legem absoluerè. Plures vni leges aderunt, sed vna dominabitur, & dux erit operum . Et quoniam finibus mensurantur opera, fit, vt diuersarum legum similes , quæ sunt in hac

in hac luce oculis hominum actiones , Deo fines  
spectanti longè dissimiles sint. Cæterum, vt redeã  
Patres ampliss. vnde initium sumpsit oratio nostra,  
quannis antequam venisset Christus, tot patres fi-  
dei virtute à Deo gratiam inissent, tamen maiores  
nostri à Christi aduentu fidei & gratiæ tempus  
descripserunt, legum auspicijs tempora præterita  
tribuentes: nimirum, quia Euangelium fidei & gra-  
tiæ denuntiatio, quod prius apud paucos Iudæos,  
nec satis quidem apertè audiebatur: post Christi  
aduentum ubiq; locorum ac gentium in hominum  
ore, oculis, auribus, manibúsq; tractatum est. Et  
quoniam nihil præteritum est argumētorum, quæ  
tantę rei hominis captum longè superanti, fidei lo-  
cum apud homines præpararent: commodum, ac  
suo tempore Ioannes Baptista dilectus Christi præ-  
cursor, ac legis & Euangelij velut confinium, pro-  
diit ex eremo, vbi à puero vitæ austeritate Heliam  
retulerat, quo eundem spiritu & virtute referret,  
cum Tiberius Cæsar annum iam x v. rerum sum-  
ma potiretur, Iudæorum regnum temporibus illis  
in quatuor alienigenas administratores, Pontium  
Pilatum, Herodem, Philippum, Lisaniam distractū  
erat: vt quemadmodum erat in oraculis, Messiam  
adesse significaretur. Ipsa autem sacerdotij maie-  
stas, velut in proximo abroganda, penes duos sa-  
crilegos Annam, & Caipham, mercenaria & vaga  
erat. Rebus itaque tum regni, tum religionis. Iu-  
dæorum sic disfectis: Ioannes in eam quæ Iorda-  
ni adhæret regionem sese contulit: omnes qui ad  
eum veniebant, ad delictorum confessionem ad-  
hortabatur, eisdemque baptizabat, interim do-

cens se aqua corpora lauare, at Iesum fore vnicum salutis auctorem, cuius cælesti virtute corda essent sanctificanda, ac omnibus in eum credentibus gratis iustitia conferenda: Phariseos, ac Sadduceos, quos fucata illa legis opera tanquam iustos, ingenuosq; Abrahæ filios, ac Deo gratiosos efferebant, prorsus iniustos, viperarum progeniem, Deoque odiosos esse declarauit. Non enim, vt par erat, Abraham viua fide referebant. Propria benefacta, quod arrogantia erat: aliorum peccata, quod erat liuoris & malitiæ, cōmemorabant: & toto (vt aiunt) cælo errantes, à lege, quæ diuinum furorem erat illis ministratura, iustitiæ ac salutis rationē expectabant, quinimò se adeptos esse gloriabantur. Hanc vnam iustitiæ & salutis viam Ioannes omnibus ostendebat, vt ex corde resipiscentes, legis fiduciam arcerent, sese deiicerent, ac impuros esse confiterentur: & in Iesum Christum mortis & peccati destructorem, iustitiæ & vitæ restitutorem crederent. Hæc autem fortuitò non agebantur, quæ Esaias multis retro seculis vaticinatus est: Vox, ait, in deserto, parate viam domini, rectas facite semitas eius. Nō erat Ioannes verbum per quod facta sunt omnia: sed vox, quæ verbum illud nostra mortalitate indutum explicabat. Non erat Dei virtus, hominum corda occultè sanctificans: sed vox, quæ in hominum auribus recipiebatur, vt ad sanitatem illi corda præpararent. Non erat lux, mentiū tenebras expellens: sed vox, quæ dormientes excitabat, vt ad exortam lucem sese conferrent. Non erat ornatus ille spōsus, & rex Ecclesiæ: sed vox, quæ cunctos inuitabat, vt venienti sponso & regi occurrerent

rent. Non erat mediator Dei & hominum : sed  
vox mediatorem præcurrens , vt audiant exules  
adesse per quem irato Deo gratis recõciliari pos-  
sent. O vocem, prophetarum vocibus prænuntia-  
tam : ô vocem Angelica voce sub ipsis sacrorum  
mysterijs commendatam: ô vocem deniq; Christi  
voce omnibus ex muliere natis præpositam. Cla-  
mabat, Exhibete cor vestrum Deo, cogitationes,  
affectionesque vestras in eum dirigite. Iam enim  
tẽpus appetit, vt Euangelica doctrina innouetur  
orbis:quamobrem pauperes humiles, legis fiducia  
ac philosophiæ ratione destituti, mundoque abie-  
cti, qui Esaia valles sunt, cælesti sapientia cæle-  
stibusque donis replebuntur. Contra elati maie-  
state legis, aut humanæ sapientiæ supercilio, mun-  
doque montes & colles admirabiles, prorsus im-  
pij & insignes stulti declarabuntur. Et qui ad exe-  
cranda facinora prauo corde nunc prolabuntur,  
fide erecti ad veram felicitatis viam dirigentur:  
fiẽntque facilia, ac suauia legis mandata, quibus  
nunc videntur aspera, & impossibilia : vt Volen-  
tes ac gaudentes verè absoluant, quæ nunc lege  
acti absolvere fingunt. Hanc felicitatem nemo  
conferre potest, nisi Iesus. Conferet autem omni-  
bus, qui viuæ fidei oculos in eũ coniecerint. Cor-  
poris oculis eum conspiceret, est tanquam felicitas  
pars, modò adsit fidei intuitus: sin secus, maio-  
ris infelicitatis erit occasio. Fidei conspectus o-  
mnibus ex æquo prodest. Qui in eum crediderit,  
Dei beneficio seruabitur. Qui ab eo fidei oculos  
auerterit, suiipsius vitio peribit. Iam verò Patres  
ampliss. vt institutæ orationis exitum expediam,

E. iij. fuit

fuit iam olim Esaie oraculum absolutum : totus orbis Dei salutare vidit , & Euangelica doctrina innouatus, viam Domino parauit, & semitas eius rectas effecit: aspera ad æquitatem, praua ad lenitatem versa fuere. Tot enim hominum millia relictis patrijs legibus, abiecta humanæ sapientiæ ratione, pulsis diuitiarum ac voluptatum studijs, spre-  
tis cæremonijs, ac ritibus, quibus ab incunabulis assueuerant: abnegatis, & repudiatis Dijs, quos tot templis, sacrificijs, festis diebus, magna religione colebant, ad Iesu nomen genua submisere. Iesu nomen, gentes omnes ore, corde, pietate, sanguine, veneratæ sunt: & ex tanta morum, institutorum, deorum discordia, concordæ factæ, in vnicam Christi religionem, vnicam sacramentorum rationem, vnicam Dei gloriam conuenere. nec potuit satan obistere per Philosophos omni scientiarum ratione pollentes: per Iudæos religionis Mosaicæ prætextu aduersantes: per Rhetores eloquentiæ viribus admirabiles: per Sophistas disputandi subtilitate pertinaces: per Cæsares omni tormentorum genere sæuientes: quin cælestis illa doctrina, cunctas totius orbis regiones inuaderet, persuaderet, vinceret, possideret. Interim bonorum direptiones, edicta, tribunalia, confiscationes, proscriptiones, exilia, carceres, virgæ, secures, bestię, cruces, ignes, mortes, in rem Euangelij & fidei profectum erant. Nunc verò ( nos miseros, in quam descendimus confusionem! in quas Dei iras incidimus!) in Europæ angustijs arctata est Ecclesia: & Christus cōtemptui habetur, vbi olim summo habebatur honori. Et ne antiquus ille aduersarius vel ex  
vna



vna parte insidias nō paret, surrexerunt domestici  
hostes, grassantes in reliquam hanc Ecclesiam ad  
angulum coactam, odio & armis infidelium expo-  
sitam: aliqui pastores dormientes, vel mercenari-  
um (ne quid grauius dicam) vices gerentes: non  
nulli principes in tyrannidem & bellorum furo-  
rem versi, quorum ambitioni nullus est terminus:  
multi doctores ore quidem piè docentes, at operi-  
bus impiè dedocentes: plerique perfectionis vitæ  
rationem profitentes, at scandalis cuncta pertur-  
bantes: tot omnium generum, ætatum, ordinum,  
viri ac mulieres, ethnicorum ac turcarum potius  
quàm Christianorum vitam referentes: denique,  
quod omnium est perniciosissimum, tot ministri sa-  
tanæ in angelos lucis transfigurati, qui leges, ma-  
iorum instituta, patrum sententias probatas, Chris-  
tiani populi consuetudines, qui sacramenta, san-  
ctorum honores, & quid non sanctum? contem-  
nunt, reiiciunt, execrantur. Interim exercitatio-  
ne scripturarum, quas pro ingenio ac libidine po-  
tius lacerant: eloquentiæ lenocinio, linguarum  
eruditione freti, veterem Ecclesiam, Apostolicam  
ipsi dicunt: at re vera carnalē veteris Adæ filiam,  
satanæque sponfam, gloriantur se velle restituere,  
ac procurare viæ & semitarum Domini ornatum,  
hoc est (vt euētus ostendunt) Christianā Rempub.  
perturbare, turpitudinum licentiam cunctis facere.  
O Ecclesia, ô fides, siccine in amarum vobis verte-  
runt omnia? siccine vos oppugnant, qui propugna-  
re debent? Itāne Euangelium, & scripturæ, quibus  
olim vicistis orbem, conculcastis idola, profligastis  
errores, destruxistis vitia, erexistis Christi gloriam:

E. iij.      nunc



nunc in vos scutum, tela, arma, facta sunt, quibus  
ex hoc angulo eijciamini ? An vos tot procellis,  
fluctibus, tempestatibus periclitantes ita destituet  
Iesus, vt nulla sit aurora, in qua veniens dicat ven  
to, Quiesce, & mari, Tace ? Sed iam videre videor  
Iesum super aquas ambulantem, eundemque au  
dire dicentem : Confidite, ego sum, nolite time  
re : postquam vos Patres ecclesiastica dignitate  
præminentes, omniq[ue] doctrinæ genere insignes,  
vos mundi lumina & decora, volente ac dispo  
nente Deo, in præclaram hanc urbem singulari  
P A V L I I I I. Pont. Max. & Caroli V. Cæsaris  
inuietissimi, tum prouidentia, tum auctoritate con  
uenistis. In tot enim tamque grauib[us] opinionū  
dissidijs, quibus nunc omnia miscentur : in mori  
bus seculi adeò corruptis, quibus Ecclesiæ facies  
dehonestatur : in tam diutinis bellorum tempesta  
tibus, quibus & suo ipsius, & alieno gladio Chris  
tianus orbis est oppressus & afflictus : vnde expe  
ctare possumus, vel veritatis lucem, vel morum  
formam, vel firmæ pacis serenitatem, nisi ex hoc  
vestro confessu : vbi Christus adest corda vestra as  
flaturus, & ad cuncta quæ agenda sunt directus  
rus ? Hoc anno xv. quo Carolus V. coronatum  
agit Imperatorem : quemadmodum olim in Ioan  
ne fuit, vestra opera fauente Domino Esaïæ ora  
culum languens, & penè emortuum, sua nempe  
veritate destitutum absoluetur, vt parata sit Do  
mino via, ecclesiasticis ordinibus ad veram suæ  
functionis normam reductis, vt semitæ eius rectæ  
fiant : Principibus in firmam concordie rationem  
iunctis, vt aspera ad æquitatem, praua ad lenita  
tem

tem vertantur : populo ad studium veræ pietatis  
composito . Quamobrem vbique exaltetur Chris-  
tus, omnes cum confiteantur ore, diligant corde,  
referant moribus & pietate. Quo in loco res Chri-  
stianorum sint, videtis. fides est extincta : chari-  
tas friget : virtutes contemnuntur : timor Dei  
exulat : sacramenta conculcantur : Sancti malè au-  
diunt : euangelica libertas turpitudinum est præ-  
textus : & quasi in peccata conspirant omnes. Ad  
vos itaque spectat tot Ecclesiæ necessitatibus, pe-  
riculis, calamitatibus, ruinis occurrere : quam ob  
rem huc conuenistis. Te autem inuocamus Iesu  
Christe fili Dei viui, qui orans pro Ecclesia dixis-  
ti : Pater, sanctifica eos in veritate : qui pollicis-  
tus es eam aduersus satanæ vires seruaturum esse,  
ac in medio vel duorum in tuo nomine conueni-  
entium te adfuturum esse. Et precamur, vt Eccle-  
siam tuam sanctifices, vt patribus in tuo nomine  
congregatis, spiritum tuum impartias, vt Princi-  
pibus mentem des bonam, ne ad suam vtilitatem  
causas religionis inflectere procurent. Obluiscere  
Domine iniquitatum nostrarum, & memor esto  
miserationum tuarum. non enim in iustificationi-  
bus nostris prosternimus preces nostras ante faciē  
tuam : sed in miserationibus tuis multis. Exaudi  
domine : placare domine : attende, & fac propter  
nomen sanctum tuum, quod inuocatum est super  
populum tuum : ne fortè dicant gentes, vbi est  
Deus eorum ? Vos autem per Christum obsecro,  
obtestorque Patres ampliss. vt ea concordibus a-  
nimis spectetis, quæ digna sunt pietate, professio-  
neque vestra. In Iesu nomine conuenistis, ad Iesu  
gloriam

gloriam omnibus posthabitis inspicite : sin secus,  
frustra vel sex millia conuenietis. Nihil in vobis  
desiderari permittatis, siue ad dicendi libertatem,  
siue ad patientiam laborum, siue ad sedulitatem  
officiorum. Orationibus, ieiunijs, pijs operibus va  
cantes, consentientibus pariterque ardentibus vo  
tis, corda vestra dignum præparate templum, vbi  
Spiritus domini sedeat, qui per vos in sessionibus  
loquatur. Nemo ad ingenij ostentationem, opi  
nionem suam mordicus defendere gaudeat. Ne  
mo procuret contentionum voces: ego Pauli, ego  
Apollo, ego Cephæ. Nemo metu hominū Deum  
contemnat. Nemo propriæ gloriæ studiō ductus,  
Christi gloriam obscurer. Nemo aliorum monita,  
sed nec Principum mandata tenens, Spiritus sancti  
consilia reiiciat. Sic enim coram hominibus; in  
primis autem coram Deo officium vestrum probè  
vindicabitis. Dixi.

Oratio habita à R. P. Fratре Ambro-  
sio Catharino Polito Senensi ordi. prædi-  
catorum in secūda sessione Synodi  
Tridentinæ. I I I I. Februarij  
M. D. X L V I.



Ræcelsa loci huius auctoritas, Patres  
amplissimi, iam nunc dicere incipien-  
tem, profectò maiore me timore ac  
trepidatione corriperet, nisi huic au-  
ctoritati exaduerso vestram oppone-  
rem auctoritatem, cuius iussu atque hortatu, non  
mea sponte, hunc ipsum ego hodie conscendi lo-  
cum: tum ista vestri vultus plurimū reuerēda ma-  
iestas, omnem, quantacunq; mihi adesset, dicendi  
facultatem præriperet, nisi rursus eiusdem vultus  
vestri summa gratia, ac benigna serenitas, quā his  
meis oculis mihi videor intueri, me ad dicendum  
etiam vehementius incitaret: deniq; sola cogitatio  
excellentissimæ eruditionis, ac doctrinæ, qua tam  
selectam ex vniuerso terrarum orbe synodum præ-  
fulgere conspicio, hærentem faucibus contineret  
sermonem, nisi vota precésq; meas ad illum con-  
uerterem, atq; in eo fidere, quē nouimus & os mu-  
torum aperuisse, & linguas infantium fecisse diser-  
tas. Verum ne sine gradu ego ille miser homuncu-  
lus & peccator ad thronum tātæ maiestatis acce-  
dam, adibo illam quā ipse nobis instituit & aduo-  
catam piam, & sedulam precatricē. fauete votis.

O summè gratiosa, & vna inter mulieres singula-  
riter benedicta, Maria virgo, quæ vt primogenita  
filia,

filia, vt primaria sponsa, vt fidelissima socia, denique mater charissima, ante omnes felices animos & beatos spiritus propè tuò Emmanueli assistis, Aue, & impetra mihi hodie eloquium viuum, eloquium feruens, & efficax, nò in comptis humanæ eloquētiæ verbis, sed in ostēsiōe spiritus, & virtutis: quo auditorum corda magis ac magis ad opus Dei inceptum feliciter peragendum inflammē, in eius gloriam, & nostram totiùsque Christiani gregis lætitiā perpetuam & salutem. Amen.

Benedictus Deus, & Pater Domini nostri Iesu Christi, Pater misericordiarū, & Deus totius consolationis, qui consolatur nos in omni desolatione nostra. nam quod à cunctis bonis tanto tempore est desideratum, & tantopere efflagitatum, & expectatum: ecce nunc ego magno cum animi mei gaudio his meis oculis circumspecto, te, videlicet, Synodum venerandam œcumenicam, non solummodo indictam, non solummodo collectam, verū etiā iam ostio in nomine Domini patefacto confidenter ingressam in sancta, vt æternæ nostræ redemptionis obscuratas ab impijs veritates, ibi aspicias, nobis decernas, atq; populo patefacias. Verè gaudeo Patres optimi, quia misericordia & manus Domini fecit hoc. & ideo vehementer cupio, vt hoc meum gaudium, quod commune est piorū omnium, de spe magis quàm de re conceptum, vestra opera nobis perficiatis: vt ego seniculus huius mei tam diuturni desiderij compos factus, aliquando possim canere canticum cum sene illo iusto, de quo nudiustertius audiistis, quòd responsum acceperat à Spiritu sancto, nò visurum se mortē donec videret

videret Christū Domini, vidit, & gauisus est. neq̃  
solum vidit; verū etiam suis in vlnis eum gesta-  
re meruit, qui portat omnia verbo virtutis suæ: &  
lætabundus in eum canticum erumpere, Nunc di-  
mittis seruum tuū domine secundum verbū tuum  
in pace, quia viderunt oculi mei salutare tuum: &  
quod excurrit. Hoc autem ego, vt verum fatear,  
nondum possum, donec quod nunc in floribus vi-  
deo, detur mihi spectare & carpere in ipsis fructi-  
bus. Interim verò absque metu multo, ac sollicitu-  
dine multa esse non possum: metuo enim multum  
ab ingenio Satanæ, quia Satanæ est, hoc est bonis  
omnibus inceptis aduersans, tantōque magis ad-  
uersans, quanto diuiniora, & ad plurimorum salu-  
tem magis nouerit attinere. Qui enim paradisum  
Dei conturbauit in cælis draco ille rufus, ibique  
schisma condidit tam insigne: & de alio paradiso  
parentes nostros tantis ornatos donis extermina-  
uit, prosternens, vulnerans, & expolians: & ipsum  
Dominum in deserto nō est veritus adoriri: puto,  
quod neque tibi parceret, neque vestram verebitur  
sanctitatem: imò nisi assumatis armaturā Dei, seu-  
tum fidei, thoracem iustitiæ, & galeam, spem salu-  
tis, strictum spiritus teneatis ensē, vigiles, prom-  
ptique ad feriendū, cæsim punctūque, ad dex-  
tram & sinistram, profectò insano illius furori, &  
incomparabili calliditati non resistetis. Est igitur  
verbum Domini monentis vos in Petro, & dicen-  
tis: Simon, Simon, ecce Satanæ expetiuit vos, vt  
cribraret sicut triticum: ego autem rogavi pro te,  
vt non deficiat fides tua: & tu aliquando conuersus  
confirma fratres tuos. Hoc enim totum ad te  
pertine.

pertinere, ô Synode sacrosancta, non dubito: tu enim iuxta spiritus intellectum Petrus es, quia qui Petri clauēs obtinet, in te includitur, caput tuum. Caue igitur à cribratore. considera quòd Apostolicum senatum aggressus, vnum saltem de duodecim cribrando lucratus est. Cribrum est corpus illud Domini sanctissimum, flagris cæsum, & clauis & lancea perforatū. Corpus illud significat Ecclesiam, quæ caput habet vnum dominum Iesum, cuius vices in terris gerit **P A V L V S** huius nominis **I I I**. Qui non est sub capite, non est in corpore. qui vicarium spernit, spernit & dominum. qui cū hoc non congregat, dispergit. qui ab hoc segregatur, de cribro decidit, & iam non est Christi, sed Sathanæ. Sic igitur vnusquisque se cõponat in cribro, vt quauis diaboli concussione nõ excidat. Quod erit, si vnū in Christo dicamus omnes, & non sint in nobis schismata. Dicit hæreticus, Adularis papista: dicet calumniosus, Aucuparis Catharine: clamabit autem Ambrosius Cath. teste Deo, non adolor ô hæretice, nõ aucupor ô amice, sed verba exploratissimæ & cõpertissimæ veritatis pronuntio: & eius veritatis, quam qui non asserat, frustra falsoque de Christiano nomine gloriatur. Sed ad rem.

Habetis ergo in exēplum & typum vestrum Petrum, primò quidē auersum & negantem, vt discatis cauere: tum eundē conuersum & confitentē, vt discatis fortiter agere, & sapiēter. Cõsideremus ergo primū, qua de causā vir ille tam cõmendatæ fidei, & qui paulo antè tam pertinax & securus aiebat: Et si oportuerit me mori tecū, non te negabo: mox ad vnus ancillulæ vocolam trepidās tam disertè



fertè negat: vt illi bene cõueniret, Hui victus vno  
verbo tam citò? Et paulo pòst ab alia interpellatus  
ancilla, etiã periuriũ cum negatione coniungit: &  
tertiò ab homine turbulenti vultus perterrefactus,  
etiam detestando anathemate seipsum ferit. Vnde  
igitur tanta imbecillitas, quæso, & inconstantia?  
Quis nesciat, quòd ab illa nimia de semetipso cõ-  
fidentia? Discamus igitur in primis timorem cau-  
tum, & non malè tutam securitatem: id est, nō esse  
confidentes in nobis, quasi in nobis: dicente Do-  
mino: Sine me nihil potestis facere: sed esse ani-  
mosi in illo qui dixit, Ego dabo vobis os, & sapien-  
tiam, cui non poterunt resistere omnes aduersarij  
vestri. Nolite putare res arduas, & adeò præclaras  
& salutares effici posse, absque oppugnatione, &  
discrimine magno per malignum. Credite nō de-  
esse illi ancillas in atrio fortissimas, & promptissi-  
mas ad debellandum. Video quòd taciti quæritis  
intra vos, quasnam ego dicam ancillas. audite. Est  
quidem ancilla prior valde fortis, & audax: neque  
longè abest ab vnoquoque nostrum. & ne vos mor-  
rer diutius: ancilla hæc est vnicuique caro sua, quæ  
in atrio pontificis versans, hoc est terrenis bonis,  
& cõmoditatibus vitæ huius incumbens, etiam Pe-  
trum ibi secum morantē potest adigere ad negan-  
dum. Non enim ascēdit illa superius, vt legē Do-  
mini contēpletur, & probet vtiliora: neq; enim po-  
test: cuius prudētia inimica est Deo, & assiduè con-  
tra spiritũ militat (atq; vtinã non sæpenumero cū  
victoria) cui potius ancillari debebat. Hæc stolidi-  
est, & solūmodo quod est ante pedes aspiciēs, no-  
uissima, & quæ alterius vitæ sunt, non considerat.

Quare

Quare ad omne opus bonū inuenitur ignaua, querula, garrula, cōtumax: est item loquax, procax, temeraria, auida, popularis, & noxiæ libertatis: odit luctū, horret ieiunia, esurie murmurat, sollicitatur de crastino, vigilias non nisi ad ludos & lasciuias tolerat, orationes fastidit: ad turpiloquia, scurrilia, vana, impudica, gerit aures patulas & erectas: ad seria verò, & ad verbū Dei, laudēsque diuinas, penitus obturatas & graues. Deniq; in omnibus quæ sunt spiritus & pietatis, semper importuna interestrepret, ac permolesta. Hæc istis nouarum sectarū auctoribus, & facibus orbis terræ, magna ac penè cūcta subministrauit fomēta. Quā ob rem summos pere ab illa cauendū est nobis, vtpote impudente, petulante, pellice, ac malè præcincta: contra quam Dominus ait: Sint lumbi vestri præcincti, & lucernæ ardentes in manibus vestris: & vos similes hominibus expectantibus Dominum suum, quando reuertatur à nuptijs. Attendite ne grauentur corda vestra crapula, & ebrietate: & veniat super vos repētina calamitas. Vigilate itaque, orate, castigate ancillam, redigite in seruitutē: ne qui alijs prædicare debetis, ipsi reprobi inueniamini. Hactenus de ancilla priore.

Subsequitur hanc alia ancilla, neque minus metuēda, quippe quæ multos captiuos teneat, qui tamē de priore triūphant. Nam quanto celsior animus est, tanto (ni valde caueat) ab ista fortius detinetur. Hæc verò vt explicemus, est humanæ gloriæ cupiditas, & ambitio, quæ ancillatur hominibus. Hæc igitur quos sibi subigit, seruos hominū facit, vt propterea non liberè veritatem cōfiteantur.

tur. propter quod scriptum est: Multi ex principibus crediderunt in eū, sed non confitebantur, quia dilexerunt gloriam hominum magis, quā gloriam Dei. Hæc mater est omnium hæreticorum, & alumna. nam inflata de magisterio præsumpto, nescit audire, tacere, discere: gestit autem docere semper & loqui. Hæc in tergi mantica suos, ne videat, recondit errores: in ea verò quæ est à fronte, rimatur alienos. Hæc semel emissum verbū reuocari non sinit. non enim didicit à Sapiente: Pro anima tua non erubescas dicere verum: Est enim pudor adducens peccatum, & est pudor adducens gratiam, & gloriā. Ac si dixerit, Pudet errasse, non pudeat errorem agnitum confiteri, & emendare. Hic est enim bonus ille pudor, qui tibi gratiam pariet, & gloriam. Nam labi, errare, nescire, & decipi, humanum est malum, & dignum venia: in agnito verò errore velle præ pudore persistere, non iam humanum, sed satanicum est, & inexpiabile. quo fit, vt qui se hominem esse fateri erubescit, suo merito euadit in satanā, & diabolum. Quocirca quicumque aliquid scripsimus, vel sentimus, quod rectè ab alio reprehendatur, cedamus veritati, & cū gratiarum actione suscipiamus admonentem, deputantes lucro nō paruo ab erroribus liberari. Super omnia autem sanctæ Synodi sententijs nemo resistat. qui verò secus, nouerit se hoc ipso facto hæreticum prodidisse. Videāt tamen qui aliena reprehendunt, ne ipsi forsā ab hac ancilla moueantur, quæ est & liuida, & lippa: & alterius gloriam, suam esse ignominiam arbitratur: tum ne ipsi falsi bis peccent, dum bene dicta reprehēdunt, iniurijs

F. j. simul

simul & veritati, & fratri suo : denique ne modum fraternæ charitatis excedant , dum quod oleo curari posset, igne malint & ferro: quod nõ tam esset errores extinguere , quàm animas velle perdere, pro quibus Christus est crucifixus. Hæc autem nõ de iam subuersis hæreticis , sed de fratribus dicta esse volo. & qui hanc regulam secuti fuerint, pax Dei, & misericordia super illos. Hactenus de ancillis.

Superest nunc , vt pauca de homine turbulenti vultus admoneamus. In hoc facile secularis potestas agnoscitur, qua plerique mortalium adeò terrentur , vt nullum sit eis piaculum propter illam negare Christum. Recordamini Arimineum. Concilium, & alia huiusmodi quædam. Sed Deo gratia est, quòd habemus catholicos Principes , & hæresum inimicos. & nihilominus ex abundantia cordis, quod ad hoc pertinet, pro pietate nõ verebor hortari. Dico ergo, statuite semel certa fide hinc in medio vestrum esse Christum summum omnium principem, regem regum, & dominum dominantium: & hoc persuasi, dicite cum magno Apostolo toto corde : Et si sint dii multi , & domini multi, nobis tamẽ vnus Deus pater, ex quo omnia, & nos in ipsum : & vnus dominus noster Iesus Christus, per quem omnia, & nos per illum. Tum si qua potestas abuti velit Cõcilio ad sua commoda, & hoc scitis, exhorrescite, quoniam non in hominem, sed in Spiritum sanctum peccat. Siquid aliud contra charitatem requirat, exerite gladium spiritus, & dicite: Deus charitas est. Siquid contra veritatem, similiter dicite: Iesus Dominus veritas est. Si vultus turbulentus ostendit iram minitantem vitam, adiungite:

gite: Hæc est vita æterna, vt cognoscant te Deum  
patrem, & quem misisti dominum Iesum Christum.  
Et tanquam de præmissis concludite cum Psalmo-  
grapho: In Deo laudabo verbum, in Domino lau-  
dabo sermonem: in Deo speraui, non timebo quid  
faciat mihi homo. Mementote præcepti: Nolite  
timere eos qui occidunt corpora, postea non ha-  
bent amplius quid faciant. Timete autem illum  
qui postquam occiderit corpus, potestatem habet  
mittendi animam in gehennam ignis: hunc dico vo-  
bis timete. Respicite ad Petrum rursus, & videte  
quomodo iuxta Domini verbum cõfirmat fratres  
suos. Ecce post galli cantum, post illucescentem  
sibi diem, à veri Solis aspectu, post amarum pœni-  
tentia fletum, post trinā suā recuperatā dilectio-  
nis confessionem, post susceptum summi pastoris  
officium, indutus virtutē ex alto, non iam in atrio  
sedens, & frigans, vbi potuit pernegare, sed in ca-  
thedra docens, vbi regitur à Spiritu sancto, totus  
feruore charitatis succensus, incipit prædicare no-  
men salutis. Turbantur veteris synagogæ pontifi-  
ces, ille autē alacer insistit operi. Edicunt vt sileat,  
ille clamat: Oportet obedire Deo magis quàm ho-  
minibus. Addunt minas, non deterretur. tradūt in  
carcerem, sed verbum Dei non alligatur. cædunt  
flagris, agit gratias, gaudens quòd dignus habitus  
est pro nomine Iesu contumeliam pati. Denique  
nūquam cessat à munere, donec Romæ iuxta ora-  
culum Domini extensis in cruce manibus, & ver-  
so deorsum capite glorificat Deum. Hæc autem  
facta quid sunt aliud quàm viuæ voces clamantis  
Apostoli? & quid aliud clamantis, nisi Vade, & tu

F.ij. fac

fac similiter! Confirma & tu sancta synode fratres tuos: ad hoc enim conuocauit te Dominus, & hoc reposcit abs te, cui dari verba non possunt.

Quanta mihi hoc in loco succurrant Patres opportunè dicenda, nisi apud vos agerem, qui alios ista melius docere potestis, explicarem. pauca tamen proferam, quæ velim quasi sagittas potentis acutas hæere fixa in cordibus vestris. Dominus enim Deus vos alloquitur, aiens: Ego te plantaui vineam electam: plantaui autem te meâ cruce, & morte: ego te meo sanguine irrigaui: elegi ex te lapides, ædificaui turrim, fodi torcular, posui sepem: quid est, quod debui facere, & non feci? Verû quâra habeo iam dudum aduersus te ô ingrata! Quid est enim, quod penè te exterminauit aper de sylua, & singularis ferus (qui audit intelligat) depascitur! & nihilominus ego nunc cōgregaui te, quæ admodum gallina congregat pullos suos sub alis, & in medio tui sum. Quid times? cōuertere ad me Dominum Deum tuum, vt cōfirmes fratres tuos. Stemus simul. quis est aduersarius meus? Rogauim enim ego pro te, ne deficiat fides tua, quomodo ergo deficere poteris? Tu autem vide canes, vide lupos, vide operarios malos, vide confusionem, vide concisionem: vexatas, dispersas, & aberrantes oues meas in desertis, in speluncis, in cauernis terræ, traditas agri bestiis deuorandas, quas tamen meo sanguine comparaui: non dico plura. Hæc enim factis, vt intelligas quid ego requiram abs te. Hæc dominus clementissimus Iesus tibi hodie in spiritu lenitatis. Vide ergo, & diligenter attende, ne quando in spiritu iræ, & vindictæ, mutato sermone possit

possit iure optimo conqueri contra te : & coram  
Angelis , & Sanctis suis dicere : O habitatores  
Hierusalem, & viri Iuda, iudicate inter me & vi-  
neam meam. Quid debui vltra facere vineæ meæ,  
& non feci ? Expectabam autem vt faceret vuas,  
& fecit labruscas : & exposuit me ludibrio hostibus  
meis , vt blasphemetur nomen meum inter illos.  
Sed absit , vt in hoc verbo tam tristi mea conclus-  
datur oratio : meliora enim spero , ac viciniora sa-  
luti. Quamobrem flecto genua ad patrem domi-  
ni nostri Iesu Christi : & vos omnes oro, & vos in  
primis, qui pro Christi vicario amplissima legatio-  
ne fungimini : Oro inquam vos , & obtestor per  
viscera illius paternæ diuinæ misericordiæ , vt om-  
ni nisu , quem parturitis , nobis tandem partum  
exhibeatis, formatúmque Christum : vt ego illum  
quasi in vlnis meis excipiens tâquã alter Simeon,  
& sicut candidus olor ad vada felicissimæ mortis  
euolans, hoc dulce melos valeam decantare : Nunc  
dimittis seruum tuum domine secundum verbum  
tuum in pace : quia viderút oculi mei fructum syn-  
odi salutaris, quam parasti ante faciem omnium po-  
pulorum , lumen ad reuelationem gentium, & glo-  
riam veræ plebis Israel. Fiat, fiat. *γένοιτο, γένοιτο,*  
Amen. Amen.



Oratio Illustriss. D.D. Francisci à To-  
leto oratoris Cæsarei ad Synodum,  
habita die octaua Aprilis.

M. D. XLVI.

*vnà cum Responsione eiusdem Synodi.*



AEsarea Maiestas exinno illo amore,  
& studio singulari, quo vniuersam Rē  
pub. Christianam sedulo fouere solet  
ac prosequi, vos omnes reuerendiss.  
Domini quotquot in hac Sacrosancta  
Synodo in fide & sinceritate Euangelica estis con-  
gregati, officiosissimè per me salutatos esse voluit  
in Christo, qui pro sua ineffabili erga genus huma-  
num benignitate, & clementia, afflatu diuini spi-  
ritus, conciliare dignetur Christianorum omnium  
animos in gratia, & pace, & in Euāgelicę lucis ve-  
ritatē confirmare. Quoniam autem vniuerso ferè  
orbi terrarum satis manifestum, exploratūque  
esse arbitror, Cæsaream Maiestatem nihil vnquam  
in vita sibi statuissē magis palmarium, magisque  
imperatorio, quod sustinet, munere dignum, quàm  
Christi gregem, pretiosissimo illo sanguine redem-  
ptum, non modò ab omni hostium iniuriā defen-  
dere, ac armis & potentia tueri, verùm etiam ad  
resarciendam Christiani populi concordiam, sedan-  
dos quosuis tumultus, tollenda quælibet seditio-  
nis & discordiæ semina, grauissimos sumptus, vi-  
gilias, labores, etiam capitis sui periculo suscipere:  
superuacaneum fore videatur, si huiusmodi rerum  
longiore commemoratione perquam ampliss. Pa-  
ternitates

ternitates vestras, tanta negotiorum magnitudine impeditas, diutius velim remorari. Ecquid enim opus est, obsecro, vel aliunde locupletiora petere testimonia, vel earum rerum certiore fidem nobis astruere, quarum usus & experimentum penes nos ipso est, Patres amplissimi? Quāto enim acriore studio pacis, quanto ardentiore zelo pietatis & Ecclesiæ (quæ laudatissima meritò in principe virtus est) Cæsarea Maiestas perpetuò exarsit: tanto vehementiore animi gaudio tempus hoc acceptabile amplexata est, quo per Sanctiss. D. N. Paulum I I I. publicati, patefactique Concilij œcumenici dies populo Christiano faustissimus ptimùm illuxit. Qua quidem oblata occasione, ne rei tantopere exoptatæ defuisse videretur inuietissima Cæsarea Maiestas, vel potentia, vel auctoritate, vel opera: extemplo misit ad Reuerendiss. D. V. qui vires suas in Sacrosancto hoc Concilio administraret, D. Didacum à Mendocia, virum non minus virtute, eruditione, iudicio, rerum usu, quàm imaginibus illustrem, ac planè dignum cui tantarum rerum provincia committeretur. Is quidem in ipsis negotiorum foribus quartana febre correptus, cum in dies magis ac magis inualescēte morbo affligeretur, ac Venetias ad legationem veterem se recepisset: Cæsareæ Maiestati visum est, illi me collegam adiungere: vt susceptum huius legationis onus cum altero mihi commune, interim dum redeat, sustinerem, quemadmodum ex cōmonstrato Cæsareæ Maiestatis mandato copiosius Reuerendiss. D. V. intellexisse existimo. Quod reliquū est, Patres amplissimi, Præsules vigilantissimi, dominum Deum

communibus votis omnes oremus , vt istis vestris  
tam sanctis , tam pijs conatibus diuino suo numi-  
ne aspirare dignetur:& quod huius negotij præci-  
puum caput est, robur, & stabilitum, Sanctiss.  
D. N. Paulum I I I. & Inuictiss. Cæsarem, in hac  
tam pari, ac germana quadam animorum confor-  
mitate quamdiutissimè conseruet, qua ipsi inter  
se se mutuo coniunctissimi, omnes rationes, con-  
silia, studia, conatus, & vires in asserendam Euan-  
gelicam libertatem conijciant: vt quæcunque se-  
culi malignitate, morum corruptela, vitæ licen-  
tia, vitiorum omnium seminarijs, in Christi spon-  
sa Ecclesia fœdata sunt, in pristinum illum candor-  
em restitui possint: atque vtriusque solerti indu-  
stria, diligentia, cura, sedulò laborent, vt ex agro  
Domini omnia conuulsa zizania, omnes errorum  
caligines, ac tenebræ profligatæ, ad coruscantem  
Euangelij lucem tanquam vmbra euanescant.

Dixi.

## Responsio Synodi.



Aduentus Dominationis vestræ huic Sacrosanctæ Synodo gratissimus est, tum propter eam obseruantiam, qua meritò Augustiss. Imperatorem Synodus ipsa prosequitur, tum propter fauorem, quem de pijsimo animo Maiestatis suæ in tam sancto, ac vniuersæ Christianæ Reipub. salutari opere, sibi firmissimè pollicetur: cui etiam Dominationis vestræ præsentiam ob præstantes eius animi dotes, & religionis studium, plurimum adiumenti allaturam sperat. quare & Dominationem vestram grato ac beneuolo animo amplectitur, & mandata Cæsareæ Maiestatis per eam exhibita, & producta, quantum de iure debet, admittit, vehementer dolens de eius Collegæ clarissimi viri, & huic Sanctæ Synodo multis nominibus gratissimi, aduersa valetudine, & ei melius esse magnopere cupiens. Pro coniuncta verò ipsius Augustiss. Imperatoris cum Sanctiss. D. N. P A V L O I I I. Pont. Max. in orthodoxa fide, & religione nostra tuenda & conseruanda, voluntate, omnipotenti Deo omnium bonorum authori, quantas maximè potest gratias agit, quem assiduè precabitur, vt pijs vtriusque studijs, ad ipsius omnipotentis Dei laudem, & gloriam, religionis Christianæ incrementum, & Ecclesiæ pacem, prosperumque in omnibus, & optatum ipsius Sanctæ Synodi successum, aspirare dignetur.

Oratio

Oratio clarissimi atq; facundissimi viri  
D. Petri Danesij oratoris Christianissimi  
Francorum Regis ad Synodum.



Euerendissimi Legati & Cardinales,  
Archiepiscopi, Episcopi, cæteri omni-  
um ordinum in hanc sanctam Syno-  
dum cooptari & conscripti Patres,  
sicut Christianissimi Regis præcipuus  
antea pro eius pietate erat dolor ex miserrimis &  
post hominum memoriam turbulentissimis Eccle-  
siæ temporibus susceptus, ita nunc eximix cuius-  
dam lætitiæ causam attulit noua trāquillitatis ob-  
lata spes, quam sacri huius Concilij nomen ex-  
pectatiōq; commouit. Neq; enim potuit aut non  
sperare id futurum, quod vos auctore ipso Conci-  
liorum præside Deo agere sciret, aut quod maxi-  
mè semper expetisset, non vehemēter euenturum  
esse lætari. Nec verò conuenire existimauit, quum  
de summa re Christiana ageretur, non singulare  
existere Christianissimi Regis studium, qui ad be-  
ne de ea merendum cum cognomine sibi hæredi-  
tario, tum plurimis maiorum exemplis inuitaretur.  
Itaque quod facturus ipse, si præsens adesset, fue-  
rat, vt vos, etsi sponte currentes, tamen acrius in-  
citaret ad populi Christiani pacem ac concordiam  
recōciliandam, sacerdotij dignitatem propè amis-  
sam recuperandam, veteres nimiumq; diu negle-  
ctas Ecclesiæ ruinas fulciendas: ad eaque confi-  
cienda suas omnes curas, consilia, cogitationes,  
opes, polliceretur: id nobis legationis huius mu-  
nere

nere imposito, suo nomine vt faceremus , manda-  
uit. Cuius ego legationis summam priusquam vo-  
bis, Patres, expono, quod quidem extrema oratio-  
ne mea faciam : pauca quædam necessariò dicam  
cum de plurimis Regum Franciæ superiorū in Ec-  
clesiam meritis , tum de huius ipsius , à quo alle-  
gati sumus, Francisci, perpetuis in eandem officijs:  
non quo hunc ita velle arbitrer, aut illos vt clario-  
res fiant, egere præconio putem. Neq; enim aut hic  
quum ita se gereret, vt & ipso & eius maioribus di-  
gnum erat , inanem nescio quam verborū laudem  
expectauit : aut illorum res pro Christi Ecclesia  
gestæ ita sunt vel obscuræ vt illuminari, vel com-  
munes vt ornari , vel deniq; tenues vt amplificari  
cuiusquā oratione debeant. Sed & hic qui se vni  
Deo probatum vellet, sola rectè factorū consciens-  
tia facilè contentus , id demum bene agendo spe-  
ctauit semper, bene vt ageret : & illorum eæ quas  
dixi, actiones huiusmodi certè sunt, vt nullam nō  
orationis facultatem , nedum meam , quæ sentio  
quàm sit modica , exuperent. Verùm id , vt dixi,  
necessariò ita faciam , vt intelligere possitis Chri-  
stianissimum Regem quæ nunc à vobis postulet, ea  
iure meritóq; postulare. Et tamen ita orationi mos-  
derabor meæ , vt nemo non sit existimaturus , me  
plura, quæ explicari quanuis ornatè potuissent, sim-  
pliciter potius nudéq; breuitatis studio protulisse,  
quàm aliquid ex rhetorum artificio ac præceptis  
facere amplius voluisse. Vos modò Patres sanctis-  
simi, benignè me & attentè his de rebus ita vt os-  
tendi, dicentem facilè quæso audiatis.

Francorum Reges iam inde à Clodouæo primo  
nostræ

nostræ gentis Christiano Rege, inter cæteras, quibus meritò celebrantur, virtutes, egregia quadam pietatis laude floruerunt. Cuius rei argumentum esse videtur, quòd vnum hoc regnum adhuc extitit, in quo Christiana religio per annos plus mille nunquam intermissa, sincerissima semper perseuerarit: vt quomodo bene constituto in corpore purus sanguis, item in illo regno quædam religionis quasi sanitas perpetuò constiterit. Certè sanctissimus pontifex Gregorius pius, quod epistolis eius constat, Childebertum Francorû Regem Catholici cognomine iã tû ornauit, graui testimonio eius, quam dixi, incorruptæ castæque religionis. Hanc igitur illi semel susceptam vt naturali suo candore præditam tuerentur, neque alienis, vt ita dicam, coloribus oblini vlla dæmonis mali arte sinerent: quum in eo omnes suas curas cogitationesque defixissent, operam semper dederunt, primùm vt quantum humana diligentia effici posset, nequa in animis suorum noua existeret contra Ecclesiæ sententiam vlla de re opinio: deinde vt si quid tale fortè accidisset, sicut est inimicus ille noster in superferendis zizanijs diligens, id statim animaduersum, priusquam conualuisset, opprimeretur: tum autem nequa vllius partis diuulsio à catholica Ecclesia fieret, neu quod præcipuis etiam in locis nonnunquam vsu venisset, in aliqua Imperij Francorum parte accideret, vt essent alij qui Catholici, alij qui varijs à suæ quisque sectæ auctore nominibus appellarentur. Nec his contenti quasi domestici officij regionibus, non aliena etiam, quoties res tulit, eadem pietate curarunt:

sed



sed & finibus suis egressi , & cum exteris gentibus congressi , quas vel impio dæmonum cultui deditas , vel aliqua hæresis labe infectas comperissent , quum prius omnia experti , monendo, suadendo, denuntiando, nihil profecissent, pijs illas armis ita fregerunt , vt vel falsa superstitione abdicata, vel prauis opinionibus reiectis, veram sanamque profiteri religionem cogerent. Ac ne multa vtriusque rei exempla afferam , quod & longum esset , nec certè hoc tempore necessarium videtur, eius quod posterius posui, testis erit ille quem modo nominaui, Childebertus, qui Visigothos bello aggressus, Christianos illos quidem, sed partium in Ecclesia Arianarum , huc tandem eos necessitatis deduxit, vt & impium Arii dogma repudiarent, & ad Catholicæ Ecclesiæ , à qua alieni erant, partes traducerentur. Prioris fidem faciet Carolus à rerum quas gessit magnitudine cognomen Magni nactus. Is enim suscepto in Saxonas bello, Christianæ tunc pietatis teterrimos atque acerbissimos hostes, sic illos per annos amplius triginta exercuit , & ad vltimum etiam perdomuit, vt vera religione imbuti, & salutari aqua tincti, in Christi nomen infererentur. Et huius quidem generis vtriusque multa Franci. Iam verò, quum Romanam Ecclesiam, cui ille Apostolorum princeps præsedisset Petrus, orbis terrarum principatum semper obtinuisset, eiusque Episcopum capitis loco à reliquis magno consensu Episcopis habitum esse didicissent : piè hoc quoque ac præclare fecerunt , vt qui & Ecclesiam & Episcopum præcipuè sibi colendos proposuissent , vtriusque & opes opibus suis augerent:

rent:& quum res posceret, pericula periculis item  
suis propulsarent. Pipinus enim, vt taceam quæ  
huius pater Carolus cognomento Martellus gessit,  
quum Aistulphus Longobardorum Rex pluribus  
per vim occupatis Romanæ Ecclesiæ oppidis  
vltius progrediretur, vt nisi capta vrbe Roma  
finem facturus iniuriarum non videretur: precibus  
exoratus Stephani pontificis, incredibili celeritate  
superatis Alpibus, indeque deiectis hostium præ-  
sidijs, quæ omnes saltus infederant, exercitum in  
Italiam transportauit:& Aistulphum acie congre-  
di nō ausum, Ticini, quod se ex fuga receperat, tan-  
diu obsedit, quoad is datis obsidibus, & iureiuran-  
do interposito, confirmaret se & erepta Romanis  
redditurum, nec quæ restituisset vllō vnquam postea  
tempore repetiturum. Quid huius Carolus fili-  
us, qui à rerum (vt paulò antè dixi) gestarum ma-  
gnitudine cognomen inuenit? Quæ fecit? Nempe  
eadem qua pater pietate, sed successu proculdubio  
& fœlicitate maiore, aliud similem ob causam bel-  
lum aduersus eandem gentem suscepit & gessit.  
Nam quum Desiderius in Aistulphi locum mortui  
suffectus, partim sua ipse virtute confisus, partim  
Caroli occupationum opportunitatem sequutus,  
quod is tum maximè grauissimo Saxonico bello  
implicatus videretur, nō solūm reddita ab Aistul-  
pho Romanis oppida iterum inuasisset, sed & de  
Vrbe ipsa occupanda palàm consilia iniret, in quā  
totus spe & cupiditate imminebat: Adrianus pon-  
tifex qui Stephano successerat, Legatos ad Caro-  
lum misit, qui & periculi sui magnitudinem ei pro-  
ponerent, & in Ecclesiæ propugnatione patriæ il-  
lum

lum auita<sup>q</sup>ue virtutis admonerent. Id igitur tum bellum ita ille suscepit: quod tanta Francorum militum, & tam incredibili virtute & patientia confecit, vt Desiderium, qui se Ticini incluserat, longa obsidione fractum, & in potestatem redactum, exilio multauerit: Aldegisium eius filium, in quē sublato patre omnium se Longobardorum animi conuerterant, cedere Italia coegerit: Rhogandum quendam Longobardici generis hominem, quem Foroiulianis ducem à Longobardis impositum, ipse in imperio confirmarat, beneficij oblitum, resque nouas molientem oppresserit: denique Italia propè omni potitus, fundatissimi in ea per tot annos regni opes funditus euerterit. Romano autem pontifici, cuius vnus causa res tantas gesserat, non solum ablata restituit, sed & Rauennatem insuper exarchiam, Flaminiam, AEmiliam cōdonauit. Ob quæ merita Adrianus quum in Synodo Romæ habita plurium Episcoporum, de præmijs quæsisset quibus tantam regis Franci cum in defendenda Romana Ecclesia tanquam matre pietatem, tum in ornanda liberalitatem, animique magnitudinem remuneraretur: decretum de Concilij sententia, in hæc ferè verba fecit: Placere vti Carolo Francorum Regi, posterisque eius Francorum Regibus, honoris virtutisque causa, ius in perpetuum esset, Romanum pontificem quem fieri vellent edendi: eamque sedem, quum rectore vacua foret, ordinandi: reliquarum verò Franciæ ditionis prouinciarum Episcopos, quum more institutisque maiorum facti essent, laudandi approbandive: vt nisi quem Rex laudauisset, nemo consecraretur: tum autem fidelitas

tis

tis iureiurando obstrictos, ita quasi in possessionem muneris sui & potestatis mittendi. Id enim illo inuestiendi verbo, quo decretum vtitur, significari volunt iuris pontificij periti. Nouus omnino honor (cur enim non fatear?) & tum certè primum velut in exemplum proditus. Sed erant illa quoque quibus tribuebatur, noua & singularia merita: vt minimè sit mirum, nouis inusitatísque beneficijs, noua etiam atque extraordinaria esse præmia constituta. Ac licet Ludouicus pius Caroli magni filius, prius illud ius Romanum pontificem edendi, vltro postea remiserit: id tamen in remittendo disertè excepit, vt simul atque electus quispiam & consecratus Romanus pontifex esset, necesse is haberet, legatos ad se suosve successores Francorum Reges mittere, qui mutuam inter ipsos, hoc est Romanam Ecclesiam Francorúmque regnum, amicitiam, charitatem, pacem consociarent. Quod ipsum ita profectò semper successit. Siquidem sanctíssima hæc necessitudo ac coniunctio Romani pontificis Francorúmque Regis nunquam ex eo tempore intermissa, sed multis potius & magnis vtrínque officijs culta, quum vterq; suam in alterius dignitate contineri dignitatem existimaret, integra adhuc incolumisque permansit: vt verissimum esse videatur quod tertius Innocentius sua quadam ad Galliarum episcopos missa epistola testatus est, Francorum regni exaltationem (ipsius enim verba, quo magis agnoscantur, ponam) sublimationem Apostolicæ sedis esse: viderique id regnum præcipua quadam gratia à Deo benedictum, cuius & Rex & populus sinceram semper Christianam

nam

nam fidem retinuisse, & singulare quoddam exis-  
miūque studiū in Ecclesiam, & precipuē in Ro-  
manam præstitissent: & certē (quod illa quæ dixi,  
maximē confirmet) Romani ipsi pontifices diffi-  
cillimis vel suis vel Ecclesiæ tēporibus, quum aut  
tyrannorum iniurijs pulsi sede sua carerent: aut de  
motibus paulò seuerius corrigendis, seditionū ve  
fluctibus sedandis cogitantes, vim veresentur: ut  
in portum, sic in Galliam ferē ad Francos se rece-  
perunt, quorum tunc pietate liberius concilia hisce  
de rebus habere possent. Cuius rei testis est gene-  
ralis illa Remensis, cui ipse Romanus pōtifex præs-  
fuit, synodus: testis Claromontana, cui Urbanus;  
Turonensis, cui Alexander: Lugdunensis, cui Gre-  
gorius præfuerunt. Testes aliæ item complures;  
quarum nunc quidem nominibus, ne longior sim,  
parco: Ac possem equidem Patres sanctissimi, alia  
huius generis penē innumerabilia afferre, quibus  
Francorum Regum excellens quædam in Deum  
eiusq; sponsam Ecclesiam pietas, luce clarius pro-  
baretur: sed vereor ne hæc quoq; ipsa modum quē  
mihi initio constitui, excesserint. Certē incredibi-  
le quiddam dictu est ijs, qui in memoria superio-  
rum temporum euoluēda accuratius versati non  
sunt, quā multa Franci pericula sponte adierint,  
quā & quā graues ærumnas pertulerint; quā  
immanes sumptus, nec pecuniæ solum, sed & san-  
guinis sæpe sui fecerint, hanc vnā ob causam, vt  
aut Christiani imperij fines proferrent, & occupa-  
tas à feris barbarisq; & huic semper nomini inimi-  
cis gentibus prouincias recuperarent: aut Romanos  
pontifices vel eiektos in suam rursus sedem

restituerēt: vel de suo statu dubitātes cōfirmarent,  
periculūque eximērent. Quorum multæ nobilissimæque victoriæ, etsi scriptorum laude bonorum caruerunt, propter eam quæ tum vbiq̃ue erat, literarum penē omnium, sed eloquentiæ maximè, cladē & quasi interitum: grata tamen hominum recordatione ab obliuionis iniuria vindicatæ, ad omnem posteritatis memoriam peruenient. Turcæ mediūstidius ipsi, & (vt vno verbo dicam) totus Oriens, quum a Græcis quibuscum viuūt assidueq̃ versantur, discesserint, nullum aliud Christianorū nisi Francorum, nomen nouerunt: quo vno omnes quæ hīc ad solis occasum incolunt, gentes populosque significant. Tam crebris illi videlicet tamque illustribus laudum suarum vestigijs omnē prope modum Asiam impresserunt, vt mirari quis iure non queat, quid sit cur Romani pontifices præcipua semper charitate Francos, tanquam primogenitos quosdam Ecclesiæ filios, complexi sint, legibus canonicis sæpe soluerint, priuilegijs ornarint, multorum immunitate & vacatione munerum donarint, breuiter eximio quodam in Ecclesia, quasi ciuitate, iure esse voluerint.

Ab his profectus maioribus (quod erat ex duobus quæ proposueram, alterum) Christianissimus Rex Franciscus, haud dissimili atque illi, pietate, primo statim aditu atque ingressu principatus sui, quum esset recenti clarissima apud Insubres victoria potitus: Bononiam vsq̃, quod accessisse, vt secum congredetur, Leonem x. Pontificem maximum audierat, processit: cum illo certam amicitiam, fœdusque firmavit, ijs conditionibus, quæ tunc ytri-

usque



usque voluntate perscriptæ etiamnum seruantur.  
Hanc eandem postea amicitiam eisdemq; illis con-  
ditionibus, cum Adriano, Clemente, hoc ipso Pau-  
lo tertio habuit, & sanctissimè semper coluit: à  
quibus vicissim magna sæpius pietatis suæ testis-  
monia tulit. Quid hinc commemorare perpetuas  
eius excubias & custodias sanctissimæ nostræ reli-  
gionis? Quæ quū per hosce sex & viginti annos ita  
iactaretur, in hæc quam omnes meminimus, pare-  
tismque etiam sentimus, contrariarum opinionum,  
quasi ventorum tempestate, vix vt statui posset  
quid quisq; sequeretur, id egit, quod pro sua & ma-  
iorum suorum perpetua consuetudine sapientissi-  
mè potuit. Quod enim acceperat & ipsorum exem-  
plo Apostolorum traditum, & à catholicis Princi-  
pibus semper obseruatum, vt de ijs quæ de fide in  
quæstionem vocarentur, nihil à quoquam priuata  
auctoritate cōstitueretur, sed Ecclesiæ potius audi-  
cium, quo omnes stare oporteret, expectaretur.  
ita sanè fecit, diligentissimè in omnes partes euit,  
ne quid omnino in cōmuni Ecclesiæ vsu nouaretur.  
quū interea nō deessent, qui multa cū in doctrinā  
populi Christiani, tum in moribus vitæq; institutis  
mutāda esse censerent, idq; adeo tētare auderent.  
sed integrā omnium quæ à quoq; noua proferrētur,  
causam vestris Patres iudicijs reseruauit. Quā rem  
quo facilius assequeretur, qui esset suo pte ingenio  
ad clementiā ac lenitatē pronior, & vel à singulorū  
hominū, quoad publica salus pateretur, poenis ab-  
horreret, coactus est interdū in tanta multitudine  
peccatiū, & omnia miscere ac perturbare paratorū,  
contra naturā suā esse seuerior, vt grauiora in illos

inoup ba



edicta proponeret, si qui auderēt priuata temeritate, Ecclesiæ statū conuellere. Ita perfecit cum sua diligentia, tum iudicium suorum incredibili in exequendis edictis studio & vigilantia, ut in tanta re pentē coorta tempestate, in qua difficillimum videbatur, cursum tenere, facillimè eò quod intendeat, perueniret: quum tamen multas sæuissima hæc procella ciuitates, imò verò, prohi Dei immortalis fidem, nationes gentesque totas vel euerterit, vel grauissimè, certè affligerit. Pacatani dat vobis Patres amplissimam, nobilissimamque prouinciam. Nihil in ea nouum, nihil alienum, nihil non ex veteri more ac disciplina publicè introductum reperietis. Omnia in illa vetera, doctrina, ritus, cæremonia, mores, instituta constant. Vos nunc de omnibus ea statuite, quæ vera, quæ à Republica esse, quæ ad summam populi Christiani concordiam, & ad Dei gloriam pertinere vobis videbuntur: ne, quod adhuc magno piorum omnium animi dolore accidit, ultra eueniat, ut impuri Turcæ, nefarii Iudæi, & vtrisque importuniores, non homines, sed in hominum figura belluæ, noui quidam horum temporum Epicurei, qui omnem ex hominum animis tollere humanitatem, religione demenda conantur: suo illo incesto ore sanctissimæ nostræ pietati conuicium faciant: & quod imperitis iure agere videantur, crebrò illud nobis exprobrent. Vbi est Deus eorū? Porro autem quum id etiam animaduerteret Christianissimus Rex, quantā semper vim habuisset ad res continendas, esse vnum in Ecclesia Romanū Episcopum, utpote Petri successorē, reliquorum & dignitate & auctoritate principem,

ad quem

ad quem ceteri vt ad caput referrentur: qua maxi-  
mè re, nostra hæc in terris militans Ecclesia, illius  
in cælo triumphantis effigies quædam agnosceretur:  
non minore cura ac studio prouidit, nequa inde  
secessio defectiõve vllam ob causam accideret.  
In quo vel clarissimè Regia virtus & constantia  
enituit. Sæpius enim omni ratione tētatus, & mul-  
tis inuitatus nec ijs vulgaribus commodis, vt aliis  
quid auderet aliquando, nec editum ab altero ex-  
emplum dubitaret sequi, perstitit in sententia: vt  
quorundā propterea finitimorum amicitiam desi-  
derarit, eaq; re parum sit suorū quieti & otio con-  
sulere visus. Sed vir maximus & excellenti animi  
robore ac pietate præditus, iustum bellum, quàm  
inhonestam pacem maluit. Post autem vt primùm  
certior est factus, conuentum Christiani nominis  
vniuersi hanc in urbem indictum esse à Paulo ter-  
tio pontifice maximo, in quo de tantis Ecclesiæ  
incendijs cōmuni tandem cōsilio restinguendis  
ageretur: iamq; eò aliquot paruo numero, sed & sa-  
pientia & sanctitate præstātissimos Patres præmis-  
sos, qui ea quæ Concilio necessaria viderentur, cō-  
pararent, administrarent: sibi non defuit, quin eo-  
dem delectos è suis Episcopos mitteret cōmuniū  
participes curarum & socios futuros. Deniq; ali-  
quo satis magno tēporis spatio interiecto, vt rem-  
feriõ agi, & confessionibus duabus tribusve aliquot  
iam auctoritates vestras perscriptas esse allatum  
est: qui illuc vsq; omnia fecisset quæ principem &  
re & nomine Christianissimum decerent, minimè  
iudicauit conuenire, suum in re tam necessaria,  
tāmq; & à se & ab omnibus bonis semper exopta-

ta officium non constare. Itaq; qui multo fecisset  
libētius, si regni negotia id pati possent, hīc vt ad-  
esset, vbi tot sanctissimos dei sacerdotes diuino (vt  
credi par est) spiritu afflatos maximis de rebus cō-  
stituentes videret, quorū in vultu, gestu, oratione  
acquiesceret: quod proximū erat, Legatos procu-  
ratorēsq; suos & volūtatis interpretes nos misit cū  
his mandatis quæ ego nunc, quādo priora illa duo  
præteruēcta oratio est, vniuersè tantūm summa-  
tīmque exponam. Spero enim fore, vt posthac sæpe,  
quoties quidem certè visum fuerit esse opus, de sin-  
gulis propriè accuratēq; agēdi, sit nobis voluntate  
vestra, locus. Vos quæso quemadmodum superiora  
fecistis, hæc quoque pauca benignè attentēq; Patres  
audiatis. Hæc est igitur mādatorū Christianissimī  
Regis summa. Etsi minimè is quidē dubitat, quin  
vos omnia, de quibus conuenistis, quæq; ab hoc san-  
ctissimo Concilio expectantur, summo sitis studio  
per vos acturi: à vobis tamen pro sua pietate in  
Deum, obseruantia in hunc ordinē, & in populum  
Christianum vniuersum charitate, vehementer pe-  
tit, vt pacis concordiaq; causa, ac ne amplius non  
solum imperitæ imbecillæq; multitudinis, sed quo-  
rundam etiā robustiorū licet lenium, mentes flu-  
ctuent, & in diuersa ac contraria ferantur, quæ res  
Ecclesiæ statum perturbet, & tanquam vnitatem  
abrumpat: de doctrinis ea semel cōstituatis, publi-  
cēque proponatis, quæ omnes vbiq; Christi fidem  
professi sequantur, teneant, credant. Nec enim fie-  
ri potest, vt aut alia ex re vlla maior existat animo-  
rum disunctio, reiūq; publicæ perturbatio, quàm ex  
sententiarum quæ de religione habeantur, dissidio:

aut non

aut non libentissimè omnes assentiantur ijs quæ  
vos auctore eo qui huic loco præsidet, sanctissimo  
Dei spiritu, comprobaueritis. Deinde quum omnia  
ferè Ecclesiæ mala & incommoda ex eo fonte pro-  
fluxisse multis videantur, quodd omnium penè or-  
dinum ministri Ecclesiæ ab illa priscorū temporū  
sanctitate & innocentia plurimū deflexerint, vix  
vt tenue eius vestigium iam appareat: etiam vos ro-  
gat & obtestatur, vt vitæ morūmq; in ecclesiasticis  
personis disciplinam acerrima sacrorū canonū nor-  
ma dirigatis. Ita enim fiet, vt hic ordo, qui præluce-  
re cæteris & ad doctrinā, & ad vitæ exempla de-  
beret, nunc autē maximo Reipublicæ malo, ob plu-  
rimas quorundam labeſ & maculas, vulgo est de-  
spectissimus, longo interuallo pristinū suum splen-  
dorem dignitatēq; obtineat. Ex quo illud mox  
consequetur, vt quum tanta iā esse cœperit in hoc  
ordine auctoritas, quāta esse in moderatoribus ma-  
gistrisq; vitæ debet, latius se fundat vtilitas: vt quæ  
in peculiarem Dei populum, id est, eos quos pro-  
pterea maiores nostri Clericos vocitarūt, priuatim  
sanxeritis, eadē valeant in omnes: nullūsq; iam to-  
to in corpore Ecclesiæ nūuus, labeſ nulla, nulla ru-  
ga, quæ quidem sponſum grauius queat offendere,  
relinquatur. Agitedum ergo excitamini per De-  
um immortalem aliquando Patres, & in causam  
tantam, tam grauem, tam necessariam totis pecto-  
ribus animisq; incumbite: de doctrinis, de mori-  
bus ea statuite ac decernite, quæ sapientissimus il-  
le huius moderator Concilij spiritus, vobis sug-  
gesserit, quibus populus omnis Christianus, quasi  
certissimis ab ipso Deo editis oraculis libēs pareat.

G. iij. Ea

Ea certè vt in Gallijs totòq; Francorum in impe-  
rio obseruentur, Christianissimus Rex pro sua pie-  
tate curabit. Has sibi ille partes deposcit. Vestròrū  
ille decretorum curam, patrocinium, propugnatio-  
nem proficitur. In eam rem omnes Regiæ potesta-  
tis neruos intēdet: gladij etiam, quem à Deo por-  
rectum ad maiorū (vt sanctissimus ait Apostolus)  
vindictam, bonorum verò laudē gestat, vim aci-  
emque (si ita opus sit) experietur. Denique quum  
tanta esse constet Francorum Regum in Ecclesiam  
( & præcipuè Romanam ) merita, quibus maiores  
vestri, summique pontifices, quæ amplissima habue-  
runt præmia, semper tribuerint: à vobis hoc po-  
stulāt, quod est profectò æquissimum, ea sibi vt  
præmia conseruetis, neque quicquam omnino im-  
minui aut mutari patiamini eorum quorum in pos-  
sessione cum ipse ille, cuius antè memini, Ludoui-  
cus pius Caroli Magni filius, tum alij deinceps  
Francorum Reges sine vlla dubitatione aut con-  
trouersia fuerint. Postremò vt omnibus Galliarum  
Ecclesijs, quarum ipse tutelam à maioribus reli-  
ctam & commendatam habeat, sua omnia iura,  
priuilegia, immunitates confirmetis. Hæc si fece-  
ritis, erit cur & gratias vobis quàmmaximas vni-  
uersi ex Gallijs agamus, nec vos ita aut sensisse  
aut fecisse, vnquam poeniteat.

Nomina, cognomina, tituli, dignitates, prouinciæ, & gradus in Sacrosancta Synodo Tridentina existentium.

*Reuerendiss. Cardinales.*

Ioânes Maria de Mõre Epif. Preneftinẽ. Aretinus.  
Marcellus Ceruinus, tt. Sanctæ Crucis in Hierufalem.  
Florentinus.  
Reginal. Polus S. Mariæ in Cosmedim. Anglicus.

*Legati ad Concilium.*

Chriftophorus Madrucius S. Cæfarij. Triden.  
Petrus Pacechus. tt. S. N. Gieneñ. Hispanus.

*Archiepifcopi.*

Antonius Filioli Matifconeñ. Archiepifcopus  
Aqueñ. Gallus.  
Saluator Alepus Archiepifco. Turrifañ. Sardus.  
Ioannes Michael Sarracenus Archiepifcopus Materañ.  
Neapolitanus.  
Olaus Magnus Archiepifcopus Vpfalen. Gothus.  
Petrus de Caliauea Archiepi. Panorm. Siculus.  
Robertus Venantius cæcus Archiepifcopus Armachañ.  
Scotus.

*Epifcopi.*

Marcus Vrgerius Epifcopus Senogallia. Saonẽfis.  
Philiber. Ferrerius, Epif. Hipporegiẽ. Pedemontan.  
Io. Tho. Semphelius Epif. Cauen. Neapolitanus.  
Thomas Cãpegius, Epif. Feltrẽfis. Bononienfis.  
Catalanus Triuultius, Epif. Placẽtin. Mediolanẽ.  
Leo Vrfinus, Epifcopus Foroliuien. Romanus.  
Alexãder de Piccolominib⁹, Epif. Piẽtin. Seneñ.  
Guiliel.



Guilielmus de Prato, Episc. Claromōten. Gallus.  
 Brachius Martelli, Episc. Fesulan. Florentinus.  
 Hēricus Leofredus, Episc. Caputaquen. Neapolit.  
 Eliseus Theodinus, Episcopus Soran. Arpinas.  
 Coriolanus Martyranus, Episc. S. Marci, Calaber.  
 Iacobus Cortesius, Episcopus Vasionen. Florent.  
 Angelus Paschalis, Episcopus Motulen. Illyricus.  
 Io. Fonsleca, Episcopus Castellimaris. Hispanus.  
 Petrus Bertanus, Episcopus Fanen. Mutinen.  
 Vincentius de Durantibus, Episcopus Termula-  
 rum. Brixienfis.  
 Claudius de Chize, Episcopus Agaten. Gallus.  
 Io. Salazar, Episcopus Lauzianen. Hispanus.  
 Hieronym<sup>o</sup> de Bononia, Episc. Syracusan. Siculus.  
 Aegidius Falcetta, Episc. Caprulan. Marchianus.  
 Ricardus, Episcopus V Vigornien. Anglus.  
 Cornelius de Missis, Episc. Bitontin. Placentin.  
 Marcus Malipetrus, Episc. Corfulan. Venetus.  
 Iacobus Iacomellus, Episc. Bellicastren. Romanus.  
 Franciscus de Nauarra, Episcopus Pacen. Hispa.  
 Didachus de Alaua, Episc. Astōricen. Hispanus.  
 Thomas Casellus, Episc. Britonorien. Calaber.  
 Galeatius Floremōtius, Episc. Aquinas. Neapolit.  
 Iacobus Anacletus, Episc. Clodien. Florentinus.  
 ViCTOR Sorancius, Episcopus Bergom. Venetus.  
 Antonius de Cruce Episcopus Canarien. Hispa.  
 Abbates.  
 Lucianus Mantuanus.  
 Isidorus Brixienfis, } Cōgregat. Cassin.  
 Chrysostomus Neapolitan<sup>o</sup>, } ordi. S. Benedicti.  
 Generales, & doctores ordinum.  
 Ordinis Prædicatorum.  
 Domini.



Dominicus Soto, Locumtenens. Hispanus.  
Ambrosius Catharinus. Senensis.  
Bartholomæus Miranda. Hispanus.  
Hieronymus Portugallensis.  
Ioannes de Vtino.  
Marcus Calaber.

Aloisius de Cathania.

Ordinis Minorum de obseruantia.

Ioan. Caluus, Generalis. Corfus.  
Vincentius Lunellus. Hispanus.  
Alphonfus de Castro. Hispanus.  
Andreas de Vega. Hispanus.  
Ricardus Cenomanus. Gallus.  
Ioannes Concilij. Gallus.  
Hieronymus Lombardellus. Veronensis.  
Baptista Castillio. Mediolan.

Ordinis Minorum Conuentualium.

Bonauentura Pius, Generalis. Vrbinas.  
Petrus Paulus Picentinus.  
Ioannes de Corregio.  
Franciscus Ferrarien.  
Sigismundus de Ruta.  
Hieronymus Birellus. Brixienfis.  
Franciscus de vita. Sculus.

Ordinis Sancti Augustini.

Hieronymus Seripandus, Generalis. Neapolit.  
Gregorius Patauinus.  
Aurelius Patauinus.  
Gaspar Syracusanus.  
Paulus Senensis.

Ordinis Carmelitarum.

Nicolaus Andetus, Generalis. Cyprius.  
Antonius

Antonius Marinarius. Appulus.  
Pontius Politius Semonensis.  
Martinus Castella Romandiolus.  
Stephanus Panormitanus.  
Vincentius Panormitanus.

**Ordinis Seruorum.**

Augustinus Generalis. Aretinen.  
Laurentius de Castro.

**Doctores seculares.**

Do. Sebastianus Pighinus Auditor Rotæ, & Scri-  
narius votorum Patrum. Regien.

Vgo Boncôpagnus Abbreuiator de Maiori. Bono.

Hercules Seuerolus Procurator Cōcilij. Fauētin.

Achillès de Grassis. Bononien.

Ioannes Murellus. Hispanus.

Bargas. Hispanus.

Petrus de Belasco. Hispanus.

Quintana. Hispanus.

Alfonfus Zorilla. Hispanus.

Morilla. Hispanus.

Franciscus Herera. Hispanus.

Claudius Teatin. Sabaudus.

**Officiales Concilij.**

Commissarij.

R. P. D. Episcopus Feltren.

Episcopus Hipporegien.

Episcopus Cauen.

Locumtenens, & Forerius.

Do. Antonius Bergomas.

Secretarius.

Do. Angelus Massarellus de Sancto Seuerino.

Capitaneus ad custodiam Concilij.

Illust.

Illust. Do. Nicolaus Madrucius Tridentin. cum  
magna copia Nobilium ante eum deferentium  
baculum unū rubeum longitudinis cannæ unius,  
& post illum multi hastarii.

Locumtenens.

Illust. Do. Sigismundus Comes Arce.

Magister Cereemoniarum.

Do. Pompeius de Spiritibus.

Spoletanus.

Cantores.

Iuo Baril.

Gallus.

Ioannes de Conre.

Flamingus.

Antonius Roial.

Gallus.

Petrus Ordognez.

Hispanus.

Ioannes de Monte.

Germanus.

Simon Bertolonus.

Perusinus.

Notarij.

Claudius de la Casa.

Lothoring.

Nicolaus Driel.

Alemanus.

Cursores.

Ioannes Rolliart.

Lothoring.

Maturinus Menandus.

Gallus.

Decretum primæ sessionis Tridētinæ  
pronuntiatum per Reuerendum domi-  
num Episcopum Castrimaris Hi-  
spanum , die septima mensis

Ianuarij anno Domini 2.6. D. 1545

M. D. XLV. K.



Acrosancta Tridentina Synodus in  
Spiritusancto legitimè congregata,  
in ea præsidentibus tribus Apostoli-  
cæ sedis Legatis, agnoscens cum bea-  
to Iacobo Apostolo quòd omne da-  
tum optimum & omne donum perfectum desur-  
sum est, descendens à patre luminum, qui ijs qui  
postulant à se sapientiam dat omnibus affluenter,  
& non impropert eis: & simul sciens quòd initiū  
sapientiæ est timor Domini: Statuit & decreuit o-  
mnes & singulos Christi fideles in ciuitate Tridē-  
tinā congregatos, exhortandos esse, prout exhor-  
tatur, vt se à malis & peccatis hactenus commis-  
sis emendare, ac de cætero in timore Domini am-  
bulare, & desideria carnis non perficere, orationi-  
bus instare, sæpius confiteri, Eucharistiæ Sacramē-  
tum sumere, ecclesias frequentare, præcepta deni-  
que diuina quantum quisque poterit adimplere,  
necnon quotidie pro pace principum Christiano-  
rum & vnitae Ecclesiæ priuatim orare velint. Epi-  
scopos verò & quoscūque alios in ordine sacerdo-  
tali constitutos œcumenicum Concilium in ciui-  
tate hac celebrantes, vt assidue Dei laudibus in-  
cumbere, hostias, laudes, & præces offerre, sacrifici-  
cium

cium missæ quolibet saltem die dominico, in quo  
Deus lucem condidit, & à mortuis resurrexit, Spī-  
ritum sanctum in discipulos infudit, peragere sat-  
agent, facientes sicut idem Spiritus sanctus per  
Apostolū præcepit, obsecrationes, orationes, postu-  
lationes, gratiarum actiones pro sanctissimo domi-  
no Papa, pro Imperatore, pro Regibus & cæteris  
qui in dignitate constituti sunt, & pro omnibus ho-  
minibus, ut quietam & trāquillam vitam agamus,  
pace fruamur, & fidei incrementū videamus. Præ-  
terea hortatur ut ieiunent saltem singulis sextis  
ferijs in memoriam passionis Domini nostri Iesu  
Christi, & eleemosynas pauperibus erogent. In ec-  
clesia autem cathedrali singulis quintis ferijs cele-  
bretur missa de Spiritu sancto, cum litanij & alijs  
orationibus ad hoc institutis. In alijs vero eccle-  
sijs dicantur ad minus litanie & orationes. Tem-  
pore autem quo sacra peragētur, colloquutiones &  
confabulationes non fiant: sed ore & animo cele-  
branti assistatur. Et quoniā oportet Episcopos esse  
irreprehensibiles, sobrios, castos, domui suæ bene  
præpositos, hortatur etiam ut ante omnia quilibet  
in mensa seruet sobrietatem, moderationem cibo-  
rum. Deinde quum in eo loco sæpe otiosi sermo-  
nes oriri soleant, ut in ipsorum Episcoporum mensis  
diuinarum scripturarum lectio admisceatur. Famī-  
liares vero suos vnusquisque instruat & erudiat, ne  
sint rixosi, uitiosi, impudici, cupidi, elati, blasphemī,  
& voluptatum auctores & amatores: vitia de-  
mum fugiant, & virtutes amplectantur, & in ve-  
stitu & cultu & in omnibus actibus honestatem  
præferant, sicut decet ministros ministrorum dei.

Adhæc



Decretum secundæ sessionis Concilij  
Tridentini, pronuntiātū die quarta men-  
sis Februarij, Anno M.D. XLVI.  
per Reuerendum Dominum  
Archiepiscopum Tur-  
ritanum.



**I**N nomine sanctæ & indiuiduæ Trini-  
tatis Patris & Filij & Spiritus sancti  
hæc sacrosancta œcumenica & gene-  
ralis Tridentina Synodus in Spiritu  
sancto legitimè cōgregata, in ea præ-  
sidentibus eisdem tribus Apostolicæ sedis Legatis,  
magnitudinem rerū tractandarū considerans,  
præsertim earū quæ duobus illis capitibus de ex-  
tirpandis hæresibus & moribus reformandis con-  
tinentur, quorū causā præcipuè est congregata:  
agnoscens autem cum Apostolo non esse sibi col-  
luctationem aduersus carnem & sanguinem, sed  
aduersus spirituales nequitias in cælestibus: cum  
eodē omnes & singulos in primis hortatur, vt con-  
fortentur in Domino & in potentia virtutis eius,  
in omnibus sumentes scutum fidei, in quo possint  
omnia tela nequissimi ignea extinguere: atque ga-  
leam spei salutis accipiant, cum gladio spiritus,  
quod est verbum Dei. Itaque vt hæc pia eius sol-  
licitudo principium & progressum suum per Dei  
gratiā habeat, ante omnia statuit & decreuit, præ-  
mittendam esse confessionem fidei, Patrum exem-  
pla in hoc sequuta, qui sacratoribus Concilij hoc  
scutum cōtra omnes hæreses in principio suarum  
H.j. actionum



actionū opponere consueuerunt:quo solo aliquan-  
do & infideles ad fidem traxerunt, hæreticos ex-  
pugnarunt, & fideles confirmauerunt. Quare sym-  
bolum fidei quo sancta Ecclesia Romana utitur,  
tanquam principium illud in quo omnes qui fidē  
Christi profitentur necessariò conueniunt, ac fun-  
damentum firmum & vnicum contra quod nun-  
quam portæ inferi præualebunt, totidem verbis  
quibus in omnibus ecclesijs legitur, exprimendū  
esse censuit, quod quidem eiusmodi est: Credo in  
vnum Deum, &c. vt est in Missali. Eadē Sacrosan-  
cta œcumenica & generalis Tridentina Synodus  
in Spiritus sancto legitimè congregata, in eadem  
præsidentibus eisdem cribus sedis Apostolicæ Le-  
gatis, intelligens multos Prælatos ex diuersis par-  
tibus accinctos esse itineri, nonnullos etiam in via  
esse quò huc veniant: cogitansque omnia ab ipsa  
sacra Synodo decernēda, eo maioris apud omnes  
existimationis & honoris videri posse, quo maio-  
re fuerint & pleniore patrum Concilio & præsen-  
tia sancita & corroborata: statuit & decreuit futu-  
ram sessionem post præsentem celebrandam esse  
die Iouis quæ subsequetur Dominicā Lætare pro-  
ximè futuram. Interim tamen non differri discus-  
sionem & examinationem eorū quæ ipsi Synodo  
discutienda & examinanda videbuntur.

Decretum

Decretum tertiæ sessionis Concilij  
Tridentini, quæ celebrata fuit quinta  
Aprilis eodem anno.



Acrosancta œcumenica & generalis  
Tridentina Synodus in Spiritus sancto  
legitimè congregata, præsidentibus  
in ea eisdem tribus Apostolicæ sedis  
Legatis, hoc sibi ante omnia perpe-  
tuo proponens, ut sublatis omnibus erroribus pu-  
ritas ipsa Euangelij in Ecclesia conseruetur, quod  
promissum antè per prophetas in scripturis sanctis  
dominus noster Iesus Christus Dei filius proprio  
ore primùm promulgauit, deinde per suos Aposto-  
los tanquam fontem omnis salutaris veritatis &  
morum disciplinæ, omni creaturæ prædicari iussit:  
prospiciensque hanc veritatem & disciplinam con-  
tineri in libris scriptis, & sine scripto, traditioni-  
busque ipsius Christi, quæ ab Apostolis acceptæ,  
aut ab ipsis Apostolis Spiritus sancto dictante qua-  
si per manus traditæ ad nos vsque peruenerunt:  
orthodoxorum Patrum exempla sequuta, omnes  
libros tam veteris quàm noui Testamenti (cum  
vtriusque vnus Deus sit auctor) necnon traditio-  
nes ipsas, tum ad fidem tum ad mores pertinens  
tes, tanquam vel ore tenus à Christo, vel à Spiritu  
sancto dictatas, & continua successione in Eccle-  
sia catholica conseruatas, pari pietatis affectu ac  
reuerentia suscipit ac veneratur. Sacrorum ve-  
rò librorum indicem huic decreto adscribendum  
censuit, ne cui dubitatio suboriri possit, quinam  
H. ij. sint

sint qui ab ipsa Synodo suscipiantur. Sunt verò  
infra scripti: Testamenti veteris, quinque libri  
Moyssi, scilicet Genesis, Exodus, Leuiticus, Nu-  
meri, Deuteronomium: deinde Iosue, Iudicum,  
Ruth, quatuor Regū, Paralipomenon duo, Esdræ  
duo, primus scilicet, & secundus qui dicitur Nehe-  
mias, Tobias, Iudith, Esther, Iob, Psalterium Da-  
uidicum centum quinquaginta psalmorum, Para-  
bolæ Salomonis, Ecclesiastes, Canticum Cantico-  
rum, Sapientia, Ecclesiasticus, Esaias, Hieremias,  
Baruch, Ezechiel, Daniel: Duodecim prophete mi-  
nores, scilicet Osee, Ioel, Amos, Abdias, Ionas, Mi-  
chæas, Nahum, Habacuc, Sophonias, Aggeus, Za-  
charias, Malachias: Duo Machabæorum, primus  
scilicet & secundus: Testamēti noui, quatuor Euan-  
gelia, scilicet secundum Matthæum, Marcum, Lu-  
cam, & Ioannem: Acta Apostolorū à Luca Euan-  
gelista conscripta: quatuordecim epistolæ beati  
Pauli Apostoli, scilicet ad Romanos, ad Corin-  
thios duæ, ad Galatas, ad Ephesios, ad Philippen-  
ses, ad Colossenses, ad Thessalonicenses duæ, ad  
Timotheum duæ, ad Titum, ad Philemonem, ad  
Hebræos: Petri Apostoli duæ: Ioannis Apostoli  
tres: Iacobi Apostoli vna: vna Iudæ Apostoli: vna  
Apocalypsis Ioannis Apostoli. Si quis autē libros  
ipsos integros cum omnibus suis partibus prout  
in Ecclesia catholica legi consueuerunt, & in vete-  
ri vulgata Latina editione habentur, pro sacris &  
canonicis non susceperit, & traditiones prædictas  
sciēs & prudēs contēpserit, anathema sit. Omnes  
itaque intelligāt quo ordine & via, ipsa Synodus,  
post iactum fidei confessionis fundamentum, sit  
progres

progressura, & quibus potissimum testimonijs ac  
præsidijs in confirmandis dogmatibus, & instau-  
randis in Ecclesia moribus sit vsura. Insuper ea-  
dē Sacrosancta Synodus considerans non parum  
vtilitatis accedere posse Ecclesiæ Dei, si ex mul-  
tis Latinis editionibus, quæ circumferuntur sacro-  
rum librorum, quænam pro authentica habenda  
sit, innotescat: Statuit & decreuit, vt hæc ipsa ve-  
tus & vulgata editio, quæ longo tot seculorū vsu  
in Ecclesia ipsa probata est, in publicis lectionibus,  
disputationibus, prædicationibus, aut expositioni-  
bus, pro authentica habeatur, & quod eam nemo  
reijcere quouis prætextu audeat, vel præsumat.  
Præterea ad coercenda petulantia ingenia, decre-  
uit vt nemo suæ prudentiæ innixus, in rebus fidei  
& morum ad ædificationem doctrinæ Christianæ  
pertinentium, sacram scripturā ad suos sensus con-  
torqueat: aut contra eum sensum quem tenuit &  
tenet sancta mater Ecclesia, cuius est iudicare de  
vero sensu & interpretatione sanctarum scriptura-  
rum, aut etiam contra vnanimem consensum Pa-  
trum, ipsam scripturā sacram interpretari audeat:  
etiam si huiusmodi interpretationes nullo vnquā  
tempore in lucem edendæ forent. Qui contraue-  
nerint, per ordinarios declarentur, & pœnis à iure  
statutis puniantur. Sed & impressoribus modum in  
hac parte (vt par est) imponere volens, qui iam si-  
ne modo, hoc est putantes sibi licere quicquid li-  
bet, sine licentia superiorum & ecclesiasticorum,  
ipsos sacræ scripturæ libros, & super illos anno-  
tationes & expositiones quomodo libet indiffe-  
rentes sæpe tacito, sæpe etiam e mentito prælo, &  
H. iij. (quod

(quod est grauius) sine nomine auctoris imprimunt, alibi etiam impressos libros huiusmodi temere venales habent: decreuit & statuit vt post hac sacra scriptura, potissimum verò hæc ipsa vetus & vulgata editio quamemendatissimè imprimatur, nullique liceat imprimere vel imprimi facere quosuis libros de rebus sacris sine nomine auctoris, neque illos in futurum vendere, aut etiam apud se retinere, nisi primùm examinati probatique fuerint ab ordinario, sub pœna anathematis & pœnæ in canone Concilij nouissimi Lateranensis appositæ. Et si regulares fuerint, vltra examinationem & probationem huiusmodi, licentiam quoque à suis superioribus impetrare teneantur, recognitis per eos libris iuxta formam istarum ordinationum. Qui autem scripto eos communicant vel euulgant, nisi antè examinati probatique fuerint, eidem pœnis subiaceant, quibus impressores. Et qui eos habuerint vel legerint, nisi auctorem prodiderint, pro auctoribus habeantur. Ipsa verò huiusmodi librorum probatio in scriptis detur, atque aded in fronte libri vel scripti vel impressi authenticè appareat. Idque totum hoc, etiam probatio & examen, gratis fiat, vt probanda probentur, & improbanda reprobentur.

Post hæc temeritatem illam reprimere volens, qua ad prophana quæque conuertuntur & verba torquentur, & sententiæ sacræ scripturæ ad scurrilia scilicet, fabulosa, vana, adulationes, detractio-  
nes, superstitiones, impias & diabolicas incantationes, diuinationes, sortes, libellos etiam famosos: mandat & præcipit ad tollendam huiuscemodi irreueren-

reuerentiam & contemptum, & ne de cetero quif-  
quam quomodolibet uerba sacre scripturæ ad hæc  
& similia audeat usurpare, ut omnes eius gene-  
ris corruptores, temerarios, & violatores uerbi  
Dei, iuris & arbitrij pœnis per Episcopos coer-  
ceantur.

Item hæc Sacrosancta Synodus statuit & decre-  
uit, proximam futuram sessionem tenendam, & ce-  
lebrandam esse feria quinta post sacratissimum fes-  
tum Pentecostes.

**Primum decretum quartæ sessionis Tri-**  
**dentini Concilij xvi. mensis Iunij**  
**M. D. XLVI. celebratæ.**



T fides nostra catholica, sine qua im-  
possibile est placere Deo, purgatis  
erroribus in sua sinceritate integra &  
illibata permaneat, & ne populus  
Christianus omni vento doctrine cir-  
cunferatur: cum serpens ille antiquus humani ge-  
neris perpetuus hostis inter plurima mala quibus  
ecclesia Dei his nostris temporibus perturbatur,  
etiam de peccato originali eiusque remedio non  
solum uetera sed noua etiam dissidia excitauerit,  
sacrosancta œcumenica & generalis Tridentina  
Synodus in Spiritus sancto legitime congregata,  
præsidentibus in ea eisdem tribus Apostolicæ se-  
dis Legatis, iam ad reuocandos errantes, & nutan-



res confirmandos accedere volens, sacrarum scripturarum & sanctorum Patrum ac probatissimorum Conciliorum testimonia, & ipsius Ecclesiae iudicium & consensum sequuta, hæc de ipso peccato originali statuit, fatetur, ac declarat.

Si quis non confitetur primum hominem Adam cum mandatum Dei in paradiso fuisset transgressus, statim sanctitatem & iustitiam in qua positus fuerat amisisse, incurrisseque per offensam præuaricationis eiusmodi iram & indignationem Dei, atque ideo mortem, quam antea illi comminatus fuerat Deus, & cum morte captiuitatem sub eius potestate qui mortis deinde habuit imperium, hoc est diaboli, solumque Adam per illam præuaricationis offensam secundum corpus & animam in deterius commutatum fuisse, anathema sit.

Si quis Adæ præuaricationem sibi soli & non eius propagini asserit nocuisse, acceptam à Deo sanctitatem & iustitiam quam perdidit sibi soli & non nobis eum perdidisse, aut inquinatum illum per inobedientiæ peccatum mortem & pœnas corporis tantum in omne genus humanum transfusisse, non autem & peccatum quod mors est animæ, anathema sit: quum contradicat Apostolo dicenti, Per vnum hominem peccatum intrauit in mundum; & per peccatum mors, & ita in omnes homines mors pertransijt, in quo omnes peccauerunt.

Si quis hoc Adæ peccatum, quod origine vnum est, & propagatione non imitatione transfusum, in omnibus inest unicuique proprium, vel per humanæ naturæ vires, vel per aliud remedium asserit tolli, quàm per meritum vnius mediatoris Domini nostri



nostri Iesu Christi, qui nos Deo reconciliauit in sanguine suo, factus nobis iustitia, sanctificatio, & redemptio: aut negat ipsum Iesu Christi meritum per baptismi sacramentum in forma Ecclesiae rite collatum tam adultis quam paruulis applicari, anathema sit: quia Non est aliud nomen sub caelo datum hominibus, in quo oporteat nos saluos fieri. Vnde illa vox, Ecce agnus Dei, ecce qui tollit peccata mundi. Et illa, Quicumque baptizati estis, Christum induistis.

Si quis paruulos recentes ab vteris matrum baptizandos negat, etiamsi fuerint à baptizatis parentibus orti: aut dicit in remissionē quidem peccatorum eos baptizari, sed nihil ex Adam trahere originalis peccati, quod regenerationis lauacro necesse sit expiari ad vitam æternam consequendam: vnde sit consequens, vt in eis forma baptismatis in remissionem peccatorum nō vera sed falsa intelligatur: anathema sit. quoniam non aliter intelligendum est id quod dixit Apostolus, Per vnum hominem peccatum intrauit in mundum, & per peccatum mors, & ita in omnes homines mors pertransijt, in quo omnes peccauerunt, nisi quemadmodum Ecclesia catholica vbique diffusa semper intellexit. Propter hanc enim regulam fidei, ex traditione Apostolorum, etiam paruuli qui nihil peccatorum in semetipsis adhuc committere potuerunt, ideo in remissionem peccatorum veraciter baptizantur, vt in eis regeneratione mundetur, quod generatione contraxerunt. Nisi enim quis renatus fuerit ex aqua & Spiritu sancto, nō potest introire in regnum Dei.

Si quis

Si quis per Iesu Christi domini nostri gratiam  
quæ in baptismo confertur, reatum originalis  
peccati remitti negat: aut etiam asserit non tolli  
totum id quod veram & propriam peccati ratio-  
nem habet, sed illud dicit tantum radi aut non im-  
putari: anathema sit. In renatis autem nihil odit  
Deus: quia Nihil est damnationis ijs qui verè cõ-  
sepulti sunt cum Christo per baptismum in mortem,  
qui non secundum carnem ambulant, sed veterem  
hominem exuentes & novum induentes qui secun-  
dum Deum creatus est, innocentes, immaculati,  
puri, innoxij, ac Deo dilecti, effecti sunt hæredes  
quidem Dei, cohæredes autem Christi, ita ut ni-  
hil prorsus eos ab ingressu cæli remoretur. Mane-  
re autem in baptizatis concupiscentiam vel fomi-  
tem, hæc sancta Synodus fatetur & sentit: quæ-  
quum ad agonem relicta sit, nocere non consentien-  
tibus, & viriliter per Iesu Christi gratiam repu-  
gnantibus non valet: quinimo qui legitimè cer-  
tauerit, coronabitur. Hanc concupiscentiam, quam  
aliquando Apostolus Peccatum appellat, sancta  
Synodus declarat Ecclesiam catholicam nunquam  
intellexisse Peccatum appellari, quod verè & pro-  
priè in renatis peccatum sit, sed quia ex peccato  
est, & ad peccatum inclinatur. Si quis autem con-  
trarium senserit, anathema sit.

Secundum decretum quartæ sessionis Tri-  
dentinæ Synodi.



A dem sacrosancta Synodus pijs sum-  
morum pōtificum & probatorū Con-  
ciliorum constitutionibus inhærens,  
easq; amplectens, & illis adiiciens, ne  
cælestis ille thesaurus sacrorū librorū  
quē Spiritussanctus summa liberalitate hominibus  
tradidit, neglectus iaceat: statuit & decreuit quod  
in illis Ecclesijs, in quibus præbēda aut præstimo-  
nium, seu aliud quouis nomine nūcupatū stipendiū  
pro lectoribus sacrae Theologiæ deputatū reperit-  
tur, Episcopi, Archiepiscopi, Primates, & alij loco-  
rum ordinarij, eos qui præbendā, aut præstimoniū,  
seu stipēdium huiusmodi obtinent, ad ipsius sacre  
scripturæ expositionē & interpretationē per sei-  
psos si idonei fuerint, alioquin per idoneū substitu-  
tum ab eis Episcopis, Archiepiscopis, Primatibus,  
& alijs locorū ordinarijs eligendū, etiā per subtra-  
ctionē fructuum cogant, & cōpellant. De cætero  
verò præbēda, præstimoniū, aut stipendium huius-  
modi, nō nisi personis idoneis, & qui per seipsos  
id munus explicare possint, conferatur: & aliter fa-  
cta prouisio, nulla sit, & inualida.

In Ecclesijs autē Metropolitanis vel Cathedra-  
libus, si ciuitas insignis vel populosa, ac etiā in col-  
legiatis existētibus in aliquo insigni oppido etiam  
nullius diœcesis, si ibi clerus numerosus fuerit, vbi  
nulla præbenda, aut præstimonium, seu stipendiū  
huiusmodi deputatū reperitur, præbēda quomodo-  
cunq; (præterq̃ ex causa resignationis) primò vaca-  
tura, cui aliud onus incōpatibile iunctū nō sit, ad  
eum

eum vsum ipso facto perpetuò cōstituta & deputa-  
ta intelligatur. Et quatenus in ipsis Ecclesijs nulla  
vel nō sufficiens præbēda foret, Metropolitanus,  
vel Episcopus ipse per assignationē fructuū alicu-  
ius simplicis beneficij, eiusdē tamē debitis suppor-  
tatis oneribus, vel per cōtributionē beneficiatorū  
sux ciuitatis & diœcesis, vel aliàs prout cōmodius  
fieri poterit, de capituli cōsilio ita prouideat, vt i-  
psa sacra scripturæ lectio habeatur: ita tamen, vt  
quæcunq; alię lectiones, vel cōsuetudine, vel qua-  
uis alia ratione institutæ, propter id minimè præ-  
termittantur.

Ecclesiæ verò quarum annui prouentus tenues  
fuerint, & vbi tam exigua est cleri & populi mul-  
tudo, vt Theologiæ lectio in eis cōmodè habe-  
ri nō possit, saltem magistrum habeant ab Episco-  
po cum capituli consilio eligendum, qui clericos  
aliósque scholares pauperes grammaticam gratis  
doceat: vt deinceps ad sacra scripturæ studia, an-  
nuente Deo, transire possint. Ideòq; illi magistro  
grammatices, vel alicuius simplicis beneficij fru-  
ctus, quos tandiu percipiat quādiu in docēdo per-  
stiterit, assignentur: dum tamen beneficium ipsum  
suo debito non fraudetur obsequio: vel ex capitu-  
lari, vel ex Episcopali mensa, cōdigna aliqua mer-  
ces persoluatur: vel aliàs Episcopus ipse aliquam  
rationem ineat, suæ Ecclesiæ & diœcesi accommo-  
dam, ne pia hæc utilis atq; fructuosa prouisio quo-  
uis quæsitò colore negligatur.

In monasterijs quoque monachorum vbi com-  
modè fieri id queat, etiam prælectio sacra scriptu-  
ræ habeatur. Qua in re si Abbates negligentes fue-  
rint,

rint, Episcopi locorum in hoc vt sedis Apostolicę delegati, eos ad id opportunis remedijs cōpellāt.

In cōuētibus verò aliorū regulariū, in quibus studia cōmodè vigere possunt, etiam lectio sacrę scripturę habeatur: quę lectio à capitulis generalibus, vel prouincialib<sup>9</sup>, assignetur digniorib<sup>9</sup> magistris.

In Gymnasijs autem publicis, vbi tam honorifica & cæterorum omnium maximè necessaria lectio hactenus instituta non fuerit, religiosissimorum Principum ac Rerūpublicarum pietate & charitate ad cātholicę fidei defensionem & incrementum, sacręq; doctrinę conseruationem & propagationem instituatur: & vbi instituta foret, & negligeretur, restituatur.

Et ne sub specie pietatis, impietas disseminetur, statuit eadē sancta Synodus, neminem ad huiusmodi lectiōis officium tam publicē quā priuatim admittendum esse, qui prius ab Episcopo loci de vita, moribus, & scientia examinatus & probatus non fuerit. Quod tamen de lectoribus in claustris monachorum non intelligatur.

Docentes verò ipsam sacram scripturam, dum publicē in scholis docuerint, & scholares qui in ipsis scholis student, priuilegijs omnibus de perceptione fructuum, prębendarum, & beneficiorum suorum in absentia à iure concessis plenè gaudeant, & fruantur.

Quia verò Christianę Reipublicę nō minus necessaria est prædicatio Euangelij, quā lectio, & hoc est præcipuum Episcoporum munus: statuit & decreuit eadē sancta Synodus, omnes Episcopos, Archiepiscopos, Primates, & omnes alios Ecclesiæ

clesiarum praelatos teneri per seipfos ( si legitimè impediti non fuerint ) ad prædicandum sanctum Iesu Christi Euangelium.

Si verò contigerit Episcopos & alios praelatos legitimo detineri impedimento, iuxta formam generalis Cõcilij viros idoneos assumere teneantur ad huiusmodi prædicationis officiũ salubriter exequendum. Si quis autem hoc adimplere contempserit, districtæ subiaceat ultioni.

Archipresbyteri quoque, plebani, & quicunque parochiales, vel aliàs curam animarum habentes Ecclesias quocũq; modo obtinent, per se vel alios idoneos, si legitimè impediti fuerint, diebus saltẽ dominicis, & festis solennibus plebes sibi commissas pro sua & earum capacitate pascant salutaribus verbis, docendo ea quę scire omnibus necessarium est ad salutem, annuntiandõque eis cum breuitate & facilitate sermonis vitia quę eos declinare, & virtutes quas eos sectari oportet, vt pœnam æternam euadere, & cœlestem gloriã consequi valeant. Id verò si quis eorum prætare negligat, etiam si ab Episcopi iurisdictione quauis ratione se exemptum esse prætenderet, etiam si Ecclesiæ quouis modo exemptæ dicerentur, aut alicui monasterio etiam extra diocesium existenti forsan annexæ vel vnitæ, modò re ipsa in diocesi sint, prouida pastoralis Episcoporum sollicitudo non desit, ne illud impleatur: Paruuli petierunt panem, & non erat qui frangeret eis. Itaque vbi ab Episcopo moniti, trium mensium spatio muneri suo defuerint, per censuras Ecclesiasticas seu aliàs ad ipsius Episcopi arbitrium cogantur. Ita vt etiam si ei sic exa  
pedire

pedire visum fuerit, ex beneficiorum fructibus alteri qui id præstet, honesta aliqua merces persol-  
uatur, donec principalis ipse recipiens officium  
suum impleat. Si quæ verò parochiales ecclesiæ  
reperiantur subiectæ monasterijs in nulla diœcesi  
existentibus, si Abbates & regulares prælati in  
prædictis negligentes fuerint, à Metropolitanis  
in quorum prouincijs diœceses ipsæ sitæ sunt,  
tanquam quoad hoc sedis Apostolicæ delegatis  
compellantur. Neque huius decreti executionem  
consuetudo, vel exemplio, aut appellatio, aut re-  
clamatio, siue recursus impedire valeat, quousq; de  
super à cõpetenti iudice, qui summarie & sola facti  
veritate inspecta procedat, cognitum sit, & decisum.

Regulares verò cuiuscunque ordinis, nisi à suis  
superioribus de vita, moribus, & sciëntia examinati  
& approbati fuerint, ac de eorū licentia, etiam si in  
Ecclesijs suorum ordinū, prædicare non possint: cū  
qua licentia personaliter se coram Episcopis præ-  
sentare, & ab eis benedictionem petere tenean-  
tur antequam prædicare incipiant.

In Ecclesijs verò quæ suorum ordinum non sunt,  
vltra licentiam suorum superiorū etiam Episcopi  
licentiā habere teneantur, sine qua in ipsis Ecclesijs  
non suorum ordinū nullo modo prædicare possint.  
Ipsam autē licentiam Episcopi gratis concedant.

Si verò ( quod absit ) prædicator errores, aut  
scandala disseminauerit in populū, etiam si in mo-  
nasterio sui vel alterius ordinis prædicet, Episco-  
pus ei prædicationē interdicat. Quod si hereses præ-  
dicauerit, contra eum secundū iuris dispositionem  
aut loci cõsuetudinē procedat, etiā si prædicator  
ipse



ipse generali vel speciali priuilegio exemptum se esse prætenderet. Quo casu, Episcopus auctoritate apostolica, & tanquam sedis apostolicæ delegatus procedat. Curent autem Episcopi, ne quis prædicator vel ex falsis informationibus, vel aliàs calumniosè vexetur, ne iustam de eis conquerendi occasionem habeat.

Caueant præterea Episcopi, ne aliquem vel eorum qui cum sint nomine regulares, extra claustra tamen & obedientiam religionum suarum viuunt, vel presbyterorum secularium, nisi ipsis noti sint, & moribus atque doctrina probati, etiam quorumlibet priuilegiorum prætextu, in sua ciuitate vel diocesi prædicare permittant, donec ab ipsis Episcopis super eo sancta sedes Apostolica consulatur: à qua priuilegia huiusmodi, nisi tacita veritate, & expresse mendacio, ab indignis extorqueri verisimile non est.

Quæstores verò eleemosynarij, qui etiam quæstuarij vulgo dicuntur, cuiuscunque conditionis existant, villo modo nec per se, nec per alium prædicare præsumant: & contra facientes, ab Episcopis & ordinarijs locorum, priuilegijs quibuscunque non obstantibus, opportunis remedijs omnino coerceantur.

Item hæc sacrosancta Synodus statuit & decreuit, primam futuram sessionem tenendam celebrandam esse die Iouis feria quinta post festum beati Iacobi Apostoli.

FINIS.

